

## ኬሳ ማጻፋ ጊደ ቆፋ

ኬሳ ማጻፋይ የቲዛይሲ ኢሰራኤል አሳይ አይሌቴላን ዴኢዳ ጊብጼ ቢታፌ ኬዚዳ ሃኖታ ጊሻሳ። ሃይሳ ማጻፋስ ሄቹ ዋና ዋና ቆፋቲ ዴቴስ።

1. ኢብራዌቲ አይሌቴላፌ ኬዚዳይሳኔ ሲና ዙማ ኢስቲ ቢዳ ቡሳ ጊሻስ የቴስ። (1-13)

2. ጸሲ ባ አሳራ ጫቆ ጫቂቲዳይሳ፥ ኢታኔ ሎኦ ሻኪዲ ኤሪሲዛ ዋጋታ፥ አሳይ አቂዛ ዋጋታኔ አማኖ ዋጋታ ኢዚ ኢስታስ አሚዳይሳ የቴስ። (14-18)

3. ኢሰራኤል አሳስ፥ ቄሴታ ኦሶሲኔ ጸሳስ ጎይኒዛ ጎይኖስ አሚቲዳ ዋጋታ ጊሻስ የቴስ። (19-40)

ኡባፌ አሊዲ ሃይሲ ማጻፋይ ጸሲ አይሌቴላን ዲዛ ባ አሳ ኬሲ ሲሚዲ፥ ኢስቲ ሲንላፌ ያና ዬሌታስ ሂዶታይ ዲዛ አሳ ጊዳና ማላ ኢዚ ኢስታ ዋስቲ ኦሊዳኮ የቴስ።

ሃ ማጻፋን ዳሪዛ ባጋ ታሪኬዛ ጎዳ ጊዲዲ ሸቂዳ አሲ ባ አሳ ጊብጼፔ ኬሳና ማላ፥ ጸሲ ዶሪዳ ሙሴ ማጻፋ ጊደን ዳሮፔ ኤሪቲዳ ሸምፖይ ታሙ አዛዘቲ ጸፊቲዳ ናምኡ ታማንሶ ሸምፖዛ።

### ሃ ማጻፋይ ኦይኪዳ ኩሜሳ ቆፋ

ኢሰራኤል አሳይ ጊብጼ አይሌቴላፌ ላኦ ኬስ 1:1—15:21

ጊብጼን አይሌቴላ 1:1-22

ሙሴ ዬሌቴላኔ ኢዛ ዲች 2:1—4:31

ሙሴይኔ አሮኔይ ፓሮኔ ሲንላን 5:1—11:10

ፓዚጋኔ ጊብጼፔ ኬስ 12:1—15:21

ዘኦ አባፌ ቢዲ ሲና ዙማ ጋካናስ ዲዛ ሃኖታ 15:22—18:27

ዋጋኔ ጫቆ ቃላ 19:1—24:18

ዲማቲዳ ጋይቶቴላ ዲንካኔኔ ጎይኖ ዋጋታ 25:1—40:38

ጊብጼ ቢታን ኢሰራኤል ናይታ ቦላ ጋኪዳ ናቆኔ ቆሆ

<sup>1</sup> ባሶ አሳ ኡባ ኤኪ ያቆቤራ ጊብጼ ቢዳ ያቆቤ ናይታ ሱንሊ ሃይሳፌ ካሊ ጸፊቲዳስ።

<sup>2</sup> ኢስቲካ ኦሮቤሌ፥ ሲሞና፥ ሌዌ፥ ዩሁዳ፥

<sup>3</sup> ዩሳኮሬ፥ ዛቢሎኔ፥ ቢኒያሜ፥

- 4 ዳኔ፥ ኒፍታሌሜ፥ ጋዴኔ አሴሬ።
- 5 ያቆቤ ዘሬላቲ ሙሌራ ላቸን ታማ፤ የሴሬይ ካሴቲዲ ጊብጼ ቢዲ ሄን ዴሰ። \*
- 6 የሴሬይ፥ ኢዛ አሻቲኔ ሄ ዩሌታይ ዉሪካ ሃይቂዴስ፤
- 7 ጊዶ አቲን ኢሰራኤሌ ዘሬላቲ ዩሌቲዲ ኬሂ ዳሪዳ፤ ሄ ቢታ ኩማና ጋካናስ ኢሰቲ ኬሂ ጮራቲዳ።
- 8 ሄሳፌ ጉዬ የሴሬ ኤርንታ ኦራላ ካዎይ ጊብጼ ቢታን ዴንዲዴስ።
- 9 ኢዚ ባ አሳ፥ «ቤኢቲ፤ ሃይቲ ኢሰራኤሌ አሳይ ኑፔ ኬሂ ዳሪዳኔ ዎልቃሚዳ።
- 10 ሃ ዪቴ፥ እኔ ኑኒ ኢስታ ሂላን ኦይኮስ፤ ሂሰቶንታ አጊኮ ኢሰቲ ካሴፔ ጌዴ ዳሪ ዳሪ ባና። ጌሊ ጊዳ ኦላይ ዴንዲኮ ኢሰቲ ኑ ዎርኬታራ ጋጊዲ ኑና ኦላናኔ ቢታ ዩጊዲ ባና» ጊዴስ።
- 11 ሄሳ ጊሻስ ዴዶ ኦሶን ኢስታ ቱጋሳና ማላ ኢስታ ቦላ ሃላቃታ ደሪዳ። ኢሰቲካ ካዎስ ፒቶሜኔ ኤራሚሴ ጌቴቲዛ ዴማ ዴማ ሚንጃ ሚሻታ ዎሊዛ ካታማታ ኬዲዳ።
- 12 ጊዶ አቲን ጊብጼ አሳይ ኢስታ ኬሂ ዎዪሲዳ ዎዴ ኢሰቲ ጉጃቲ ጉጃቲ ዩሌቲዳኔ ቢታ ጋኪዳ። ሄሳ ጊሻስ ጊብጼ አሳይ ኢሰራኤሌ ናይታ ኢዲዴስ።
- 13 ሄሳ ጊሻስ ኢስታ ዳሮ ዳቡርሲዛ ኦሶን ዎዪሲዳ።
- 14 ዎልቃማ ኦሶን፥ ሲሚንቶኒኔ ጽቤ ሜጶን፥ ቃሴ ጎሼ ጎይሶን፥ ኢስታ ዴሳን ኡንኤሊዳ፤ ዳቡርሲዛ ኦሶ ኡባ ቃጴታይ ባይንዳ ኢስታ ኦሲሲዳ።
- 15 ጊብጼ ካዎይ ኢብራዌ ማጫሳታ ዩሊሲዛ ሲፖሮኔ ፑሆ ጌቴቲዛ ናምኡ ማጫሳታስ፥
- 16 «ኢብራዌ ማጫሳቲ ዩሊዛ ዎዴ ኢንቴ ዩሊሲሺን ዩሌቲዳይሲ አቱማ ና ጊዲኮ ዎጲቴ፤ ጊዶ አቲን ማጫ ና ጊዲኮ ዎጲፒቴ»
- 17 ጊዶ አቲን ዩሊሲዛይቲ ጸሳስ ባቢዲ ጊብጼ ካዎይ ኢስታ አዛዚዳ ማላ ኦሊቤቴና፤ ዎጲንታ አቱማ ናይታ ፓጻ አጊዳ።
- 18 ሄሳፌ ጉዬ ጊብጼ ካዎይ ሄ ዩሊሲዛይታ ጸይጊዲ፥ «ኢንቴ አይሰ ሃይሳሶ ኦሊዴቲ? አቱማ ናይታ አይሰ ፓጻ አጊዴቲ?» ጊ ኦይቺዴስ።

\* 1:5 ላቸን ታማ (ሜጴ 46:26-27) ጊዛይሳ ሃይቆ አባን ቤቲዳ ማጻፋኒኔ ላቸን ታሙ ኤራንቻታ ቢርሸላን፥ «ላቸን ታማኔ ኢቻሻ» ጌሰ። (ሃዋ 7:14 ቤኣ) 1:7 ሃዋ 7:17 1:8 ሃዋ 7:18 1:10 ሃዋ 7:19

19 ዩሊሲዛይቲ ዛሪዲ፥ «ኢብራዊ ማጫሳቲ ጊብጼ ማጫሳታ ማላ ጊዳቲና፤ ኢስቲ ሚኖ ጊዲዳ ጊሻስ ዩሊሲዛይቲ ጋካናፔ ሲንሳቲዲ ዩሊፔቲስ» ጊዲ።

20 ሄሳ ጊሻስ ጸሲ ዩሊሲዛይታስ ከዪደስ። ኣሳ ቆዳይካ ጉጃቲ ጉጃቲ ቢዲ ካሴይሳፊ ጌዴ ዳሪዳሲኔ ሚኒደስ።

21 ቃሴ ዩሊሲዛይቲ ጸሳስ ባቢዳ ጊሻስ ጸሲ ኢስታስ ዩሎ ኢሚ ኣንጂደስ።

22 ሄሳፊ ጉዬ ካዎይ ባ ኣሳ ኡባ፥ «ኢብራዊታፔ ዩሌቲዛ ኣዴ ና ኡባ ናይሌ ጌቲቲዛ ሻፋ ሃላን ኦሊቲ፤ ጊዶ ኣቲን ማጫ ናይ ዩሌቲኮ ፓጸ ኣገቲ» ጊዲ ኣዛዚደስ።

## 2

### ሙሴ ዩሌቲሳ

1 ሄ ዎዴ ኢሲ ለዌ ቆዋ ጊዲዳ ኣዴይ ለዌ ማጫ ናዮ ማቾ ኤኪደስ፤

2 ኢዛ ቃንሳታዲ ኣዴ ና ዩላዲስ። ናዚካ ማላ ሎኦ ና ጊዲዳይሳ ቤያዳ ሄቩ ኣገና ቆታዲስ።

3 ጊዶ ኣቲን ኢዛ ሄሳፊ ዳሮ ቆታናስ ዳንዳዮንታይሳ ኤራዳ፥ ሻጫፊ ኬሼ ኢዛስ ዳዳዳ ሺዳን ሚሻዳ፥ ናዛ ኢዛ ጊዶን ዎላዳ ናይሌ ሻፋ ዶናን ዱሬሳ \* ጌቲቲዛ ማታ ጊዶን ዎላዲስ።

4 ኢዛ ሚቼያ ኢዛ ቦላ ኣዚ ሃናናኮ ቤያናስ ሃሆን ኤቃዳ ጸላፊስ።

5 ጊብጼ ካዎ ናያ ቦላ ሜጩታናስ ናይሌ ሻፋ ዎዳዲስ፤ ኢዚ ማጫ ኣይሌቲካ ሃላ ዶናን ያኔ ሃ ሄሚቲቲስ፤ ኢዛ ኬሼዛ ዱሬሳ ጌቲቲዛ ማታ ጊዶን ቤያዳ፥ ባዳ ኤካዳ ያና ማላ ባ ኣይሌዮ ኪታዲስ፤

6 ኬሼዛ ዶያዳ ሄ ጉላ ናዛ ቤያዲስ። ኢዚ ዩኪዛ ጊሻስ ኢዛስ ቃዴታዳ፥ «ሃይሲ ኢብራዊታ ጉላ ናይታፔ ኢሳ ጊዶንታ ኣገና» ጋዲስ።

7 ሄ ዎዴ ኢዛ ሚቼያ ካዎ ናዮ፥ «ኔስ ሃ ናዛ ቋንሳናስ ኢብራዊታፔ ኢሲ ማጫስ ኤሃናስ ቦ?» ጋዳ ኦይቻዲስ።

8 ሂስቲን ኢዛ፥ «ኤ፥ ባ» ጋዲስ። ናያ ባዳ ሄ ናዛ ኣዮ ኤሃዲስ።

---

1:22 ሃዋ 7:19      2:2 ሃዋ 7:20፤ ኢብ 11:23      \* 2:3 ዱሬሳ፥ ዱሬሳ ጌቲቲዛይሲ ኢሲ ኢሲ ባጋ ጋዋሶ ቃላን ሃልካሻ ጌቲቲስ።

9 ካዎዛ ናያ ሄ ማጫሳዮ፥ «ሃይሳ ናዛ ኤፋዳ ታሰ ጳንላሻ፤ ታኒ ኔሰ ዳሞዛ ቃንጸና» ጋዱሰ። ማጫሳያ ናዛ ኤፋዳ ጳንላ ዲቻዲሰ።

10 ናዚ ዲጪን ካዎ ናይኮ ኢዛ ኤሂን ኢዚ ኢዚሰ ና ጊዲዴሰ፤ «ታኒ ኢዛ ሃላፌ ኬሳዲሰ» ጋዳ ኢዛ ሙሴ ጋ ሰንላዲሰ።†

### ሙሴይ ሚዲያሚ ቢታ ቤቱ ቡስ (ሃዋ 7:21)

11 ሙሴይ ዲጪዲ ጊታ ጊዲዲ ኢሲ ጋላሰ ባ አሳይ ዲዛሶ ቢዲ ኢሰቲ ዳጾ ኦሶ ኦሊሺን ቤኢዴሰ። ኢሲ ጊብጾ ቢታ አሲ ኢዛ አሳታ ኢብራዊታፕ ኢሳ ዋጲሺን ቤኢዴሰ።

12 ኢዚ ያኔ ሃ ጸለን ኦኒካ ባይንዳይሳ ቤኢዲ ሄ ጊብጾ አዳዛ ዋጲዲ አጮ ጊዶን ካሺ ቆቲዴሰ።

13 ዋንቴላ ጋላሰ ኬዚዲ ናሞኡ ኢብራዊቲ ባ ጋርሳን ዋጲቲዛይታ ቤኢዴሰ። ቆሂዛይሳ ኢዚ፥ «ኔኒ ኔ አሰ ጊዲዳ ኢብራዊዛ አይሰ ዋጲይ?» ጊ ኦይቺዴሰ።

14 ሄ አዳዚካ፥ «ኔና ኦ ቦላ ጎዳኔ ዳና ሂሰቲዳይ ኦኔ? ኔኒ ጊብጾ አዳዛ ዋጲዳይሳ ማላ ታናካ ዋጲና ቆፓይ?» ጊን ሙሴይ፥ «ታኒ ኦሊዳይሲ ኤሬቲቺዴሰ» ጊ ባቢዴሰ።

15 ካዎዚ ሄሳ ሲዩዲ ሙሴ ዋጲናሰ ኮዩዴሰ፤ ጊዶ አቲን ሙሴይ ካዋፕ ቤቲዲ ሚዲያሚ ቢታን ዳናሰ ቢዲ ኢሲ ሃላ ኦላ ዶናን ኡቲዴሰ።

16 ሄ ዋዴ ኢሲ ሚዲያሚ ቄሴሰ ላፑን ማጫ ናይቲ ዳቴሰ፤ ኢሰቲ ሄ ሃላ ኦላኮ ባ አዋ ዶርሳታ ሃላ ኡሻናሰ ዩዲ ጎንጌን ሃላ ዱቂ ኩንሲዳ።

17 ሄሚዛይቲ ዩዲ ማጫ ናይታ ጎዲዳ፤ ጊዶ አቲን ሙሴይ ዴንዲ ኤቂዲ ኢሰታ አሺዴሲኔ ኢሰታ ዶርሳታ ሃላ ኡሺዴሰ።

18 ኢሰቲ ባ አዋ ዮቶሬኮ ‡ ቢን ኢዚ፥ «ሃች ዋኒ ኤሶን ዩዴቲ?» ጊ ኦይቺዴሰ።

19 ኢሰቲ ዛሬዲ፥ «ኢሲ ጊብጾ ቢታ አዴ ዳይሲ ኦና ሜሄ ሄሚዛይታፕ አሺዴሰ፤ ቃሴካ ኦሰ ሃሌካ ዱቂዲ ኦ ዶርሳታካ ኡሺዴሰ» ጊዳ።

† 2:10 ሙሴ ጉሲ ኢብራዊታ ቃላራ፥ «ኬሶ» ጉሳ።

2:11 ኢብ 11:24

2:14 ሃዋ 7:23-28

2:15 ሃዋ 7:29፤ ኢብ 11:27

‡ 2:18 ኤራጉኤሌይ

ሙሴ ቦሎ ጊዲሺን ኢዛሰ ሃራ ሰንላይ ዮቶሬ ጌቲቴሰ።

20 ሂስቲን ኢዚ ባ ማጫ ናይታ፡ «ሃኢ ኢዚ እዋን ዲዜ? ኢንቲ ሄ ኣዳዘ ኣይሰ ሄን ኣጊዳቲ? ኣኔ ኢዛ ጾይጊቲ፤ ዪዲ ካል ሞ» ጊደሰ።

21 ሙሴይካ ሄ ኣዳዘራ ሄን ዳናሰ ዶሲደሰ፤ ኣዳዘካ ባ ናዮ ጸፖር ሙሴሰ ማቾ ሂስቲ ኢሚደሰ።

22 ጸፖራ ኣዳ ና ዬሊን ሙሴይ ናዛ፡ «ታኒ ኣሳ ቢታን ቤቲ ኣሳ» ጊሼ ጌርሾሜ ጊ ሱንሊደሰ።§

23 ሙሴይ ሚዲያሚ ቢታን ዲዛ ዳሮ ላይላታ ጋርሳን ጊብጼ ካዋይ ሃይቂደሰ። ኢሰራኤሌ ኣሳይ ባ ኣይሌቲላፌ ዴንዲዲይሳን ኦሊዳኔ ዋሲዳ፤ ኣይሌቲላ ዋይይ ዳሪን ኢሰቲ ዋሲዳ ዋሶይ ፑዴ ጸሳኮ ጋኪደሰ።

24 ጸሲ ኢሰታ ኦሌዛኔ ኢሰታ ዋሶዛ ሲዪዲ ኢዚ ኣብራሃሚራ፡ ዪሳቃሪኔ ያቆቤራ ጫቂዳ ጫቆ ቃላ ዩሺ ቆፒደሰ።

25 ሄሳ ጊሻሰ ጸሲ ኢሰራኤሌ ናይታ ጸሊዲ ኢሰታ ሃኖቴል ቆፒደሰ።

### 3

#### ሙሴ ጾይጊቲል

1 ሙሴይ ሚዲያሚ ቢታ ቄሴ፡ ባ ቦሎ ዮቶሬ ዶርሳታ ሄሚሰ፤ ኢዚ ዶርሳታ ላጊ ኤኪ ቢዲ ባዞ ቢታ ጋጸ ጋካናሰ ኤፌዲ ሲና ጌቲቲዛ ጸሳ ዙማኮ ጋኪደሰ። \*

2 ሄን ጸሳ ኪታንታይ ቄሪ ዋራ ጊደን ኤጲዛ ታማ ላጮ ጊደን ኢዛሰ ቤቲደሰ፤ ዋራ ጊደን ታማ ላጮይ ዲኮካ ታማይ ዋራ ሞንታይሳ ሙሴይ ቤኢደሰ።

3 ሄሳ ጊሻሰ ሙሴይ፡ «ታኒ ጌዴ ባዳ ኣይሰ ዋራይ ታማን ሜቲቶንታኮ ሃይሳ ኦራላ ሚሽ ኣኔ ቤያይሰ» ጊ ቆፒደሰ።

4 ኢዚ ቤያናሰ ጌዴ ቢሺን ጸሲ ቤኢዲ ዋራ ጊደን ዲሼ ኢዛ፡ «ሙሴ! ሙሴ!» ጊ ጾይጊደሰ። ሙሴይካ፡ «ዬ!» ጊ ኮዪደሰ።

5 ጸሲ ኢዛ፡ «ሃ ሺቆፓ፤ ኔኒ ኤቂዳሶይ ጌሽ ጊዲዳ ጊሻሰ ኔ ቶሆን ዲዛ ጫማ ኬሳ» ጊደሰ።

6 ቃሴካ ጸሳይ ኢዛ፡ «ታኒ ኔ ኣዋታ ኣብራሃሚ፡ ዪሳቃኔ ያቆቤ ጸሳ» ጊደሰ። ሂስቲን ሙሴይ ጸሳ ጸላናሰ ባቢዳ ጊሻሰ ባ ኣይፌሶ ካሚደሰ።

§ 2:22 ጌርሾሚ ጉሲ ኢብራዌታ ቃላራ፡ «ቤቲ ኣሰ» ጉሳ። 2:24 ሜዴ 15:13-14 \* 3:1 ሲና ጌቲቲዛይሲ ሃራሶሆን ኮሬቤ ጌቲቲ ጾይጊቲል።

7 ቃሴካ ጎዳይ፥ «ታኒ ጊብጾ ቢታን ታ አሳይ ዋዪዛ ዋዬ ሎኤላ ቤያዳ፥ ኢሰቲ ባ ጎዳታፔ ዴንዲዳይሳን ዋሲዛ ዋሶ ሲያዲሲኔ ኢሰታ ዋዬ ኤራዲሰ።

8 ሄሳ ጊሻሰ ታኒ ኢሰታ ጊብጾ ቢታ አሳታ ኩሼፔ አሻናሲኔ ሄ ቢታፌ ኢሰታ ኬሳዳ፥ አሆኔ ሎኦ ቢታ ኤፋናሰ ሃ ዲጌ ዋዳዲሰ። ሄ ቢታይ ማሊኔ ኤሲ ጎጊዛ ቢታ፤ ሃኢ ሄ ቢታን ካናኔቲ፥ ሂቲቲ፥ አዋሬቲ፥ ፓሪዜቲ፥ ሂዌቲኔ ያቡሴታ ጌቲቲዛ አሳቲ ዴቲሰ።

9 ሃኢ ኢሰራኤሌ ናይታ ዋሶይ ታኮ ጋኪዴሰ፤ ጊብጾ ቢታ አሳቲ ኢሰታ ቆሂዛ ቆሆካ ታ ቤያዲሰ፤

10 ሄሳ ጊሻሰ ሃኢ ባ፤ ታ አሳታ፥ ኢሰራኤሌ ናይታ ጊብጾፔ ኬሳና ማላ፥ ጊብጾ ካዋዛኮ ታኒ ኔና ኪታይሰ» ጊዴሰ።

11 ጊዶ አቲን ሙሴይ ጸሳሰ፥ «ካዋዛኮ ባናሲኔ ኢሰራኤሌ ናይታ ጊብጾፔ ኬሳናሰ ታኒ ኦኔ?» ጊዴሰ።

12 ጸሲካ ኢዛ፥ «ታኒ ኔናራ ጊዳና፤ ቃሴ ታኒ ኔና ኪቲዳይሳሰ ማላታይ ሃይሳ፤ ኔኒ ሄ አሳ ጊብጾፔ ኬሲዳ ዋዴ ሃይሳ ዙማ ቦላን ኢንቲ ታሰ ጸሳሰ ጎይናና» ጊዴሰ።

13 ሙሴይ ጸሳሰ፥ «ጊዶ አቲን ታኒ ኢሰራኤሌ ናይታኮ ባዳ ኢሰታሰ፥ «ኢንቲ አዋታ ጸሲ ታና ኢንቲኮ ኪቲዴሰ» ጊኮ፥ ኢሰቲ ታና፥ «ኢዛ ሱንፊ ኦኔ?» ጊ ኦይቺኮ ሄ ዋዴ ታኒ ኢሰታሰ አይ ጋ ዮታኔ?» ጊዴሰ።

14 ጸሲካ ሙሴሰ፥ « «ታኒ ታናኮ፤ ሄሳ ጊሻሰ ካሴካ ሃኢካ ዲዛ ጸሲ ታና ኢንቲኮ ኪቲዴሰ» ጋዳ ዮታ» ጊዴሰ።

15 ቃሴ ጸሲ ሙሴሰ፥ «ኔኒ ኢሰራኤሌ ናይታሰ፥ ሳዳይ ኢንቲ አዋታ አብራሃሜ፥ ዪሳቃኔ፥ ያቆቤ ጸሲ ኢዚ ታና ኢንቲኮ ኪቲዴሰ» ጋ ዮታ፤ ሃይሲ ዬሌታፔ ዬሌታ ጋካናሰ ታኒ ኤሬቲዛ ታ ሱንሳ።

16 «ሄ ባዳ ኢሰራኤሌ ጨማታ ሺሻዳ ጎዳ ኢንቲ አዋታ አብራሃሜ፥ ዪሳቃኔ ያቆቤ ጸሲ ታሰ ቆንጨዲ፥ «ታኒ ኢንቲኮ ያዲሰ፤ ጊብጾን ኢንቲ ቦላ ኢዚ ኦሴቲዳኮ ታኒ ቤያዲሰ።

17 ታኒ ኢንቲና ጊብጾ ቢታ ዋዬፔ ኬሳዳ ፑዴ ማሊኔ ኤሲ ጎጊዛ ካናኔታ፥ ሂቲታ፥ አዋሬታ፥ ፓሪዜታ፥ ሂዌታኔ ያቡሴታ ቢታ ኤፋና ጋዲሰ» ጊዴሰ» ጋዳ ዮታ።

18 «ኢሰራኤሌ ጨማቲ ኔ ቃላ ሲያና፤ ሄሳፌ ጉዬ ኔኒኔ ሄ ጨማቲ ጊብጾ ካዋዛኮ ቢዲ ኢዛሰ፥ ሳዳ ኢብራዊታ ጸሳይ ኑሰ ቆንጨዴሰ። ሃኢ ኑኒ ሄቩ ጋላሳ ኦጌ ባዘ ቢዲ ጎዳሰ ኑ ጸሳሰ ያርሾ ያርሻና ማላ ኑና ዬዳ» ጊቲ።

19 ጊደ አቲን ታ ዋልቃራ ዩዲሶንታ ዲሺን ጊብጼ ካዋይ አንቴና ዩደንታይሳ ታኒ ኤራይስ።

20 ሄሳ ጊሻሰ ታኒ ታ ኩሼ ዩዲዳ ኢስታ ጊደን ታኒ ኦሊዛ ታ ማላታታ ኡባን ጊብጼ አሳ ሾጫና። ሄሳፌ ጉዬ ኢዚ አንቴና ዩዲና።

21 «አንቴ ኬኢዛ ዋዴ ጊብጼ አሳይ አንቴሰ ኪያና ማላ ታ ኦላና ጊሻሰ ኬኢሼ ሜላ ኩሼ ኬኤኬታ።

22 ኢብራዌ ማጫሳቲ ዉሪ ባ ጉታ ጊብጼ ማጫሳታኔ ባ ሶን ዲዛ ጊብጼ ማጫሳታ ኦናኮካ ጊዲን ቢዲ ቢራ፥ ዋርቃኔ አዴ ናይቲኔ ማጫ ናይቲ ማይኦና ማይኦታ፥ ሐሚቲ፥ ጊ ኦይቻና። ሄሳሉ ኦሊዲ አንቴ ጊብጼ አሳ አቆ ኡባ ቡሪ ኤቢዲ ኬዛና» ጊዴስ።

## 4

### ጸሲ ሙሴስ አሚዳ ጊታ ዋልቃ

1 ሙሴይካ ጎዳስ፥ «ኢስቲ ታና አማኖንታ ኢጲኮ ዋይኮ ታኒ ዮቲዛይሳ ሲዮንታ ኢጲዲ፥ ጎዳይ ኔስ ቆንጨቤና» ጊኮ ታ ዋና?» ጊዴስ።

2 ጎዳይ ኢዛ፥ «ሄሲ ኔ ኩሼን ዲዛይ አዜ?» ጊ ኦይቹዴስ። ኢዚካ፥ «ጉፊኮ» ጊዴስ።

3 ጎዳይካ ኢዛ፥ «አኔ ኢዛ ጋዴን ዩጋ» ጊዴስ። ሙሴይ ሄ ጉፊዛ ጋዴን ዩጊን ሾሽ ጊዲዴስ፤ ሂስቲን ሙሴይ ኢዛፔ ዋጺ ከቹዴስ።

4 ሄሳፌ ጉዬ ጎዳይ ኢዛ፥ «ኔ ኩሼ ዩዲዳ ሾሻ ጎይና ኦይካ» ጊዴስ። ሙሴይ ዩዲዲ ሾሻ ጎይና ኦይኪን ሾሻዚ ኢዛ ኩሼን ሲሚዲ ጉፌ ጊዲዴስ።

5 ጎዳይ፥ «ሃይሲ ሃኒዳይሲ ኔ አዋታ ኣብራሃሜ፥ ዩሳቃኔ ያቆቤ ጸሲ ኔስ ቆንጨዳይሳ ኢስቲ አማናና ማላሳ» ጊዴስ።

6 ቃሴካ ጎዳይ ኢዛ፥ «ኔ ኩሼ ኔ ሾጳ ጊደ ጌልላ» ጊን ሙሴይ ባ ኩሼ ባ ሾጳ ጊደ ጌልላዴስ፤ ኢዚ ባ ኩሼዛ ሾጳፌ ኬሲዛ ዋዴ ኩሼዚ ቃራቲዲ ሻቻ ማላ ቦጺዴስ።

7 ጎዳይ ኢዛ፥ «ኔ ኩሼ ኔ ሾጳ ጊደ ዛራ ጌልላ» ጊዴስ። ሂስቲን ሙሴይ ባ ኩሼ ባ ሾጳ ጊደ ዛሪ ጌልላ ኬሲዛ ዋዴ ኢዛ ኩሼይ ሲሚዲ ሃንኮ ቦላ ማላ ጊዲዴስ።

8 ቃሴካ ጎዳይ ኢዛስ፥ «ኢስቲ ኔና አማኖንታ ኣጊኮ ኮይሮ ማላታ አማኖንታ ኢጲኮ፥ ናምኣንሶዛ አማናና።

9 ጊዶ አቲን ኢሰቲ ጸሲ ኦሊዛ ሃ ናምኡ ማላታታ አማኖንታ ኣገኦ ወይኮ ኔኒ ዮቲዛይሳ ሲዮንታ ኢጲኮ፥ ናይሌ ሻፋፔ ሃላ ዱቃ ኤካዳ ቢታ ቦላ ጉሳ፤ ኔኒ ሻፋፔ ኤኪዳ ሃላ ቢታ ቦላ ሱላ ጊዳና» ጊደሰ።

10 ጊዶ አቲን ሙሴይ ጎዳሰ፥ «ኣቤት ጎዶ! ታኒ ሃይሳፌ ካሴካ፥ ወይኮ ኔኒ ኔ ኣይሌዛሰ ታሰ ዮቶሶፔ ሃ ሲሚንካ ታኒ ሎኤላ ሃሳያናሰ ዳንዳዮንታ ኣሰ ጊዲኪና?» ጊደሰ።

11 ጎዳይ ኢዛሰ፥ «ኣሳሰ ዶና ሜጲዳይ ኦኔ? ኣሰ ዱዴ፥ ወይኮ ቱሌ ኦሊዛይ ኦኔ? ጸላኔ ቆቄ ኦሊዛይ ኦኔ? ታና ጎዳ ጊዲኪና?»

12 ኔኒ ሃኢ ባ፤ ኔ ሃሳያና ማላ ታ ኔናራ ጊዳናኔ ኔና ማዳና፤ ኔኒ ዮታናይሳካ ታ ኔና ታማርሳና» ጊደሰ።

13 ጊዶ አቲን ሙሴይ ጎዳ፥ «ኣቤት ጎዶ! ሃይሳ ኦፋናሰ ሃራ ኣሰ ኪታርኪ!» ጊደሰ።

14 ሄሳፌ ጉዬ ጎዳይ ሙሴ ቦላ ኬሂ ሃንቄቲዲ ኢዛ፥ «ለዌ ባጋፌ ጊዲዳ ኔ ኣሻ ኣርኔይ ዴሰ ጊዴኔ? ኢዚ ሎኦ ሃሳያና ዳንዳይዛይሳ ታኒ ኤራይሰ፤ ሃኢ ኢዚ ኔናራ ጋጋናሰ ዪሼ ኦኔ ቦላን ዴሰ፤ ኢዚ ኔና ቤኢዲ ኡፋዬታና።

15 ኔኒ ኢዛሰ ዮታ፤ ኢዚ ዮታና ቃላካ ኔ ኢዛ ኤሪሳ፤ ታኒ ኢንቴና ናምኣታካ ሃሳያን ማዳናኔ ኢንቴ ኦፋናይሳ ታማርሳና።

16 ኢዚ ኣሳሰ ኔ ጊሻሰ ዮታና፤ ሄሲካ ኢዚ ኔሰ ኔ ዶና ማላ ጊዲን ኔ ኢዛሰ ሃሳይዛ ጸሳ ማላ ጊዳና ጉሳ።

17 ማላታታ ኢዛን ኦፋናሰ ኔኒ ሃይሳ ጉፌዛ ኤካ» ጊደሰ።

### ጊብጼ ሙሴ ሲሞ

18 ሄሳፌ ጉዬ ሙሴይ ባ ቦሎ፥ ዮቶሬኮ ሲሚ ቢዲ፥ «ሃኖ ጋካናሰ ኣሳይ ፓጸ ዲዛኮ ቤያናሰ ታኒ ጉዬ ታ ኣሳኮ ጊብጼ ቦ?» ጊደሰ። ዮቶሬይካ ሙሴ፥ «ኤ ባ፤ ሳሮን ጋካ» ጊደሰ።

19 ሙሴይ ሚዲያሜ ቢታን ዲሺን ጎዳይ ኢዛ፥ «ኔና ዎፋናሰ ኮዪዳ ኣሳቲ ዉሪ ሃይቂዳ ጊሻሰ ጉዬ ጊብጼ ቢታ ሲማ ባ» ጊደሰ።

20 ሙሴይ ባ ማቺዮኔ ባ ኣቱማ ናይታ ሃሬ ቶጊሲ ኤኪዲ ጉዬ ጊብጼ ሲሚሼ ጸሳ ጉፌ ኦይኪ ቢደሰ።

21 ጎዳይ ሙሴ፥ «ኔኒ ጊብጼ ሲማዳ ቢዛ ዎዴ ታኒ ኔሰ ኢሚዳ ዎልቃን ኔኒ ኦፋና ማላታታ ኡባ ጊብጼ ካዎ ፓሮኔ ሲንፋን ኔኒ ኦፋናይሳ ባሎፓ። ሂሰቲንካ ኢዚ ኣሳ ዬዶንታ ማላ ታኒ ኢዛ ዎዚና ሙሚሳና።

22 ሄ ዋዴ ታኒ ጎዳይ ገዛይሳ ካዋሰ፡ ኢሰራኤልይ ታሰ ባይራ ና፤

23 ታ ናዚ ታሰ ጎይናናሰ ኔ ዬዳና ማላ ታኒ ኔሰ ዮታዲሰ ሺን ኔኒ ኢዛ ዬዳንታ ኢጸዳሳ፤ ሄሳ ገሻሰ፡ «ታኒ ኔሰ ባይራ ናዛ ዋዳና» ገዴሰ ጋዳ ዮታ» ገዴሰ።

24 ኦጌ ቦላ ኢማሊ ሸምፒዛሶን ጎዳይ ሙሴራ ጋገዲ ኢዛ ዋዳናሰ ኮዪዴሰ።

25 ኢዛ ማቺያ ጸፖራይ ቃራ ሹቕ ኤካዳ ባ ናዛ ቃጸራዱሰ። ቃጸራዳ ሄ ሹርቴዛ ሙሴ ቶሆ ቦቻዳ ሙሴ፡ «ኔኒ ታሰ ቱሙ ሱላ ሚሺራ» ጋዱሰ። \*

26 ሄሳ ገሻሰ ጎዳይ ኢዛ ዋዳንታ ኣገዴሰ። ሄ ዋዴ ቃጸራ ጋሶን ኢዛሰ፡ «ኔኒ ታሰ ሱላ ሚሺራ» ጋዱሰ።

27 ጎዳይ ኣሮኔ፡ «ኔኒ ሙሴራ ጋጋናሰ ባዞ ባ» ጌን ኢዚ ቢዲ ሙሴራ ጸሳ ዙማ ቦላ ጋገዲ ኢዛ ዬሪዴሰ።

28 ሄሳፌ ጉዬ ሙሴይ ጎዳይ ባ ቦላ ከቲዳ ቃላ ኡባ ቃሴካ ኦፋና ማላ ባና ኣዛዚዳ ማላታታ ኡባ ኣሮኔሰ ዮቲዴሰ።

29 ሙሴይኔ ኣሮኔይ ቢዲ ኢሰራኤል ጨማታ ኡባ ኢሲ ቦላ ሺሺዳ።

30 ኣሮኔይ ጎዳይ ሙሴሰ ዮቲዳ ቃላ ኡባ ኢሰታሰ ዮቲዴሰኔ ማላታታ ሄ ኣሳ ሲንሳን ኦሊዴሰ።

31 ኢሰቲካ ኣማኒዳ። ጎዳይ ኢሰታኮ ዪዳይሳኔ ኢሰታ ዋዬ ቤኢዳይሳ ሲዪዳ ማላ ቢታ ቦላ ጉፋኒ ጎይኒዳ።

## 5

### ጌብጹ ካዋ ሲንሰ ሙሴኔ ኣሮኔ ሺቆ

1 ሄሳፌ ጉዬ ሙሴይኔ ኣሮኔይ ጌብጹ ካዋዛኮ ቢዲ ኢዛሰ፡ «ጎዳይ፡ ኢሰራኤል ጸሲ፡ «ታ ኣሳይ ታሰ ባዞን ባኣሌ ቦንቻና ማላ ዬዳ» ገዴሰ» ገዳ።

2 ሂሰቲን ካዋዚ፡ «ታኒ ኢዛሰ ኣዛዜታዳ ኢሰራኤል ዬዳናሰ ሄ ጎዳይ ኢዚ ኦኔ? ታኒ ጎዳ ኤሪኬ፤ ኢሰራኤላካ ዬዲኬ» ገዴሰ።

3 ሄሳፌ ጉዬ ሙሴይኔ ኣሮኔይ፡ «ኢብራዌታ ጸሲ ኦናራ ጋገዴሰ። ሃኢ ኦኒ ጎዳሰ፡ ኦ ጸሳሰ ያርሾ ያርሻናሰ ሄዙ ጋላሳ ኦጌ

\* 4:25 ሱላ ሚሺራ ገዛይሰ ሙሴ ማቻ ሙሴይ ሃይቆንታ ማላ ናዛ ቃጸራዳ ሱላን ሙሴ ቦቺን ሙሴይ ሃይቆፔ ኣቲዳይሳ ቤሴሰ።

ባዘ ጊደ ባናስ ኑና ዩዳርኪ! ሂሰቶንታ ኣጊኮ ኢዚ ኑና ኢታ ሃርጌን ወይኮ ኦላን ዋቋና» ጊዳ።

<sup>4</sup> ጊደ ኣቲን ጊብጼ ካዎይ፡ «ኢንቴኖ! ሙሴ! ኣርኔ! ኣሳ ኣይሰ ኦሶ ዲጌቲ? ሲሚዲ ኢንቴ ኦሶሰ ቢቴ» ጊዳስ።

<sup>5</sup> ካዎዚካ፡ «ሂኮ ቤኢቲ፡ ሃ ቢታን ኣሳይ ጮራቲዳስ፤ ቃሴ ኢንቴ ኣሳ ኦሶ ዲጌታ» ጊዳስ።

<sup>6</sup> ሄ ጋላስ ካዎይ ኢሰራኤሌ ኣሳ ጋርሳፌ ኣሳ ኦሲሲዛይታኔ ኢሰታፌ ቦላራ ዲዛ ጊብጼ ሃላቃታ ሂዝጊ ኣዛዚዳስ።

<sup>7</sup> «ሃራ ዋዴይሳ ማላ ጸቤ ኦሊዛ ኡቱላ ኣሳስ ኤሂ ኢዋፍቴ፤ ኢሰቲ ኡቱላ ባፔ ኮዩዲ ሺሼቶ፤

<sup>8</sup> ጊደ ኣቲን ኢሰቲ ቆዳን ካሴይሳ ጊና ጸቤ ሜዲዲ ሸቋና ማላ ኣዛዚቴ፤ ካሴ ቆዳፔ ፓጨሶፒቴ፤ ኣይሰ ጊኮ ኢሰቲ ኣዛላ፤ ኢሰታስ፡ ሓኒ ኑ ጸሳስ ያርሾ ያርሻና ማላ ኑና ዩዳ» ጊዲ ዋሲዛይ ሄሳሳ።

<sup>9</sup> ኢሰቲ ኦሶን ሸካና ማላኔ ዋርዶ ሃሳያ ሲዮንታ ኣጋና ማላ ኢሰታስ ኦሶ ዴዴላቴ» ጊዳስ።

<sup>10</sup> ሄሳፌ ጉዬ ኢሰራኤሌ ኣሳ ጋርሳፌ ኣሳ ኦሲሲዛይቲኔ ኢሰታፌ ቦላራ ዲዛ ጊብጼ ሃላቃቲ ኬዚዲ ኣሳስ፡ «ካዎዚ፡ ሃይሳፌ ጉዬ ታ ኢንቴስ ኡቱላ ሙሌካ ኢሚኬ።

<sup>11</sup> ኢንቴ ኡቱላ ዴማና ዳንዳይዛሶፔ ኢንቴ ባጋራ ኮዩ ኤሂቲ ሸን ኢንቴ ካሴ ሸዲዛ ጸቤ ቆዳይ ሙሊካ ፓጮፎ» ጊዳስ» ጊዳ።

<sup>12</sup> ሂሰቲን ኣሳይ ኡቱላ ሸሻናስ ጊብጼ ቢታ ኡባን ላሌቲዳስ።

<sup>13</sup> ጊብጼ ሃላቃቲ ኢሰታስ፡ «ካሴ ኢንቴስ ኡቱላ ኢሚዛ ዋዴ ኢንቴ ሃች ሃች ኦሊዛይሳ ማላ ኦሊቴ» ጊዲ ኢሰታ ቦላ ጎዳቲዳ።

<sup>14</sup> ኢሰራኤሌ ናይታ ኦሲሲዛይታስ ዋና ሃላቃቲ፡ «ኢንቴ ካሴ ኦሊዛይሳ ማላ ጸቤ ቃማ ወይኮ ሃች ኣይሰ ኦሊ ዉርሲቤኬቲ?» ጊ ኦይቺዲ ዋዲዳ

<sup>15</sup> ሄሳፌ ጉዬ ኢሰራኤሌ ናይታፔ ዶሪቲዲ ኣሳ ኦሲሲዛይቲ ቢዲ ካዋዛስ ዋሲዳ፤ ኢሰቲ ኢዛስ፡ «ኮኒ ኔ ኣይሌታ ጊዲሺን ኑ ቦላ ሃይሳሶ ኣዛስ ኦሳይ?

<sup>16</sup> ኔ ኣይሌታስ ኑስ ኡቱላ ኢሜቴና፤ ጊደ ኣቲን፡ «ጸቤዛ ሜዲቴ» ጊዲ ኑና ኔ ኣይሌታ ዋዴቴስ ሸን ባላይ ኔ ኣሳ ቦላ ዴስ» ጊዳ።

<sup>17</sup> ጊደ ኣቲን ካዎዚ ኢሰታ፡ «ሃ ኣዛላቲ! ኢንቴ ኣዛላታ! ሄሳ ጊሻሳ ኢንቴ ዛሪ ዛሪዲ፡ ሓኒ ጎዳስ ያርሻናስ ባና ኑና ዩዳ» ጌታ።

18 ሃኢ ቢዲ ኦሊቴ፤ ኢስቲ አንቴስ ኣይኮ ጋላባካ ኢሜቴና፤ ጊዶ ኣቲን አንቴ ካሴይሳፊ ፓጪሶንታ ደቤዛ ሜዲቴ» ጊደስ።

19 ኢሰራኤል ናይታፔ ዶሬቲዲ ኣሳ ኦሲሲዛይቲ፡ «አንቴ ሃች ሃች ሜዲዛ ደቤ ቆዳ ካሴይሳፊ ፓጪሶፒቴ» ጊዶ ጊን ኢስቲ ሜቶን ጌሊዳይሳ ኤሪዳ።

20 ኢስቲ ካዎዛ ሲንሳፊ ኬዚዲ ሙሴይኔ ኣሮኔይ ኢስታራ ጋጋናስ ናጊዛይታ ዴሚዳ።

21 ኢስቲ፡ «ጸሲ አንቴና ጸሎ! አንቴ ቦላ ኢዚ ፒርዶ! አንቴ ኑና ካዎኒኔ ኢዛ ኦሳንቻታን ኢዲሲዴታ፤ ቃሴ ኢስቲ ኑና ዋዳና ማላ፡ ማሻ ኢስታስ ኢሚዴታ» ጊዳ።

### ጸሳስ ሙሴ ማጋና

22 ሙሴይ ጎዳኮ ሲሚዲ፡ «ጎዶ፡ ኔኒ ሃ ኣሳ ቦላ ሜቶ ኣይስ ኤሃዲ? ኔኒ ታና ከቲዳይ ሃይሳሴ?

23 ታኒ ኔ ሱንላን ካዋስ ሃሳያናስ ቢዳ ዋዴፔ ዶሚን ኢዚ ሃ ኣሳ ቦላ ሜቶ ኤሂዴስ። ቃሴ ኔኒካ ኔ ኣሳ ሙሉ ኣሻቤካ» ጊደስ።

## 6

1 ሄሳፊ ጉዬ ጎዳይ ሙሴስ፡ «ታኒ ጊብጾ ካዎ ቦላ ኦላናይሳ ኔኒ ሃኢ ቤያና፤ ታ ዋልቃማ ቄሴ ጋሶን ኢዚ ኢስታ ዬዳና፤ ታ ዋልቃማ ቄሴፔ ዴንዲዳይሳን ኢዚ ኢስታ ባ ቢታፊ ኬሲ ጎዳና» ጊደስ።

### ሙሴ ጸይጌቴስ

2 ጸሲ ቃሴካ ሙሴስ፡ «ታኒ ጎዳ፤

3 ታኒ ኡባ ዳንዳይዛ ጸሳ ጊዳዳ ኣብራሃሜስ፡ ዪሳቃሲኔ ያቆቤስ ቆንጫዲስ ሺን ታኒ፡ ሳዳ) ጌቴቲዛ ታ ሱንላን ታናቴላ ኢስታ ኤሪሳቤኬ።

4 ቃሴ ታኒ ኢስታስ ኢስቲ ቤቴ ጊዲዲ ዴኢዳ ካናኔ ቢታ ኢስታስ ኢማናስ ታ ኢስታራ ጫቄታዲስ።

5 ቃሴካ ጊብጾ ኣሳይ ኣይሌ ሂስቲ ዋዪሲዳ ኢሰራኤል ናይታ ዋሶ ሲያዳ ታ ጌሊዳ ጫቆ ቃላ ቆፓዲስ።

6 «ሄሳ ጊሻስ ኔኒ ኢሰራኤል ናይታስ፡ ታኒ ጎዳ፤ ታኒ አንቴና ጊብጾ ኣሳ ቆሆፔ ኬሳና፤ ታኒ አንቴና ኢስታ ኣይሌቴላፊካ ጎቻ ኬሳና፤ ቃሴ ታኒ አንቴና ታ ጊታ ዋልቃኒኔ ዴማ ዴማ ፒርዳን ዋዛና።

7 ታኒ አንቴና ታ ዳሬ ሂሰታና፤ ታኒ አንቴ ጸሳ ገዳና። ሄ ዋዴ ታ አንቴና ገብጼ ኣሳ ኣይሌቴፋፌ ኬሲዳ አንቴ ጎዳ ሜርና ጸሳ ገዲዳይሳ አንቴ ኤራና።

8 ቃሴ ታኒ አንቴና ኣብራሃሜስ፥ ዩሳቃሲኔ ያቆቤስ አማና ጋዳ ታ ኩሼ ዳንፋዳ ጫቂዳ ቢታ ኤሃና፤ ሄ ቢታ ታኒ አንቴስ አንቴ ጋዴ ሂሰታ አማና፤ ታኒ ጎዳ ጋ» ገዴስ።

9 ሙሴይ ሄሳ ኢሰራኤሌ ናይታስ ዮቲዴስ ሺን ኢሰቲ ኡፋይስ ቃንጺዳ ገሻሲኔ ኢታ ኣይሌቴፋፌ ዳንዲዳይሳን ኢሰታ ዋዚናይ ሜቂዳ ገሻሲ ኢሰቲ ኢዛ ቃላ ሲዩቤቴና።

10 ሄሳፌ ጉዬ ጎዳይ ሙሴ፤

11 «ሄ ባዳ ገብጼ ካዋስ፥ «ኢሰራኤሌ ናይታ ኔ ቢታፌ ኬሳ ዩዳ» ጋዳ ዮታ» ገዴስ።

12 ገደ ኣቲን ሙሴይ ጎዳስ፥ «ኢሰራኤሌ ናይቲ ታይሳ ሲዮንታ ኢጺዳ ሺን ታኒ ዶናይ ቢርሾንታ ኣስ ገዲሺን ካዋይ ታ ገዛይሳ ዋስቲ ሲያኔ?» ገዴስ።

13 ጎዳይ ሙሴኔ ኣርኔ፥ «ቢዲ አንቴ ኢሰራኤሌ ኣሳ ገብጽፔ ኬሳና ማላ ታኒ አንቴና ዩዲዳይሳ ኢሰራኤሌ ኣሳሲኔ ገብጼ ካዋስ ዮቲቴ» ገ ኣዛዚዴስ።

### ሙሴኔ ኣርኔ ዜሬፋታ

14 ሃይሳፌ ካሊ ዲዛይቲ ኢሰታ ኬላ ኬላ ሃላቃታ። ኢሰራኤሌስ ባይራ ና ኦርቤሌ ኣቱማ ናይቲ፥ ሄኖኬ፥ ፓሉ፥ ሄጺርሜኔ ካርሜ፤ ሃይታንቲ ኦርቤሌ ቆሞታ። ኢሰታ ሶ ኣሳታ ሃላቃቲ ሃይታ።

15 ቃሴ ሲሞና ኣቱማ ናይቲ፥ ዩሙኤሌ፥ ያሚኔ፥ ኦሃዴ፥ ያኪኔ፥ ጸሃሬኔ ካናኔ ቢታ ማጫሳታፔ ዩሌቲዳ ሳኦሌ፤ ሃይቲ ሲሞና ቆሞታ።

16 ሌዌ ባጋቲ ባ ዩሌታ ማራ ማላ ጌርሾኔ፥ ቃኣቴኔ ሜራሬ። ሌዌይ 137 ላይሰ ዳኢዴስ።

17 ጌርሾኔ ኣቱማ ናይቲ ባ ቆሞን ቆሞን ሊቢናኔ ሺሞኤ ጌቴቲስ።

18 ቃሄቴ ኣቱማ ናይቲ ኣሚራሜ፥ ዩጺሃሬ፥ ኬብርኔኔ ኡዚኤሌ። ቃኣቴይ 133 ላይሰ ዳኢዴስ።

19 ሜራራ ኣቱማ ናይቲ ማሂሌኔ ሙሼ ጌቴቲዛይታ።

ባ ዩሌታ ማራን ሌዌ ዛሬቲ ሃይታንታ።

20 ኣሚራሜይ ባ ኣዋ ሚቹዮ ዮካቤዶ ማቾ ኤኪዴስ። ኢዛካ ኢዛስ ኣርኔኔ ሙሴ ዩላዲስ። ኣሚራሜይ 137 ላይሰ ዳኢዴስ።

21 ዪዲሃሪ ኣቱማ ናይቲ፥ ቆሬ፥ ኔፊጌኔ ዚኪሬ።

22 ኡዚኤሌ ኣቱማ ናይቲ፥ ሚሻኤሌ፥ ኤልጻፋኔኔ ሲቲሬ።

23 ኣሮኔይ ኣሚናዳቤ ናዮ፥ ኔኣሶኔ ሚቹዮ ኤሊሼቦ ማቾ ኤኪዴሰ። ሂሰቲን ኢዛ ኢዛሰ ናዳቤ፥ ኣቢሁ፥ ኤልኤዜሬኔ ኢታማሬ ዬላዲሰ።

24 ቆሬ ኣቱማ ናይቲ፥ ኣሲሬ፥ ሂልቃናኔ ኣቢያሳፊ፤ ሃይታንቲ ቆሬ ቆሞታሰ ኣዋታ።

25 ኣሮኔ ና ኤልኤዜሬይ ፑቲኤሌ ናይታፔ ኢሲኒዮ ማቾ ኤኪዴሰ፤ ኢዛካ ኢዛሰ ፊኒሃሴ ዬላዲሰ።

ሃይታንቲ ባ ቆሞን ቆሞን ሌዌ ኬላ ኣሳ ሃላቃታ።

26 ጎዳይ፥ «ጊብጼ ቢታፊ ኢሰራኤሌ ናይታ ኢስታ ጩጋን ጩጋን ኬሰቲ» ጊዲ ኣዛዚዳይ ሃይታ ሙሴኔ ኣሮኔ።

27 ኢሰራኤሌ ናይታ ጊብጼ ቢታፊ ኬሲዛይሳ ጊብጼ ካዋሰ ዮቲዳይቲ ሙሴኔ ኣሮኔ።

28 ጎዳይ ጊብጼን ሙሴሰ ዮቲዛ ዎዴ ኢዛሰ፥

29 «ታኒ ጎዳ፤ ታኒ ኔሰ ዮቲዛይሳ ኡባ ኔኒ ጊብጼ ካዋሰ ዮታ» ጊዴሰ።

30 ሙሴይ ቃሴ ጎዳሰ፥ «ታኒ ዶናይ ቢርሾንታ ኣሰ ጊዲዳ ጊሻሰ ካዋይ ታኒ ዮቲዛይሳ ዋሰቲ ሲያኔ?» ጊዴሰ።

## 7

1 ሄሳፊ ጉዬ ጎዳይ ሙሴሰ፥ «ቤያ፤ ታኒ ኔና ጊብጼ ካዋሰ ጸሳ ማላ ኦላዲሰ፤ ኔ ኢሻ ኣሮኔይ ኔ ዶና ጊዲዳ ኔ ጊሻሰ ሃሳያና፤

2 ታኒ ኔና ኣዛዚዳይሳ ኡባ ኔ ኢሻ ኣሮኔሰ ዮታንዳሳ፤ ካዋዚ ኢሰራኤሌ ናይታ ባ ቢታፊ ኬሲ ዬዳና ማላ ኢዚ ዮታና።

3 ጊዶ ኣቲን ታኒ ካዋዛ ዋዚና ሚንላና፤ ታኒ ጊብጼ ቢታን ታ ማላታኔ ማላሊሲዛ ሚሽ ዳርሳ ኦሊኮካ፥

4 ኢዚ ኢንቲ ዮቲዛይሳ ሲዬና። ሄ ዎዴ ታኒ ታ ኩሼ ጊብጼ ኣሳ ቦላ ዴንላና፤ ታኒ ታ ዴሬታ ኢሰራኤሌ ናይታ ዎልቃማ ፒርዳን ጊብጼፔ ኬሳና።

5 ቃሴ ጊብጼቲ ታኒ ታ ቄሴ ጊብጼ ኣሳ ቦላ ዴንላና ኢሰራኤሌ ናይታ ኢስታ ጊዶፊ ኬሲዛ ዎዴ ታኒ ጎዳ ጊዲዳይሳ ኢሰቲ ኤራና» ጊዴሰ።

6 ሙሴይኔ ኣሮኔይ ጎዳይ ኢስታ ኣዛዚዳ ማላ ኦሊዳ።

7 ኢሰቲ ካዋዛሰ ዮቲዛ ዎዴ ሙሴሰ ላይላይ ኦስቼን ታማ፤ ኣሮኔይ ቃሴ 83 ላይላ ኣሳ።

### አሮኔ ጉፌይ ሾሽ ጊዳሰ

<sup>8</sup> ጎዳይ ሙሴኔ አሮኔ፤

<sup>9</sup> «ካዎይ እንተና፤ ላኔ ማላታ ታና ቤሲቴ» ጊኮ ኔኒ አሮኔ፤ ላኔ ጉፋ ኤካዳ ካዎዛ ሲንላን ዩጋ፣ ጋ፤ ሂሰቲኮ ኢዚ ሾሽ ጊዳና» ጊዳሰ።

<sup>10</sup> ሂሰቲን ሙሴይኔ አሮኔይ ካዎዛኮ ጌሊዲ ጎዳይ ኢሰታ አዛዚዳ ማላ ኦሊዳ፤ አሮኔይ ባ ጉፌ ካዎዛ ሲንላኔ ዳናታ ሲንላን ዩጊን ጉፌዚ ሾሽ ጊዳዳሰ።

<sup>11</sup> ሄሳፌ ጉዬ ካዎዚ ዳሮ ኤራንቻታኔ ቢቲዛይታ ጸይጊሲን ጊብጾ ዳሬ ማርቲካ ባ ዳሬን ሄሳላ ኦሊዳ።

<sup>12</sup> ኢሰቲ ወሪካ ባ ጉፌ ጉፌ ጋዴን ዩጊን ጉፌቲ ወሪካ ሾሽ ጊዳዳሰ ሺን አሮኔ ጉፌያ ኢሰታ ጉፌታ ኡባ ሚታዱሰ።

<sup>13</sup> ጊዳኮካ ጎዳይ ዮቲዳ ማላ ካዎዛ ዎዚናይ ሚኒዳ ጊሻሰ ኢዚ ኢሰታ ዮኦ ሲዮንታ ኢዲዳሰ።

### ሃላይ ሱላን ላሜቲሰ

<sup>14</sup> ጎዳይ ሙሴሰ፤ «ካዎዛ ዎዚናይ ሙሚን አሳ ኢዚ ዬዶንታ ኢዲዳ ጊሻሰ፤

<sup>15</sup> ካዎዚ ሻፋ ቢዛ ዎዴ ማላዶራ ኔኒ ኢዛኮ ባዳ ኢዛራ ጋጋና ማላ አባዬ ሻፋ ዶናን ኤቃ፤ ሄ ባሼ ሾሻን ላሜቲዳ ጉፌዛ አይካ ኤካዳ ባ።

<sup>16</sup> ኔኒ ኢዛ፤ ሳዳ ኢብራዌታ ጸሳይ ኔና፤ «ባዞን ታሰ ጎይናና ማላ ታ አሳ ዬዳ» ጊዳ ታና ኔኮ ኪቲዳሰ ሺን ሃኖ ጋካናሰ ኔኒ ኤሮ ጋቤካ።

<sup>17</sup> ጎዳይ፤ «ታኒ ጎዳ ጊዳዳይሳ ኔኒ ሃይሳን ኤራና» ጊዳሰ። ታኒ አባዬ ሻፋ ሃላ ታ ኩሼን ዲዛ ጉፌዛን ሾጪኮ ሃላይ ሱላን ላሜታና።

<sup>18</sup> አባዬ ሻፋ ሞሊይካ ሃይቃና፤ ሻፋይካ ጸንቃና፤ ጊብጾቲ ሄ ሻፋ ሃላ ኡያናሰ ዳንዳዬቲና፤ ጋዳ ዮታ» ጊዳሰ።

<sup>19</sup> ጎዳይ ሙሴሰ፤ «ኔኒ አሮኔሰ፤ ላኔ ጉፌ አይካዳ ጊብጾ ሃላታ ቦላ፤ ሻፋታ ቦላ፤ ዛራ ሃላታ ቦላኔ ኤሊዳ ሃሊ ዲዛሶ ኡባ ቦላ ኔ ኩሼ ፒዲሳ» ጋ፤ ኢዚ ባ ኩሼ ፒዲሲኮ ሃሊ ወሪ ሱላን ላሜታና፤ ጊብጾ ቢታ ኡባን፤ ሃራይ አቶሺን፤ ሚላፌኔ ሹቻፌ ዎጪ ኬሲዳ ሃላ ቲጊዛ ሚሻታ ኡባን ሱሊ ኩማና» ጊዳሰ።

20 ሙሴይኔ ኣሮኔይ ጎዳይ ኣዛዚዳ ማላ ኦሊዳ። ካዎዛ ሲንፋኒኔ ዳናታ ሲንፋን ኣሮኔይ ባ ጉፊዛ ዴንፊዲ ሻፋ ሃላ ሾጪን ሃላ ወሪ ሱፋን ላሚቲዴስ።

21 ሄ ሻፋ ሃላ ጊዶን ዲዛ ሞሌቲ ሃይቂዳ፤ ሻፋ ሃላ ኬሂ ጸንቂዳ ጊሻስ ጊብጼ ኣሳይ ኡያናስ ዳንዳይቤና። ጊብጼ ቢታይ ኩሚል ሱል ጸላ ጊዲዴስ።

22 ጊዶ ኣቲን ጊብጼ ማርቲ ባ ቢታን ኢዛሶካ ኦሊዳ፤ ጎዳይ ዮቲዳ ማላካ ካዎዛ ዎዚናይ ሚኒዳ ጊሻስ ሙሴይኔ ኣሮኔይ ዮቲዳይሳ ሲዮንታ ኢጲዴስ።

23 ሄሳፌ ጉዬ ካዎዚ ሄሳስ ኣይኮ ባቦንታ ዲሼ ባ ሶ ሲሚ ቢዴስ።

24 ጊብጼ ኣሳይ ወሪ ኣባዬ ሻፋ ሃላ ኡያናስ ዳንዳዮንታ ጊሻስ፡ ኡዪዛ ሃላ ዴማናስ ኣባዬ ሻፋ ኣቻን ኦላ ቦኪዳ።

25 ጎዳይ ሃላ ሱፋን ላሚን ላቸን ጋላስ ጊዲዴስ።

## 8

### ኦቃርሲ

1 ሄሳፌ ጉዬ ጎዳይ ሙሴ፡ «ጊብጼ ካዎኮ ባዳ፡ ሳዳይ ኔና ሂዘጌስ ጋ፤ ታስ ጎይናና ማላ ታ ኣሳ ዬዳ፤

2 ኔኒ ኢስታ ዬዶንታ ኢጲኮ ታኒ ኔ ቢታ ኡባ ሞሪዛ ኦቃርሲ ዬዳና።

3 ኣባዬ ሻፋን ኦቃርሲ ኩሚ ኣፏዲ ኔ ሶ፡ ኔ ኣቂዛ ሶ፡ ኔ ኣርሳ ቦላ፡ ዳናታ ኬላ ጊዶ ጌላና፤ ኔ ኣሳ ቦላ ኬዛና፤ ኔ ጮጮን ኔ ሙኦቃ ጎንጌታንካ ጌላና።

4 ኦቃርሳቲ ኔ ቦላ፡ ኔ ኣሳ ቦላኔ ዳናታ ኡባ ቦላ ኬዛና፡ ጋዳ ዮታ» ጊዴስ።

5 ሄሳፌ ጉዬ ጎዳይ ሙሴ፡ «ኔኒ ኣሮኔ፡ ሳኔ ጉፊዛ ኤካዳ፡ ሻፋታ ቦላ፡ ዛራ ሃላታ ቦላኔ ኤሊዳ ሃላታ ቦላ ኔ ኩሼ ፒዲሳዳ ኦቃርሲ ጊብጼ ቢታ ቦላ ኬዛና ማላ ኦላ፡ ጋዳ ዮታ» ጊዴስ።

6 ሂስቲን ኣሮኔይ ጊብጼ ሃላታ ቦላ ባ ኩሼ ፒዲሲን ኦቃርሲ ኬዚዲ ጊብጼ ቢታ ማይኢዴስ።

7 ጊዶ ኣቲን ማርቲካ ባንታ ቢታን ጊብጼን ኦቃርሲ ኬዛና ማላ ኢዛሶካ ኦሊዳ።

8 ካዎዚ ሙሴኔ ኣሮኔ ጴይጊሲዲ፡ «ሃይሳ ኦቃርሳ ታፔኔ ታ ኣሳ ቦላፌ ዲጋና ማላ ጎዳ ኢንቲ ዎሲቲ፤ ሂስቲን ጎዳስ ያርሻና ማላ ታኒ ኣሳ ዬዳና» ጊዴስ።

9 ሂስቲን ሙሴይ ካዎዛ፡ «ካዎ ኔስ ቶ! ኦቃርሲ ኔፔኔ ኔ ሶፔ ጳይዲ አባዬ ሻፋን ጸላ አታና ማላ ታኒ ኔስ፡ ዳናታሲኔ ኔ አሳስ ዋሳና ጋላስ ኔ ዮታ» ጊደስ።

10 ሂስቲን ካዎዛ፡ «ዎንቶ ጊደ» ጊደስ።

ሙሴይካ፡ «ጎዳ ኑ ጸሳ ማላይ ኦኒካ ባይንዳይሳ ኔኒ ኤራና ማላ ኔ ጊዳ ማላ አላና።

11 ሄ ኦቃርሳይ ኔፔ፡ ኔ ኬላፌ፡ ዳናታፔኔ ኔ አሳፔ ጳያና፤ ኢስቲ አባዬ ሻፋን ጸላ አታና» ጊደስ።

12 ሙሴይኔ አሮኔይ ካዎ አቻፌ ኬዚዲ ካዎዛ ቦላ ኢዚ ኤሂዳ ኦቃርሳታ ጊሻስ ሙሴይ ጎዳኮ ዋሲደስ።

13 ጎዳይካ ሙሴይ ኦይቺዳ ማላ ኦሊደስ፤ ኦቃርሲ ሶን፡ ካሬኒኔ ዴምባን ዲዛይሲ ዉሪ ሃይቂደስ።

14 ጊብጼ አሳይ ኦቃርሳ ሺሺ ሺሺዲ ኮሪደስ፤ ቢታይካ ጸንቆን ዜቂደስ።

15 ጊዶ አቲን ካዎዛ ጉላ ፔቃ ዴሚዳ ዎዴ ባ ዎዚና ሚንሊደስ፤ ጎዳይ ዮቲዳ ማላካ ኢዚ ሙሴይኔ አሮኔይ ዮቲዳ ዮኦዛ ሲዮንታ ኢዲደስ።

### ጨቺ

16 ሄሳፌ ጉዬ ጎዳይ ሙሴ፡ «ኔኒ አሮኔስ፡ ሳኔ ጉፌዛራ፡ ቢታ ጉዲላ ሾጫ ጋ፤ ኢዚ ሾጪኮ ጊብጼ ቢታ ኡባን ጉዲላይ ጨቺ ጊዳና» ጊደስ።

17 ሂስቲን ኢስቲ ሄሳሉ ኦሊዳ፤ አሮኔይ ባ ጉፌ ኤኪዲ ጉፌዛራ ቢታ ጉዲላ ሾጪን አሳኔ ሜሄ ኡባ ቦላ ጨቺ \* ኬዚደስ። ጊብጼ ቢታን ሃ ጋጸፔ ሄኒ ጋጸ ጋካናስ ጉዲላይ ዉሪ ጨቺ ጊዲደስ።

18 ማሮቲካ ባ ቢታን ኢዛሉ አላናስ ፓጪን ኢስታስ ዳንዳዬቲቤና። ጨቻይ አሳ ቦላኔ ሜሄ ቦላ ኩሚደስ።

19 ማሮቲካ ካዎዛስ፡ «ሃይሲ ጸሳ ኦሶኮ!» ጊዳ። ጊዶ አቲን ካዎዛ ዎዚናይ ሚኒደስ፤ ጎዳይ ጊዳ ማላካ ኢዚ ኢስቲ ዮቲዛይሳ ሲዮንታ ኢዲደስ።

### ቦጺ

20 ጎዳይ ሙሴስ፡ «ዎንታ ማላዶራ ዴንዳዳ፡ ካዎዛ ሻፋ ቢሺን ኢዛራ ጋጋዳ ኔኒ ኢዛ፡ ሳዳይ ታስ ጎይናና ማላ ታ አሳ ዬዳ፤

\* 8:17 ጨቺ ጌቲቲዛይሲ ሃራ ሃራ ቢርሼላታን ሳጺዛ ኡኤ ጌቲቲደስ።

21 ኔኒ ታ አሳ ዬደንታ ኢጲኮ፡ ታኒ ኔ ቦላ፡ ዳናታ ቦላ፡ ኔ አሳ ቦላኔ ኔ ኬላታ ጊዶ ዋልቃማ ቦጼ ዬዳና፤ ጊብጼ አሳ ኬላኒኔ ኢስቲ ዲዛ ቢታ ኡባን ቦጼይ ኩማና።

22 ጊዶ አቲን ታኒ ጎዳይ ሃ ቢታን ዲዛይሳ ኔኒ ኤራና ማላ ሄ ጋላስ ታ አሳይ ዲዛ ጌሴማ ቢታን ቦጼይ ጋኮንታ ማላ ታኒ ቴቃዳ ኢስታ ቢታ ናጋና።

23 ታኒ ኔ አሳፔ ታ አሳ ዱማ ሻካና፤ ሃይሳን ማላታ ዋንቶ ኦላና፤ ጊዳስ ጋዳ ዮታ» ጊዳስ።

24 ሄሳፌ ጉዬ ጎዳይ ጊዳ ማላ ኦሊዳስ፤ ካዋዛ ሶኒኔ ኢዛ ዳናታ ሶን ዳር ዋልቃማ ቦጼይ ኩሚዳስ፤ ኩሚላ ጊብጼ ቢታ ኡባ ኢሲዳስ።

25 ሄ ዋዴ ካዋዚ ሙሴኔ ኣሮኔ ጸይጊሲዲ፡ «ቢቴ፤ ሃይሳ ሃ ቢታን ኢንቴ ጸሳስ ያርሺቴ» ጊዳስ።

26 ጊዶ አቲን ሙሴይ፡ «ሄሲ ሎኦ ዳና፤ ኦኒ ጎዳ ኦ ጸሳስ ሺሺዛ ያርሾቴ ጊብጼ አሳስ ቱና ሚሽ ጊዳና፤ ኦኒ ኢስታ ቱኒሲዛ ያርሾታ ኢስቲ ጸሊሺን ያርሺኮ፡ ኢስቲ ኦና ሹቻን ጫዴቴ?»

27 ኦኒ ጎዳ ኦ ጸሳስ ያርሾታ ሺሻናስ ኢዚ ኦና ኣዛዚዳ ማላ ሄሹ ጋላሳ ኦጌ ባዞ ባናስ ኮሼስ» ጊዳስ።

28 ሂስቲን ካዋዚ፡ «ጎዳ ኢንቴ ጸሳስ ኢንቴ ባዞ ቢዲ ያርሻና ማላ ታኒ ኢንቴና ዬዳና ሺን ኢንቴ ሃኪ ቦፔቴ፤ ሃኢ ታስ ዋሲቴ» ጊዳስ።

29 ሙሴይ፡ «ታኒ ኔ ኣቻፌ ኬዚዳ ማላ ጎዳ ዋሳና፤ ሃ ዋልቃማ ቦጼይ ዋንቶ ካዋዛ፤ ዳናታፔኔ ኢዛ አሳፔ ኪቻና። ጊዶ አቲን ጎዳስ ያርሻናስ አሳ ዬደንታ ኢጸናስ ካዋይ ኦና ዛሪ ጨዋንታ ማላ ቆፖ» ጊዳስ።

30 ሄሳፌ ጉዬ ሙሴይ ካዋዛ ኣቻፌ ኬዚዲ ጎዳ ዋሲዳስ።

31 ሙሴይ ኦይቺዳ ማላ ጎዳይ ኦሊዳስ፤ ቦጼይ ካዋዛ፤ ዳናታፔኔ ኢዛ አሳፔ ኢሲኖካ ኣቶንታ ኪቺዳስ።

32 ጊዶ አቲን ሃኢካ ካዋ ዋዚናይ ሚኒዳ ጊሻስ ኢዚ አሳ ዬደንታ ኢጲዳስ።

## 9

### ሜሄ ቦላ ጋኪዳ ቦሻ

1 ጎዳይ ሙሴ፡ «ጊብጼ ካዋዛኮ ባዳ ጎዳ ኢብራዌታ ጸሳይ ኔና፤ ናታስ ጎይናና ማላ ታ አሳ ዬዳ፤

2 ኔኒ ዬደንታ ኢጲዛ ጊዲኮ፡

3 ሄማቲዛሶን ዲዛ ኔ ማሄታ ቦላ፥ ፓራታ ቦላ፥ ሃራታ ቦላ፥ ጋማላታ ቦላ፥ ሚዛታ ቦላ፥ ዶርሳታ ቦላ፤ ዴቫታ ቦላ ዋልቃማ ሃርጌ ዬዳና።

4 ጌዶ ኣቲን ታኒ ጎዳይ ኢሰራኤል ማሄታ ጌዶኒ ጌብጼ ኣሳ ማሄታ ጌዶን ሻኩቱል ሜቆና። ኢሰራኤል ኣሳ ማሄታፔ ኢሶይካ ሃይቆና፥ ፲» ጌዴሰ።

5 ጎዳይ ዋዴ ባሪዲ፥ «ታኒ ዋንቶ ሃይሳ ሃ ቢታ ቦላ ኦፋና» ጌዴሰ።

6 ዋንቱላ ጋላስ ጎዳይ ሄሳ ኦሊዴሰ። ጌብጼ ኣሳ ማሄይ ወሪ ሃይቂዴሰ ሺን ኢሰራኤል ኣሳ ማሄፔ ኢሰናካ ሃይቃቤኩ።

7 ካዋዚ ሃ ዮኦዛ ፓጫናስ ኣስ ከቲዲ ኢሰራኤል ናይታ ማሄፔ፥ ሃሪይ ኣቶሺን ፔጺ ኢሰናካ ሃይቆንታይሳ ኤሪዴሰ። ጌዲኮካ ካዋዛ ዋዚናይ ሚኒዳሶፔ ሲሞንታ ኢጲዳ ጌሻስ ኣሳ ዬዶንታ ኢጲዴሰ።

### ኪጸ ሃርጌ

8 ሄሳፌ ጉዬ ጎዳይ፥ ሙሴ ኣርኔ፥ «ኩሼ ኩንሊዲ ጮጮፔ ቢዲንላ ኩጪ ኤኪዲ ሙሴይ ካዋዚ ጼሊሺን ሄሳ ፑዴ ጫርኮ ቦላ ላሎ፤

9 ሃይሲ ጌብጼ ቢታ ኡባ ቦላ ጉዲላ ጌዳና፤ ጌብጼ ቢታ ኡባን ኣሳ ቦላ፤ ማሄ ቦላ ኪጸይ ዋቆና» ጌዴሰ።

10 ሂሰቲን ኢሰቲ ጮጮፔ ቢዲንላ ኤኪዲ ካዋዛ ሲንላን ኤቂዳ፤ ሙሴይ ሄሳ ፑዴ ጫርኮን ላሊን ኣሳ ቦላ፤ ማሄ ቦላ ጌዲዛ ኪጸይ ኬዚዴሰ።

11 ማርቲካ ኢሰታ ቦላ፤ ጌብጼ ኣሳ ኡባ ቦላ ዋቂዳ ኪጸይ ኤቆ ዲጊን ሙሴ ሲንላን ኤቃናስ ዳንዳይቤቴና።

12 ጌዶ ኣቲን ጎዳይ ሙሴስ ጌዳ ማላካ ካዋዛ ዋዚና ሚንሊዳ ጌሻስ ሙሴይ ኣርኔይ ዮቲዛይሳ ካዋዚ ሲዮንታ ኢጲዴሰ።

### ሻቻ ኢራ

13 ሄሳፌ ጉዬ ጎዳይ ሙሴስ፥ «ዋንቶ ዋንታ ማላዶራ ዴንዳ ባዳ ካዋዛራ ጋጋዳ ኢዛ ኢብራዌታ ጎዳይ ኔና፥ ታስ ጎይናና ማላ ታ ኣሳ ዬዳ።

14 ኔ ዬዶንታ ኢጲኮ ኔ ቦላ፥ ዳናታ ቦላ፤ ኔ ኣሳ ቦላ ታ ዋልቃማ ሃንቆ ሃኢ ዬዳና፤ ሄሳንካ ቢታ ቦላን ታ ማላይ ባይንዳይሳ ኔኒ ኤራና።

15 ታኒ ሃሮ ጋካናስ ታ ኩሼ ዬዳዳ ኔና ኔ ኣሳ ኢታ ሃርጌን ቆሃዳኮ ሃ ቢታ ቦላፌ ፒታ ቆይሳናኩሺን።

16 ታኒ ኔና ፓጸ ዋሊዳይ ኔና ታ ዋልቃ ቤሳናሲኔ ታ ሱንሊ ቢታ ኡባ ቦላን ጸይጌታና ማላሳ።

17 ኔኒ ሃኢካ ኦቶሬታዳ ታ አሳ ዩዶንታ ኢጸዳሳ።

18 ሄሳ ጊሻሰ ታኒ ዋንቶ ሃኒ ዋዴ ጊብጼይ ጊብጼ ጊዶሶፔ ሃች ጋካናሰ ቡኪ ኤሮንታ ዋልቃማ ሻች ቡኪሳና።

19 ሃኢ ኔኒ ኔ ሜሄኔ ጋዴን ኔሰ ዲዛዝ ኡባ ሶ ጌልፋና ማላ አዛዛ፤ አይሰ ጊኮ ሶ ጌሎንታ ቡሮ ጋዴን ዲዛ አሳ ኡባ ቦላኔ ሜሄ ኡባ ቦላ ሻች ቡኪዲ ዋቆና ጊዴሰ ጋ» ጊዴሰ።

20 ካዋዚ ሱንሊዳ ዳናታፔ ጎዳ ቃላሰ ባቢዳይቲ ባ አይሌታኔ ባ ሜሄ ኤሶቲዲ ሶ ጌልሊዳ።

21 ጊዶ አቲን ጎዳ ቃላ ካቋዳይቲ ባ አይሌታኔ ባ ሜሄ ካሬን አጋገዳ።

22 ሄሳፌ ጉዬ ጎዳይ ሙሴሰ፡ «ጊብጼ ቢታ ኡባ ቦላን፡ አሳ ቦላ፡ ሜሄ ቦላኔ ቢታፌ ሞኪዛ ኡባ ቦላ ሻች ቡካና ማላ ኔ ኩሼ ሳሎ ዴንሳ» ጊዴሰ።

23 ሙሴይ ባ ጉፌ ፑዴ ሳሎ ዴንሊዳ ማላ፡ ጎዳይ ዳዳኔ ሻች ዩዲዴሰ፤ ዋልቃንሊካ ዱጌ ቢታ ቦላ ዋልቃሚዴሰ። ጎዳይ ጊብጼ ቢታን ሻች ቡኪሲዴሰ።

24 ሻቻይ ቡኪዴሰ፤ ዋልቃንሊካ ዋልቃሚዴሰ፤ ጊብጼ ዴሬይ ዴሬ ጊዶሶፔ ሃ ሲሚን ጊብጼ ቢታ ኡባ ቦላ ዋቋዳ ሻቻ ኡባፌ ሃይሲ አቋዛ ኢታ ሻቻ።

25 ሄ ሻቻይ ጊብጼ ቢታ ኡባን ጋዴን ዲዛ ኡባ፡ አሳካ ሜሄካ ሾጪዴሰ፤ ቢታፌ ሞኪዳዝ ኡባ ዱጌ ዛሪዲ ሾጪዴሰ፤ ሚሊካ ኡባ ሜንሌሬሊዴሰ።

26 ኢሰራኤሌ ናይቲ ዲዛ ጌሴሜ ቢታይ ጸላ ሻች ቡኮንታ አቲዴሰ።

27 ካዋይካ ሙሴኔ አርኔ ጸይጊሲዲ፡ «ሃኢ ሄኮ፡ ታኒ ናጋራ ኦላዲሰ፤ ጎዳይ ጸሎ፤ ታኒኔ ታ አሳይ ዋርዶ።

28 ዳዳይኔ ሻች ኑ ቦላ ዳሪዳ ጊሻሰ ኑሰ ጎዳ ዋሲቲ። ታኒ ኢንቲና ዩዳና፤ ሄኮ ሃይሳፌ ሲንፋን ኢንቲ ሃይሳን ጋምኤኬታ» ጊዴሰ።

29 ሙሴይካ ኢዛሰ፡ «ታኒ ሃ ካታማፔ ኬዛ ባዳ ዋሳናሰ ታ ኩሼ ጎዳኮ ሚጫና፤ ሂሰቲኮ ዳዳይ አጋና፤ ቃሴ ሻቻይካ ቡኬና፤ ሄሳንካ ቢታይ ጎዳሰ ጊዲዳይሳ ኔኒ ኤራና።

30 ጊዶ አቲን ኔኒኔ ዳናቲ ጎዳ ጸሳሰ ሃኢካ ባቦንታይሳ ታኒ ኤራይሰ» ጊዴሰ።

31-32 ጨዱዳ ካላይኑ ቲያቲዳ ካላይ ወሪ ጳይዴሰ፤ ጌዶ አቲን ጨዮንታኑ ቲያቶንታ ቡሮ ጋኪዛ ካላ ሻቻይ ቆሂቤና።

33 ሄሳፌ ጉዬ ሙሴይ ካዎዛ አቻፌ ዳንዲዲ ካታማፔ ጋጸ ኬዚዲ ባ ኩሼ ጎዳኮ ሚጨዴሰ፤ ሂሰቲን ዳዳይኔ ሻቻይ ኤቂዴሰ፤ ኢራይካ ቢታ ቦላ ቡኪዛይሳ አገዴሰ።

34 ጌዶ አቲን ካዎዚ ኢራይ፡ ሻቻይኔ ዳዳይ አገዳይሳ ቤኢዳ ዎዴ ቃሴካ ናጋራ ኦሊዴሰ፤ ኢዚኔ ዳናቲካ ባንታ ዎዚና ሚንሊዳ።

35 ጎዳይ ሙሴ ዶናራ ሃሳይዳ ማላካ ካዎ ዎዚናይ ሚነን ኢሰራኤል ናይታ ዬዶንታ ኢጲዴሰ።

## 10

### ቦሊ

1-2 ሄሳፌ ጉዬ ጎዳይ ሙሴሰ፡ «ጌብጼ ካዎኮ ጉዬ ሲማ ባ፤ አይሰ ጌኮ ታኒ ጌብጼ አሳ ዎሰታ ቃጸይዳኮኔ ማላታ ኢሰታ ጌዶን ዎሰታ ኦሊዳኮ እንቲ እንቲ ናይታሰኔ እንቲ ናይታ ናይታሰ ዮታና ማላ፡ ቃሴ እንቲካ ታኒ ጎዳ ጌዲዳይሳ ኤራና ማላ፡ ታ ማላታ ኢሰታ ጌዶን ኦላናሰ ኢዛ ዎዚናኔ ዳናታ ዎዚና ሚንላ ዎላዲሰ» ጌዴሰ።

3 ሂሰቲን ሙሴይኔ አሮኔይ ካዎዛኮ ጌሊዲ፡ «ጎዳ ኢብራዌታ ጸሲ ኔና፡ ሳኔ ኔናቴላ ታ ሲንላን ካወሾንታ ኢጲዛይ አዉዴ ጋካናሰ? ሃኢ ታሰ ጎይናና ማላ ታ አሳ ዬዳ።

4 ኔኒ ኢሰታ ዬዶንታ ኢጲኮ ዎንቶ ታ ኔ ቢታ ቦላ ቦሊ ዬዳና።

5 ቦሊዚ ኦኒካ ቤኦንታ ማላ ቢታ ማይአና። እንቲሰ ሻቻፌ አቲዳ ጉላ ሚሺ፡ ጋዴን ዲጨዛ ሚሊካ ኡባ ማና።

6 ኔ ኬላታን፡ ዳናታ ኬላኒኔ ጌብጼ አሳ ኡባ ኬላን ኩማና፤ ሃይሲ ኔ አዎቲ፡ ዎይኮ ኔ ማይዛቲ ሃ ቢታ ቦላ ዶሶፔ ሃኖ ጋካናሰ ሙሌካ ቤዪ ኤሮንታ ሚሻ፡ ጌዴሰ» ጌዳ። ሄሳፌ ጉዬ ሙሴይ ካዎዛ ሲንላፌ ኬዚ ቢዴሰ።

7 ካዎዚ ሱንሊዳ ዳናቲካ ካዎዛ፡ «ሃይሲ አዴዚ ኑሰ አይዴ ጋካናሰ ጳጴ ጌዳኔ? ኢሰቲ ጎዳ ባ ጸሳሰ ጎይናና ማላ ኔኒ አሳ ዬዳ፤ ጌብጼ ዴሬይ ጳይዳይሳ ኔኒ ሃኢካ ዩሻ ቆፒኪ?» ጌዳ።

8 ሄሳ ጊሻሰ ካዎዚ ሙሴኔ አሮኔ ጴይጊሲ ጉዬ ዛሪዲ፡ «ቢቴ፤ ጎዳ እንቲ ጸሳሰ ጎይኒቲ ሺን ቢዛይቲ ኦናንቲ?» ጌዴሰ።

9 ሂሰቲን ሙሴይ፡ «ኑኒ ኑ ቁሪ ናይታራ ጨማታራ፡ ኑ አቲማ ናይታራ ማጫ ናይታራ፡ ኑ ሜሃራኔ ሚዛ ዉዴታራ ኢሲፌ ባና፤ አይሰ ጌኮ ኑኒ ቢዛሶን ጎዳሰ ባኣሌ ቦንቻናሰ ኮሼሰ» ጌዴሰ።

10 ካዎዚ፡ «ኢንቲ ማጫሳታራኔ ኢንቲ ናይታራ ባና ማላ ታ ኢንቲና ዩዳና፤ ጎዳይ ኢንቲናራ ጊዳ፤ ጊዳ ኣቲን ኢንቲ ኢንቲ ዎዚናን ጌኔ ቆፒዴታ።

11 ሄሳ ጊሻሰ ሃኔና፤ ኢንቲ፡ ሉ ቢዲ ጎዳሰ ጎይናና ማላ ኑና ዩዳን ጊሼ ጋምኢዳ ጊሻሰ ኣቱማሳይ ጸላ ቢዲ ጎዳሰ ጎይኒቲ» ጊዴሰ። ሄሳፊ ጉዩ ሙሴኔ ኣሮኔ ካዎዛ ሲንሳፊ ኬሲ ጎዲዳ።

12 ጎዳይ ሙሴሰ፡ «ቦሌይ ጊብጼ ቢታ ቦላ ያና ማላ ሻቻፊ ኣቲዲ ዲጨዛ ኡባ ለምኢ ሂሰቲ ወርሳና ማላ፡ ኔ ኩሼ ጊብጼ ቢታ ቦላ ፒዲሳ» ጊዴሰ።

13 ሙሴይ ባ ኦይኪዳ ጉፋ ጊብጼ ቢታ ቦላ ቶቁ ሂሰቲ ዴንሒን፡ ሄ ዎዴ ጋላሲኔ ቃማ ጎዳይ ኣርሼይ ሞኪዛ ባጋፊ ዎልቃማ ጫርኮ ቢታ ኡባ ቦላ ዩዲዴሰ፤ ጋዴይ ዎንቲሺን ሄ ጫርኮይ ቦሌ ኤኪ ዩዴሰ።

14 ቦሌይ ጊብጼ ቢታ ኩሜሊ ማይኢዴሰ። ሃይሳ ላጌ ቦሌ ቦሻይ ሄ ቢታን ሃይሳፊ ካሴ ሃኒቤና፤ ሃይሳፊ ሲንሳንካ ኢዛ ማላይ ሃኔና።

15 ቢታይ ካሬጸና ጋካናሰ ቦሌዚ ቢታ ኡባ ማይኢዴሰ። ሻቻፊ ኣቲዲ ቢታ ቦላ ዲጨዛዛኔ ሚላ ቦላን ዲዛ ኣይፊ ኡባ ለምኢ ሂሰቲ ሚዴሰ። ሄሳ ጊሻሰ ሚላ ሃይሊ ዎይኮ ጋዴን ዲዛ ጨለላ ሚሺ ወሪ ጊብጼ ቢታ ኡባሶን ኣይኮይካ ኣቲቤና።

16 ካዎዚካ ሙሴኔ ኣሮኔ ኤሶን ጴይጊሲዲ፡ «ጎዳ ኢንቲ ጸሳኔ ኢንቲና ታኒ ቆሃዲሰ።

17 ሄኮ ኢንቲ ታና ወርሴላ ማሮ ማሪቲ። ሃ ኢታ ቦሻ ታፔ ዲጋና ማላ ጎዳ ኢንቲ ጸሳ ዎሲቲ» ጊዴሰ።

18 ሙሴይ ካዎዛ ኣቻፊ ኬዚዲ ጎዳ ዎሲዴሰ።

19 ጎዳይካ ኣርሼይ ሞኪዛ ባጋራ ዩዳ ጫርኮዛ ኣርሼይ ወለዛ ባጋራ ዩዳ ዎልቃማ ጫርኮን ላሚን ቦሌዛ ቶኪ ኤኪ ኤፊዲ፡ ዞኦ ኣባን ዩጊዴሰ። ጊብጼ ቢታ ኩሜላን ኢሲ ቦሌይካ ኣቲቤና።

20 ጊዲኮካ ጎዳይ ካዎዛ ዎዚና ሚንሒዳ ጊሻሰ ኢሰራኤሌ ናይታ ዩዶንታ ኢጲዴሰ።

### ጊርዲ ጊዳ ቆማ

21 ሄሳፊ ጉዩ ጎዳይ ሙሴሰ፡ «ጊብጼ ቢታን ጊርዲ ጊዳ ቆማይ ቆማና ማላ ኔ ኩሼ ፑዴ ሳሎ ዴንላ» ጊዴሰ።

22 ሙሴይ ባ ኩሼ ፑዴ ሳሎ ዴንሊን ጊብጼ ቢታ ኡባን ሄቹ ጋላስ ኩሜል ጊርዲ ጊዳ ጳማይ ጳሚዴስ።

23 ሄ ሄቹ ጋላሳታን አሲ ኦኒካ ኢሶይ አሳ ቤኦንታ፥ ዋይኮ ሶፔ ካሬ ኬዘንታ ጋምኢዴስ። ጊዳ ኣቲን ኢሰራኤል ናይቲ ዲዛሶ ኡባን ኢሰታሰ ፖኦይ ዴስ።

24 ካዋዚ ሙሴ ጴይጊሲዲ፥ «ቢቴ፤ ቢዲ ጎዳስ ጎይኒቴ፤ እንቲ ማጫሳይካ እንቲ ናይቲካ እንቲናራ ባና ዳንዳዬቴስ። እንቲ ማሄታ ጊዲኮ ሃን ኣጊ ቢቴ» ጊዴስ።

25 ጊዳ ኣቲን ሙሴይ ኢዛስ፥ «ኦኒ ጸጊዲ ያርሺዛ ያርሾ ጎዳ ኑ ጸሳስ ሺሻና ማላ ማሄ ኢማዳ ዬዳናስ ኮሼስ።

26 ኢሲ ጸጊንሊካ ኣቶንታ ዲሺን ኑ ማሄይ ዉሬካ ኦናራ ባናስ ቤሴስ። ኦኒ ጌዴ ጋኮንታ ዲሼ ማሃፔ ኣዋይሳ ኣዋይሳ ያርሻናኮ ሃኢ ኤራናስ ዳንዳዮኮ። ጎዳ ኑ ጸሳስ፥ ያርሾስ ሄ ማሃፔ ዶሪዲ ኤካናስ ኮሼስ» ጊዴስ።

27 ጊዳ ኣቲን ጎዳይ ካዋዚ ዋዚና ሚንሊዳ ጊሻስ ኢዚ ኢሰታ ዬዳናስ ኮዩቤና።

28 ሄሳፌ ጉዬ ካዋዚ ሙሴ፥ «ታ ኣቻፌ ኪቻ! ናምኣንሉ ታ ሲንላን ቤታሼ ኔና ኤራ! ናምኣንሉ ታ ኣይፊሶ ኔ ቤኢዳ ጋላስ ኔ ሃይቃና» ጊዴስ።

29 ሂሰቲን ሙሴይ ኢዛስ፥ «ቱሙካ፤ ኦኒ ጊዳ ማላ ታኒ ኔና ናምኣንሉ ሙሌካ ቤይኬ» ጊዴስ።

## 11

### ባይራታ ቦላ ዪዳ ቦሻ

1 ጎዳይ ሙሴስ፥ «ታኒ ጊብጼ ካዋ ቦላኔ ኢዛ ኣሳ ቦላ ኢሲ ሃራ ቦሻ ዬዳና፤ ሄሳፌ ጉዬ ኢዚ እንቲና ሃ ቢታፌ ኬሲ ዬዳና፤ ኬሲዲ ኢዚ እንቲና ኢሳዴ ኣሾንታ ኡባ ጎዲ ኬሳና።

2 ኢሰራኤል ኣሳይ ማጫይ ኣዴይ ባ ሾርታፔ ቢራፔኔ ዋርቃፌ ኦሴቲዳ ሚሻታ ኦይቺ ኤካና ማላ ኢሰታሰ ዮታ» ጊዴስ።

3 ጎዳይካ ጊብጼ ኣሳይ ኢሰራኤል ኣሳስ ኪያቴል ኦላና ማላ ኦሊዴስ። ቃሴ ሙሴይ ባ ባጋራ ጊብጼ ቢታን ካዋይ ሱንሊዳ ዳናታኒኔ ኣሳን ኬሂ ዳሮ ቦንቹቲዳ ኣሳ ማላ ጴሌቲዴስ።

4 ሙሴይ ካዋዛስ፥ «ጎዳይ፥ ሪዲ ጊዶል ታኒ ጊብጼ ቢታን ሄማታና፤

5 ጊብጾ ቢታን ዲዛ አቱማ ናይ፥ ካዎቲላ አልጋን ኡቲዳ ካዋስ ባይራ ናፔ ደሚዲ፥ ዋጸን ጋጪዛ አይሌይ ባይራ ና ጋካናሰካ ባይራ ዩሌቲዳ ሜሄይካ አቶንታ ዉሪ ሃይቃና።

6 ጊብጾ ቢታ ኡባን ሃይሳፌ ካሴ ጊዲን ዋይኮ ሲንሳፌካ ሃኖንታ ዩሆይ ዩኬታና።

7 ጊዶ አቲን ኢሰራኤሌ ናይታ ጊዶን አሳ ቦላ ዋይኮ ሜሄ ቦላ አሲ አቶሺን ካናይካ ቦጩና፥ ጊዴሰ። ሄ ዋዴ ጎዳይ ጊብጾሲኔ ኢሰራኤሌ ናይታሰ ጊዶን ሻኮቲል ሜቆናይሳ ኢንቲ ኤራና።

8 ኔ ሱንሊዳ ዳናቲ ዉሪ ታኮ ዪዲ፥ ታ ሲንላን ጉፋኒ ዘጊዲ፥ «ኬዛዳ ባርኪ! ኔና ካሊዛ አሳይ ዉሪካ ቦ!» ጋና። ሄሳፌ ጉዬ ታኒ ባና» ጊዴሰ። ሙሴይ ዳሮ ሃንቄቲዲ ኢዛ ሲንሳፌ ኬዚዲ ቢዴሰ።

9 ጎዳይ ሙሴስ፥ «ታ ማላሊሲዛ ሚሽ ጊብጾ ቢታን ጉጃ ጉጃ ኦላና ማላ ካዎይ ኢንቲ ዮቲዛይሳ ሲዬና» ጊ ካሴ ዮቲ ዋሊዴሰ።

10 ሙሴይኔ አርኔይ ሃይታ ማላታታ ኡባ ካዎዛ ሲንላን ኦሊኮካ ጎዳይ ካዎዛ ዋዚና ሚንሊዳ ጊሻሰ ኢዚ ኢሰራኤሌ ናይታ ባ ዴሬፔ ዩዶንታ ኢዲዴሰ።

## 12

### ቦሻ ሃይቆይ ዋዶንታ ዩጊ አዴል

1 ጊብጾ ቢታን ጎዳይ ሙሴኔ አርኔ ሂዝጊዴሰ፤

2 «ሃ አገናይ ኢንቲሰ ላይላሰ ኮይሮ አገና ጊዶ፤

3 ኢሰራኤሌ አሳ ኡባሰ ሃይሳ ሃ ዋጋዛ ዮቲቲ፤ ሃይሲ አገናይ ጌሊዳ ታማንላ ጋላሰ፥ ኢሲ ኢሲ አሲ ባ ሶ አሳሰ ኢሲ ላቃ ዶሪ ኤኮ።

4 ሄ ኬላ አሳ ቆዳይ ላቃዛ ኡባ ማናሰ ጉጺዛ ጊዲኮ ኢዛዴይ ባሰ ማታቲዛ ጉታ ባ ሶ አሳ ማላ ቆዲዲ ኢሳዴይ ኢሳዴይ ሚ ዉርሳናይሳ ሻኪ ኤሬቶ።

5 ኢንቲ ዶሪ ኤካና ላቃይ ዩሌቲን ኢሲ ላይል ጊዲዲ ኢዛ ቦላ አይኮ ቦሬይ ባይንዳ አዴ ላቃ ጊዶ። ኢንቲ ላቃዛ ዶርሳፌ ዋይኮ ዴይሻፌ ኤካናሰ ዳንዳዬታ።

6 ሃ አገናይ ታማኔ ኦይዳንላ ጋላሰ ጊዳና ጋካናሰ ኢሰታ ናገቲ፤ ሄ ጋላሰ አርሼይ ዉሊሺን ኢሰራኤሌ ማባራ አሳይ ዉሪ ኢሰታ ሹካናሰ ኮሼሰ።

7 ሹኪዲ ሱላፌ ኤኪዲ ኢስታ አሾዛ ሚዛ ከላስ ቆሲላላኔ ቆሬዛ ቦላ ተዬቶ። \* 8 አሾዛ ሄ ጋላስ ቃማካ ታማን ጸጸዲ፤ ጫሚዛ ቦንጮራኔ ኢርሾይ ባይንዳ ኡኩቲዳ ኡኩላራ ሚቶ።

9 አሾዛ ቃዬ ዋይኮ ደይሲዲ ሞፒቲ፤ ሁኤዛ፤ ጌዳታ፤ ቃንላ አሾዛካ ኡባ ጸጸዲ ሚቲ።

10 ሄ አሾዛፔ ጋዴይ ዋንታና ጋካናስ አይኮካ አሾፍቲ። ዋንታና ጋካናስ አቲዳዚ ዲኮ ታማን ጸጋና ኮሼስ።

11 ሚሽ፤ አጌስ ጊዲዛ ማይኦ ማይኢዲ፤ ኢንቲ ጫማ ቶሆን አሊዲ ኢንቲ ጉፊ ኢንቲ ኩሼን ኦይኪዲ ኤሶን ሚቲ፤ ሃይሲ ታና ጎዳ ኢንቲ ቦንቹዛ ፓዚጋ ያርሾ።

12 «ታኒ ሄ ጋላስ ቃማራ ጊብጼ ቢታራ ሄማታሼ ባይራ ዬሌቲዳ፤ አሴካ ሚሄካ ኡባ ዋዳና። ጊብጼ ኤቃታ ኡባ ቦላካ ታኒ ፒርዳና፤ ታኒ ጎዳ ጊዲኪና?

13 ሄ ሱላይ ኢንቲ ዲዛ ከላታ ኤሪሲዛ ማላታ ጊዳና። ታኒ ሄ ሱላ ቤኢዛ ዋዴ ኢንቲና ኣጋ ኣዳና፤ ታኒ ጊብጼ ቢታ ቦሻን ሾጪዛ ዋዴ ኢንቲ ቦላ አይኮ ቦሻይካ ጋከና።

14 «ሄ ጋላሳይ ታኒ ጎዳይ ኢንቲስ ኦሊዳይሳ ቆፒ ቆፒ ቦንቹዛ ጋላስ ጊዳ፤ ኢንቲ ዜሬሊ ዉሪ ጎዳ ባኣሌ ቦንቹ፤ ሃይሳ ኢንቲስ ዋጋ ሂስቲዲ ሜርናስ ቦንቹቲ።

### ኡኩላ ባኣሌ

15 «ላፑን ጋላስ ጋካናስ ኢርሾይ ጌሎንታ ኡኩላ ሚቲ፤ ኮይሮ ጋላስ ኢንቲ ሶፔ ኢርሾ ዲጊቲ። ሄ ኮይሮ ጋላሳፌ ደሚዲ ላፑንላ ጋላስ ጋካናስ፤ ኢርሾራ ዲዛ ኡኩላ ሚዛ ኣሲ ኦኒካ ኢስራኤሌ ኣሳ ጊደፌ ሻኬቲ ዳዮ።

16 ኮይሮ ጋላስ ጌሻ ዱላታ ሺቂቲ፤ ሃራ ጌሻ ዱላታ ቃሴ ላፑንላ ጋላስ ሺቂቲ፤ ኣሳይ ዉሪ ማናስ ቁማ ካሶፌ ኣቲን ሄ ጋላሳታ ኡባን አይኮካ ኦሶፍቲ፤ ኢንቲ ኦላና ሚሺ ሄሳ ጸላ።

17 «ታኒ ኢንቲና ኢስራኤሌ ናይታ ጊብጼ ቢታፌ ኬሲዳይ ሄ ጋላስ ጊዲዳ ጊሻስ ኡኩላ ባኣሌ ቦንቹቲ። ሄ ጋላሳ ባኣሌዛ ናናስ ኣቶንታ ዋጋ ሂስቲ ቦንቹቲ።

18 ኮይሮ ኣጊናን ሄ ኣጊናስ ታማኔ ኦይዳንላ ጋላሳ ኦማርሳፌ ደሚዲ ናምኡ ታማኔ ኢሲንላ ጋላሳ ኦማርሳ ጋካናስ ኢርሾይ ጌሎንታ ኡኩላ ሚቲ።

\* 12:7 ቆሬ ጌቲቲዛይሲ ኢሲ ኢሲ ባጋ ጋሞላ ቃላን ዳርማቻ፤ ሃራሶን ቃሴ ማርጋቻ ጌቲቲስ። 12:13 ሊዌ 23:5፤ ዛሬ 16:3-8

19 ላፑን ጋላስ ጋካናስ ኢርሾይ ኢንቴ ሶን ቤቶፎ፤ ኢርሾይ ጌሊዳ ካል ሚዛ ኣሲ ቤቴ ኣሲ ጊዲን ዋይኮ ሄ ዴፌ ኣስ ኦናካ ጊዲን ሄሳዴይ ኢሰራኤል ማባራ ጊዶፌ ቆየ።

20 ኢርሾይ ጌሊዳዝ ኣይኮካ ሞፒቴ፤ ኢንቴ ዲዛሶን ኣዋንካ ኢርሾይ ጌሎንታ ኡኬል ማናስ ቤሴስ።»

21 ሄሳፌ ጉዬ ሙሴይ ኢሰራኤል ጨማታ ኡባ ዴይጊሲዲ፡ «ኢንቴ ቢዲ ኢንቴ ሶ ኣሳስ ፓዚጋ ያርሾስ ላቃ ኤኪ ሹኩቴ።

22 ሂሶጴ ጌቴቲዛ ማታ ሃይላፌ ዳንኪ ኤኪዲ ኬሬን ዲዛ ሱላን ጌልሊ ኬሲዲ፡ ሄ ሱላ ናምኡ ቆሲላላታኒኔ ቆሬታ ቦላ ቲዩቴ፤ ኢንቴፌ ኢሲ ኣሲካ ጋዴይ ዋንታና ጋካናስ ባ ኬላፌ ካሬ ኬዘፖ።

23 ጎዳይ ጊብጼ ባይራ ናይታ ዋፋናስ ሄ ቢታራ ሄማቲዛ ዋዴ ሱል ኬላ ቆሲላላታኒኔ ቆሬታ ቦላ ቤኢዲ ካሬራ ኣፂ ባና፤ ዋፂዛይሲ ኢንቴ ሶ ጌሊዲ ኢንቴና ዋጵንታ ማላ ኢዛ ጎዳይ ዲጋና።

24 «ኢንቴ ሃይሳ ኣዛዞዛ ኢንቴሲኔ ኢንቴ ዜሬላስ ሜርናስ ዋጋ ሂስቲዲ ኣዛዜቲቴ።

25 ጎዳይ ካሴ ኢማና ጊዲ ጫቂዳ ቃላ ማላ ኢዚ ኢሚዛ ቢታ ኢንቴ ጌሊዛ ዋዴ ሃ ዋጋ ናጊቴ።

26 ኢንቴ ናይቲ ኢንቴና፡ «ሃይሳ ሃ ዋጋዛስ ቢርሼል ኣዜ?» ጊ ኦይቹኮ፡

27 ኢንቴ ኢስታስ፡ «ሃይሲ ጎዳ ቦንቻናስ ያርሺዛ ፓዚጋ ያርሾ፤ ኣይስ ጊኮ ጎዳይ ጊብጼ ቢታን ኢሰራኤል ኣሳ ኬል ኣጊ ኣፂዲ ጊብጼ ኣሳ ዋፂዲ ኦና ኣሺዳ ጊሻሳ ጊቴ» ጊዴስ።

ሄሳፌ ጉዬ ኣሳይ ቢታ ቦላ ጉፋኒ ጎይኒዴስ።

28 ኢሰራኤል ኣሳይ ቢዲ ጎዳይ ሙሴኔ ኣሮኔ ኣዛዚዳ ማላ ኦልዴስ።

### ጊብጼ ኣሳ ባይራቲ ሃይቂ ወር

29 ጊዲ ጊዶላን ጎዳይ ጊብጼን ባይራ ዩሌቲዳ ኡባ ካዋቲላ ኣልጋን ኡቲዛ ካዋ ባይራ ናፔ ዶሚዲ፡ ቃሾ ኬላን ዲዛ ዲኤቲዳ ኣሳ ባይራ ና ጋካናስ፡ ቃሴ ባይራ ዩሌቲዳ ሜሄ ኡባ ዲፒ ሂስቲዴስ።

30 ካዋይ፡ ኢዚ ሱንሊዳ ዳናቲኔ ጊብጼ ቢታ ኣሳይ ወሪ ቃማራ ቤጊዴስ። ጊብጼ ቢታን ኣሲ ሃይቆንታ ኬል ሙላካ ባይንዳ ጊሻስ ኣሳይ ቃላ ቅቁ ሂስቲዲ ዳሮ ዋሲ ዩኪዴስ።

31 ሄ ጋላሳ ኦማርሰ ካዎዚ ሙሴኔ አሮኔ ጸይጊሲዲ፥ «ዴንዲቲ! ኢንቴካ ኢንቴ አሳይካ ታ አሳ ጊደፌ ኬዚቲ! ቢዲ ኢንቴ ኦይቹዳ ማላካ ጎዳሰ ጎይኒቲ!

32 ኢንቴ ጊዳ ማላካ ኢንቴ ሜሄ፤ ኢንቴ ዳይሺኔ ዶርሰ ኡባ ኤኪዲ ቢቲ! ቃሴ ታናካ አንጂቲ» ጊዳሰ።

33 ኢሰራኤል አሳይ ባ ቢታፌ ኤሶን ኬዛና ማላ ጊብጼ አሳይ ዲርባሲዳሰ። አይሰ ጊኮ ኢሰቲ፥ «ኬዘንታ ኢጲኮ ኑኒ ወሪካ ወራና» ጊዳ።

34 ሄሳ ጊሻሰ ኢሰራኤል አሳይ ኢርሾይ ጌሎንታ ሙኑቃ ኬሬን ኩንሊ ማይኦን ጸጺዲ ሃሺን ቶኪዳሰ።

35 ኢሰራኤል አሳይ ሙሴይ ኢሰታ አዛዚዳ ማላ፥ ጊብጼ አሳ ቢራ፥ ዋርቃኔ ማይኦ፥ «አሚቲ» ጊ ኦይቹዳሰ።

36 ጎዳይ ጊብጼ አሳ ሲንፋን ኢሰራኤል አሳይ ሳቤታና ማላ ኦሊዳ ጊሻሰ ጊብጼ አሳይ ኢሰታ ኦይቹዳይሳ ኡባ አሚዳ። ሄሳላ ሂሰቲዲ ኢሰታ ጊብጼ አሳታ አቆ ቡሪ ኤኪ ቢዳ።

### ጊብጼፕ ኢሰራኤል አሳ ኬሰ

37 ኢሰራኤል አሳይ ኤራሚሴ ጌቲቲዛ ካታማፕ ዴንዲዲ ሱኮቲ ጌቲቲዛሶ ጋካናሰ ቢዳሰ። አሳይ ናይታኔ ማጫሳ ጉጃንታ ቆዲን ቶሆን ሄሜቲዛ አቲማ አሳይ 600,000 ጊዲዳሰ።

38 ቃሴ ኢሰታራ ዳሮ ሃራ ዳሪ አሳይ፥ ኬሂ ዳሮ ሜሄ፥ ዶርሴኔ ዳይሽ ኤኪ ኬዚዳሰ።

39 ጊብጼፕ ኢሰቲ ኤኪ ኬዚዳ ኢርሾይ ጌሎንታ ሙኑቃፕ ኡኬላ ኡኪዳ፤ አይሰ ጊኮ ኢሰታ ጊብጼፕ ኤሶን ኬሲዳ ጊሻሰ ባሰ ሺንቄ ካፋናሴኔ ሙኑቃይ ዴንዲን ኡካና ዋዴ ኢሰታ ጋሊቤና።

40 ኢሰራኤል አሳይ ጊብጼ ቢታን ዳዪዳ ላይላይ ወሪ ኦይዱ ጴታኔ ሄሹ ታማ።

41 ሄ ኦይዱ ጴታኔ ሄሹ ታሙ ላይላይ ወሪዛ ሄ ወርሴላ ጋላሳን ጎዳ አሳይ ወሪ ጊብጼ ቢታፌ ኬዚዳሰ።

42 ጊብጼ ቢታፌ ኦማርሳ ዋዴ ጎዳይ ባ አሳ ኬሲሹ ናጊዳ ጊሻሰ ሄ ቃማይ ና ና ጋካናሰ፥ ኢሰራኤል አሳይ ወሪ ቤጊ ናጊዲ አቂዛ ጎዳሰ ዴማቲዳ ቃማ።

### ፓዚጋ ቦንቹዛ ዋጋ

43 ጎዳይ ሙሴኔ አሮኔ፥ «ፓዚጋ ቦንቹዛ ዋጋይ ሃይሳ፤ ሃራ ዳሪ አሲ ኢዛፕ ኦኒካ ሙሌራ ዋፖ።

44 እንቲ ሚሻን ሻሚዳ ኣይሌይ ኦኒካ እንቲ ኢዛ ቃጸሪዳፔ ጉዬ ኢዛፔ ማናሰ ኮሼሰ።

45 ጊዶ ኣቲን ጉላ ዋዴሰ እንቲናራ ኢማላቲላን ጋምኢዛይኔ ኡኔ ኦሊዛ ሃራ ዴሪ ኣሲ ኢዛፔ ሞፖ።

46 «ሃ ፓዚጋ ያርሾዛ እንቲ ኢሲ ኬላን ሚቲ፤ እንቲ ሄ ኣሾዛፔ ኣይኮካ ካሪ ኬሶፍቲ። ሜቁላታፔ ኢሲኖካ ሚንሶፍቲ።

47 ኢሰራኤሌ ማባራይ ዉሪ ፓዚጋ ያርሾ ቦንቻናሰ ኮሼሰ።

48 «ቤቲ ዪዲ እንቲ ጊዶን ዲዛ ኣሲ ጎዳ ፓዚጋ ያርሾ ቦንቻናሰ ኮይኮ ባ ሶን ኣዴ ጊዲዳ ኣሳ ኡባ ቃጸር። ሄሳፌ ጉዬ ኢዚ ሄ ቢታን ዬሌቲዳ ኣሳ ማላ ሸቂዲ ፓዚጋ ያርሾ ቦንቻናሰ ቤሴሰ። ጊዶ ኣቲን ቃጸራቶንታ ኣሲ ሙሊካ ኢዛፔ ሞፖ።

49 እንቲ ቢታን ዬሌቲዳይሳሰካ ጊዲን እንቲ ጊዶን ቤቲ ጊዲዲ ዲዛይሳሰካ ጊዲን ሃይሲ ዋጋይ ኡባሰ ኢሲኖ» ጊዴሰ።

50 ሂሰቲን ኢሰራኤሌ ኣሳይ ዉሪ ጎዳይ ሙሴኔ ኣርኔ ኣዛዚዳ ማላካ ኦሊዴሰ።

51 ሄ ጋላሳንካ ጎዳይ ኢሰራኤሌ ናይታ ኢሰታ ጩጋን ጩጋን ጊብጼ ቢታፌ ኬሲዴሰ።

## 13

ኮይር ዬሌቲዳ ኣዴይ ዉሪ ጎዳሰ ዲማቴላ

1 ጎዳይ ሙሴ ሂዝጊዴሰ።

2 «ኣዴ ጊዲ ኮይር ዬሌቲዳ ኡባ ታሰ ዲማሳ። ኢሰራኤሌ ኣሳ ጊዶን ኮይር ዬሌቲዳ ባይራይ ዉሪ ሜሄ ጊዲን ኣሰ ጊዲን ዉሪካ ታሳ።»

3 ሄሳፌ ጉዬ ሙሴይ ኣሳ፡ «ጊብጼፔ፡ ኣይሌቲላ ቢታፌ እንቲ ኬዚዳ ጋላሳን ሃኖ ጋላሳኖ ጊዲዳይሳ ዩሺ ቆፒቲ፤ ኣይሰ ጊኮ ጎዳይ ባ ዋልቃማ ቄሴን እንቲና ኬሲዴሰ፤ ሄሳ ጊሻሰ ኢርሾይ ጌሊዳ ካላ ኣይኮካ ሞፒቲ።

4 እንቲ ሃ ጋላሳይን ኣቢቤ ጌቲቲዛ ኣጊናን ኬዚዳታ።

5 ጎዳይ ካናኔታ፡ ሂቲታ፡ ኣሞሬታ፡ ሂዌታኔ ያሱሴታ ጌቲቲዛ ዴሬታ ቢታ እንቲና ጋሊዛ ዋዴ እንቲ ሃ ቦንቾ ጋላሳ ሃ ኣጊናን ቦንቹታ። ሄ ቢታይ ጎዳይ እንቲሰ ኢማና ማላ ካሴ እንቲ ኣዋታሰ ጫቂ ዋሊዳ ቢታ። ሄ ቢታይ ማሊኔ ኤሲ ጎጊዛ ቢታ።

6 እንቲ ላፑን ጋላሰ ኢርሾይ ጌሎንታ ኡኬላ ማና፤ ላፑንላ ጋላሰ ጎዳሰ ባኣሌ ሂሰቲ ቦንቹታ።

7 ሄ ላፑን ጋላሳታን ኢርሾይ ጌሎንታ ኡኬል አንቴ ማና፤ አንቴ ጊዶን ኢርሾራ ዲዛይ ኣይኮይካ ቤቶፎ፤ ኔ ቢታ ዛዋን ኣዋንካ ኢርሾይ ሙሌካ ዶፖ።

8 «ሄ ጋላስ ኔ፤ ኔ ናይታስ፡ ታኒ ሃይሳ ኦሊዛይ ታኒ ጊብጾፔ ኬዚዛ ዎዴ ጎዳይ ታስ ኦሊዳይሳ ዛሪ ቆፓናሳ» ጋ ዮታ።

9 ጎዳይ አንቴና ባ ዎልቃማ ኩሼን ጊብጾፔ ኬሲዳ ጊሻስ፡ ጎዳ ዎጋይ አንቴ ዶናፔ ሻኬቶንታ ማላ፡ ሃይሲ ባኣሌዚ አንቴ ኩሼ ቦላ ቃሼቲዳኔ አንቴ ሊጾን ዎሊን ቆፍሲዛ ሚሻ ማላ ጊዳና።

10 ሄሳ ጊሻስ አንቴ ሃ ዎጋ ዎሊዲ ላይላን ላይላን ሃ ጋላሳን ቦንቺቴ።

11 «ጎዳይ አንቴሲኔ ካሴ አንቴ ኣዋታስ ኢማናሰ ጫቂዳ ማላ፡ ኢዚ አንቴና ካናኔታ ቢታ ጌልሊዲ፡ ሄ ቢታ አንቴስ ኢሚዛ ዎዴ፡

12 ኣቱማ ጊዲ ዬሌቲዳ ባይራ ኡባ ጎዳስ ዱማሲቴ፤ ኔ ሜሄ ጋርሳን ኣዴ ጊዲዲ ባይራ ዬሌቲዳይ ዉሪ ጎዳሳ።

13 ባይራ ዬሌቲዛ ሃሪ ማር ኡባ ላቃራ ላማዳ ዎዛ፤ ላማዳ ዎዛንታ ኢጲኮ ኢዛ ሞርጌን ሾጫ ዎዳ። ኔ ናይታ ጊዶን ኣቱማ ጊዲ ባይራ ዬሌቲዳይታ ኡባ ዎዛ።

14 ዎዴፔ ኔ ናይ ኔና፡ «ሃይሲ ኣዛ ዎጋ?» ጊ ኦይቺኮ፡ ኔ፤ ኢዛስ፡ «ጎዳይ ኡና ባ ዎልቃማ ቄሴን ኣይሌቲላ ቢታ ጊብጾፔ ኬሲዳስ፤

15 ጊብጾ ካዎይ ባ ዎዚና ሚንሊዲ ኡና ዬዶንታ ኢጲን ጎዳይ ጊብጾ ቢታን ዲዛ ባይራ ኡባ፡ ኣሳፔ ዶሚዲ ሜሄ ባይራ ጋካናስ ዎዲዳስ። ታኒ ኣዬ ኡሎፔ ኮይሮ ዬሌቲዳ ኣዴ ሜሄ ኡባ ጎዳስ ያርሺዛይሲኔ ባይራ ጊዲዳ ኣቱማ ናይታ ኡባ ዎዚዛይሲ ሄሳሳን ጋ።

16 ጎዳይ ኡና ባ ዎልቃማ ቄሴን ጊብጾፔ ኬሲዳይሳስ፡ ሃይሲ አንቴስ ኩሼን ቃቺዳ ማላታኔ ሊጾ ቦላ ዎሊዳ ማላታ ማላ ጊዳና» ጊዳስ።

### ጎዳይ ባ ኣሳ ካሌሌስ

17 ካዎይ ኣሳ ዬዲዳ ዎዴ ጸሲ ኢስታ ፊሊስጾሜ ቢታራ ካንሊሲዛ ኦጌይ ማታ ሺን ሄ ኦጌዛራ ኤፊቤና፤ ጋሶይካ ጸሲ፡ «ኣሳይ ኦላ ቤይኮ ባ ቆፋ ላሚዲ ጉዬ ጊብጾ ሲማናኮ» ጊዲ ቆፒዳስ።

18 ሄሳ ጊሻስ ጸሲ ኣሳ ባዞ ኦጌራ ዩሺዲ፡ ዞኦ ኣባኮ ካሌሊዳስ። ኢስራኤሌ ኣሳይ ጊብጾ ቢታፌ ኦላስ ጊጌቲዳ ኣሳ ማላ ጊጌቲዲ ጊብጾፔ ኬዚዳስ።

19 ዮሴፌይ ኢስራኤል አሳ፥ «ጸሲ ቱማፔ ኢንቴና ማዳና ያና፤ ሄ ዋዴ ኢንቴ ታ ሜቄላ ሃይሳፌ ኢንቴናራ ኤኪ ቢቴ» ጊዲ ጫቄሊ ዋሊዳ ገሻሽ ሙሴይ ኢዛ ሜቄላ ባናራ ኤኪ ቢዳሰ።

20 ኢስቲ ሱኮቴፔ ዳንዲዲ ባዞ ዶናን ዲዛ ኤታሜ ጌቴቲዛሶን ኡቲዳ።

21 ኢስቲ ጋላሲካ ቃማካ ሄሜታና ማላ ጎዳይ ኢስታ ኦጌ ቤሳናሰ ቱሳ ማላ ኤቂዳ ሻራን ጋላሰ፥ ቱሳ ማላ ኤቂዳ ታማን ኦማርሰ ኢስታ ካሌሊዳሰ።

22 ጋላሰ ቱሳ ማላ ኤቂዳ ሻራይ፥ ኦማርሰ ቱሳ ማላ ኤቂዳ ታማይ አሳ ሲንላፌ ኡባ ዋዴ ሻኬቲቤና።

## 14

### ኢስራኤል አሳይ ዞኦ አባ ፒኔል

1-2 ሄሳፌ ጉዬ ጎዳይ ሙሴስ፥ «ኢስቲ ጉዬ ሲሚዲ ሚጊዶሌፔኔ አባፌ ጊዶን፥ ፒሃሂርቴ አቻን ኡታና ማላ ዴራሰ ዮታ፤ ኢስቲ አባ አቻን ባኣሊ-ጳፎኔ ሲንላን ባዛን ኡቴቶ።

3 ገብጼ ካዎይ፥ «ባዛን ኦጌይ ጎርዴቲ ጳዩን ኢስራኤል አሳይ ቢዛሶ ጳይዲ ጮ ቶይላቴሰ» ጊዲ ቆጋና።

4 ታኒ ካዎዛ ዋዚና ሚንላና፤ ኢዚ ኢስታ ጎዳና፤ ታኒ ካዎዛ ባጋራኔ ኢዛ ኦላንቻታ ኡባ ባጋራ ቦንቼታና፤ ገብጼ አሳይካ ታኒ ጎዳ ጊዲዳይሳ ኤራና» ጊዳሰ። ሂሰቲን ኢስራኤል አሳይ ኢዚ ዮቲዳ ማላ ኦሊዳሰ።

5 አሳይ ኬሲ ኤኪ ቢዳይሳ ገብጼ ካዎሰ ዮቲን፥ ኢዚካ ዳናታ ኢስራኤል ናይታ ገሻሽ ቆፒዳ ባ ቆፋ ላሚዲ፥ «ኦኒ ሃይሳሶ አዛሰ ኦሊዳኒ? ኦኒ ኢስራኤል ናይታ ዬዲዲ ኢስቲ ኦሰ ኦሊዛ ዋልቃፌ ሜላ ኦቲዶስ» ጊዳ።

6 ሄሳ ገሻሽ ካዎዚ ባ ፓራ-ጋሬዛ ኮሪዲ ኦላንቻታ ባናራ ኤኪ ቢዳሰ።

7 ኢዚ ኡባፌ አጂዛ 600 ፓራ-ጋሬታ፥ ቃሴ ገብጼ ቢታን ዲዛ ፓራ-ጋሬታ ኡባ ቦላካ ኦላ ሃላቃታ ዋሊ ኤኪ ቢዳሰ።

8 ጎዳይ ገብጼ ቢታ ካዎ ዋዚና ሚንሊን ሚኖቴላራ ቡሮ ቡሳ ቦላ ዲዛ ኢስራኤል አሳ ጎዲዳሰ።

9 ገብጼ አሳይ ካዎ ፓራ-ጋሬቲ ወሪ ፓራ አሳቲኔ ኦላንቻቲ ኢስራኤል ናይታ ካሊ ጎዲዳ። አባ ዶናን ባኣሊ-ጳፎኔ ሲንላን ዲዛ ፒሃሂርቴ አቻን ኢስቲ ኡቲ ዲሺን ዳሚዳ።

10 ካዎዚ ማቲግዲን ኢሰራኤል አሳይ ጉዬ ጸሊዛ ወዴ፤ ጊብጾ አሳይ ኢስታ ጉዬራ ካሊ ዪዛይሳ ቤኢዲኔ ዳርፔ ባቢዲ ጎዳሰ ዋሲዳ።

11 ኢስቲ ሙሴስ፡ «ኔኒ ኑና ጊብጾ ቢታን ኑስ ዱፎይ ቆዩን ባዘን ሃይቃና ማላ ኬሳዲ? ኑና ጊብጾፔ አዛሰ ኤሃዲ?»

12 ኑኒ ጊብጾን ዲሼ፤ ሉና አጋ፤ ኑኒ ጊብጾ አሳሰ ሃሬታና ጊዲ ኔስ ዮቲቤኮኒ? ባዘን ሃይቃናፔ ኢስታስ ሃሬቲዛይሲ ኑስ ሎኦኮሺን» ጊዳ።

13 ሙሴይ አሳ፡ «ባቦፍቲ፤ ሚኒ ኤቂቲ፤ ጎዳይ ሃች ኢንቴና አሻናይሳ ኢንቴ ቤያና። ሃች ኢንቴ ቤኢዛ ጊብጾ አሳ ናምኣንላ ሙሴካ ቤኤኬታ።

14 ኢንቴ ጊሻሰ ጎዳይ ኦሌታና፤ ኢንቴፌ ኮዬቲዛይ ጮኡ ጉስ ጸላላ» ጊዳሰ።

15 ጎዳይ ሙሴ፡ «ኔኒ ታኮ አይሰ ዋሳይ? ኢሰራኤል አሳይ ጊዳ ሲንፊ ባና ማላ ዮታ።

16 ኢሰራኤል አሳይ ማላ ቢታ ቦላራ አባ ፒኒ ባና ማላ ኔ ጉፌ ዴንላዳኔ ኔ ኩሼ አባ ቦላ ፒዲሳዳ ሃላ ናምኡ ኬሳ ሻካ።

17 ታኒ ጊብጾ አሳ ዋዚና ሚንሒኮ ኢስቲ ኢንቴ ጉዬ ካሊዲ አባን ጌላና። ታኒ ካዎዛኔ ኢዛ ኦላንቻታ ኡባ ቦላ፡ ኢዛ ፓራ-ጋሬታኔ ቶጋ አሳታ ቦላ ታስ ቦንቾ ዴማና።

18 ታኒ ካዎዛ ባጋራ ኢዛ ፓራ-ጋሬታ ባጋራኔ ኢዛ ቶጋ አሳታ ባጋራ ታስ ቦንቾ ዴሚዳ ወዴ ታኒ ጎዳ ጊዲዳይሳ ጊብጾ አሳይ ኤራና» ጊዳሰ።

19 ሃሳፌ ጉዬ ካሴ ኢሰራኤል አሳ ሲንላራ ቢዛ ጸሳ ኪታንቻይ አሳፔ ጉዬ አዲ ኤቂዳሰ። ቱሳ ማላ ሻራይካ ኢስታ ሲንላፌ ጉዬ ባጋ ዩዩዲ፤

20 ጊብጾ አሳሲኔ ኢሰራኤል ናይታስ ጊዶን አዲ ኤቂዳሰ። ሄ ሻራይ ኦማርሰ ኢሲ ባጋራ ቆሚሲዲ ሃንኮ ባጋራ ፖኢሲዳሰ፤ ሂሰቲን ኦማርሰ ኩሜላ ኢሶይ ኢሳኮ ሺቃና ዳንዳይቤቴና።

21 ሃሳፌ ጉዬ ሙሴይ አባ ቦላን ባ ኩሼ ፒዲሲዳሰ፤ ጎዳይ ሄ ጋላሳ ኦማርሰ ኩሜላ አርሼይ ሞኪዛ ባጋፌ ዋልቃማ ጫርኮ ዩዲዲ፡ አባ ሻኪ ሻኪዲ ማላ ቢታ ኬሲዳሰ። ሃሳይካ ናምኣን ሻኬቲዳሰ።

22 ኢሰራኤል አሳይ አባ ጊዶን ማላ ቢታራ ሄሜቲዲ ሃላ ኢስታስ ኡሻቻራኔ ሃዲርሳራ ጎዳ ማላ ኤቂን ቢዳ።

23 ጊብጾ አሳይ ካዎ ፓራቲ ወሪ፥ ፓራ-ጋሬቲኔ ቶጋ አሳይ ኢስታ ጎዲ ኤኪዲ አባ ጊዶ ጌሊዳ።

24 ቡሮ ባዞይ ዘእናፔ ካሴቲዲ \* ጎዳይ ታማኒኔ ቱሳ ማላ ሻራን ጊዲዲ፥ ጊብጾ ኦላንቻታ ጸሊዳ ዋዴ ኢስታ ዋዚናይ ጳይዴስ።

25 ጎዳይ ኢስታ ፓራ-ጋሬታ ቶሆ ቃቺ ኦይኪዳ ጊሻሰ ላሳይ ባና ዋዩሲን ጊብጾ አሳይ፥ «ጎዳይ ኢስታ ማዲዲ ጊብጾ ኦሊዛ ጊሻሰ እኔ ኩኒ ኢሰራኤል አሳፔ ባቃቶስ» ጊዳ።

26 ጎዳይ ሙሴ፥ «ሃላይ ጊብጾ አሳ ቦላ፥ ኢስታ ፓራ-ጋሬታ ቦላኔ ቶጋ አሳታ ቦላ ጉዬ ጎጋና ማላ ኔ ኩሼ አባ ቦላ ፒዲሳ» ጊዴስ።

27 ሙሴይ ባ ኩሼ አባ ቦላ ፒዲሲዴስ፤ ጋዴይ ዋንቲሺን አባይ ካሴ ባ ዲዛ ሶሆ ጉዬ ሰሚዴስ፤ ጊብጾ አሳይ ጌዴ ኢዛ ጊዶ ባቃቲሺን ጎዳይ ጊብጾ አሳ ሄን አባ ጊዶን ዩጊዴስ።

28 ሃላይ ጉዬ ሰሚዲ ፓራ-ጋሬታ ቶጋ አሳታኔ ኢሰራኤል ናይታ ካሊዲ አባን ጌሊዳ ካዎ ኦላንቻታ ሙሌ ሚቲ አጊዴስ፤ ኢስታፊ ኢሳዴይካ አቲቤና።

29 ጊዶ አቲን ኢሰራኤል አሳይ ሃሊ ኢስታሰ ኡሻቻራኔ ሃዲርሳራ ጎዳ ማላ ኤቂ ዲሺን አባ ጊዶራ ሜላ ቢታ ቦላራ ሄሜቲ ቢዴስ።

30 ጎዳይ ሄ ጋላሰ ኢሰራኤል አሳ ጊብጾ አሳ ኩሼፔ ሃይሳላ አሺዴስ። ቃሴ ኢሰራኤል አሳይ ጊብጾ አሳ አሃ አባ ዶናን ቤኢዴስ።

31 ጎዳይ ጊብጾ አሳ ቦላ ቤሲዳ ጊታ ዋልቃ ቤኢዲ ኢሰራኤል አሳይ ጎዳሰ ባቢዴሲኔ ኢዛኔ ኢዛ አይሌ ሙሴካ አማኒዴስ።

## 15

### ሙሴ ዬላ

1 ሄ ዋዴ ሙሴይኔ ኢሰራኤል አሳይ ሃይሳ ዬላዛ ጎዳሰ ዩጲዴስ፤

«ቦንቾን ኢዚ ኬሂ  
 ጶቁ ጶቁ ጊዳ ጊሻሰ፥  
 ታኒ ጎዳሰ ዬላ  
 ዩጲና።»

\* 14:24 ባዞይ ዘእናፔ ካሴቲዲ፡ ባዞይ ዘእናፔ ካሴቲዲ ጊዛይሳ ኢሲ ኢሲ ባጋ ጋዋላ ቃላራ ዚሮይ፥ ሶሴይ ዘእናፔ ካሴቲዲ ጌቴቴስ።

ፓራኔ ፓራ ቶጊዳ አሳ  
አባ ጊደን ዩጊዴሰ።

2 ጎዳይ ታሰ  
ዋልቃኔ ዩላ፤  
ኢዚ ታና አሺዴሰ።  
ኢዚ ታ ጸሳ፤  
ታኒ ኢዛ ሳባና።  
ኢዚ ታ አዋ ጸሳ፤  
ታኒ ኢዛ  
ጶቁ ጶቁ ሂሰታና።

3 ጎዳይ ኦላንቻ፤  
ኢዛ ሱንሒካ ጎዳ።

4 ጊብጾ ካዋ ፓራ-ጋሬታኔ  
ኢዛ ኦላንቻታ  
አባን ወርሲዴሰ፤  
ኡባፌ አፂ ደሬቲዳ  
ጊብጾ ካዋ ሃለቃቲ፥  
ዞኦ አባን ሚቴቲዳ።

5 ጨማ ሃሊ  
ኢሰታ ካሚዴሰ፤  
ኢሰቲ ሹቻሉ  
ጨማን ሚቴቲዳ።

6 «አቤት ጎዳዉ!  
ኔ ኡሻቻ ኩሼይ  
ዋልቃን ጎቢዴሰ፤  
ጎዳዉ ኔ ዋልቃማ  
ኡሻቻ  
ኩሼይ ሞርኬ  
ሜንጼሬሊዴሰ።

7 ኔ ጊታ ዋልቃን  
ኔናራ ኤቁቲዳይታ  
ኩንዲሳዳሳ።  
ኤጺዛ ኔ ሃንቆ ኔ ዩዳዳሳ፥  
ኢዚካ ኢሰታ  
ጋፌ ማላ ሚዴሰ።

8 ኔ ፔኖይ

ሃላ ፑዴ ኤሲ ደሪዴስ።  
 ጎጊዛ ሃሊካ ጎዳ ማላ  
 ሚኒ ኤቂዴስ፤  
 ጨማ ጊዶን ዲዛ ሃሊ  
 አባ ጊዶን ኢርኪዴስ።

9 «ሞርኬይ ጨቁቲሼ፥

ጎታኒ ኢስታ ዩዴላ ኦይካና።  
 ታኒ ኢስታ ሃሮ ሻካዳ፥  
 ታ ኮዩዳይሳ ኡባ ኤካና።  
 ታኒ ታ ጊላ  
 ማሻ ሾዳዳ፥  
 ኢስታ ዳይሳና ጊዴስ።

10 ጊዶ አቲን ኔኒ ኢስታ

ኔ ፔኖን ፑኒን፥  
 አባይ ኢስታ ካሚዴስ።  
 ኢስቲ ዋልቃማ ሃላን  
 ቢራታይ ሚቲቲዛ ማላ  
 ሚቲቲዳ።

11 «አቤት ጎዳዉ!

ኤቃ ጸሳታ ጊዶን  
 ኔ ማላይ ኦኔ?  
 ጌሻቴላን  
 ቦንቴቲዛይ፥  
 ቦንቾን ባቢሲዛይ፥  
 ማላሊሲዛ ሚሽ ኦሊዛይ  
 ኔ ማላይ ኦኔ?

12 ኔኒ ኔ ኡሻቻ

ኩሼ ፒዲሳዳሳ፥  
 ቢታይካ ኢስታ ሚቲዴስ።

13 «ኔ ዋዚዳ ኔ አሳ

ዉሮንታ ኔ ሲቆን  
 ካሌላዳሳ።

ኔኒ ኔ ዋልቃን

ኢስታ ኔ አቂዛ

- ጌሻ ሶ ጌልላዳሳ።
- 14 ዳሬ አሳይ  
ሄሳ ሲጸዱ ኮኮሪደሰ።  
ፊሊስጶሜ ቢታ አሳታካ  
ሂርጋ ሚጸይ ኦይኪደሰ።
- 15 ሄ ዋዴ ኤደሜ ቢታ  
ሃላቃቲ ዳጋሚዳ።  
ሞኦቤ ቢታ ሃሪዛይቲ  
ሂርጋን ኮኮሪዳ።  
ካናኔ ዳሬ አሳይ  
ወሪ ሴሪደሰ።
- 16 አቤት ጎዳዉ!  
ዳጋማይኔ ሂርጋይ  
ኢሰታ ኦይካና።  
ኢሰቲ ኔ ዋልቃ  
ጌታቴላ በኢዲ፥  
ኔ አሳይ አቆና ጋካናሰ፥  
ኔኒ ዋዚዳ አሳይ  
አቆና ጋካናሰ፥  
ሹቻ ማላ ቶሌቲ ኤቃና።
- 17 ኔኒ ኢሰታ ኤሃዳ፥  
ኔሰ ቡዞ ቢታን ዲዛ  
ዙማ ሁኤን ቶካና።  
አቤት ሜርና ጎዶ፥  
ሄ ሶሆይ  
ኔኒ ኔሰ ዴያናሰ  
ኦሊዳ ሶሆኮ።  
አቤት ጎዳዉ! ሄ ጌሻ ሶሆይ  
ኔኒ ኔ ኩሼን  
ሚንላ ኤሲዳ ሶሆኮ።
- 18 ጎዳይ ሜርናፔ  
ሜርና ጋካናሰ ካዎታና።»
- 19 ጌብጾ ካዎ ፓራቲ ወሪ፥ ፓራ-ጋሬቲኔ ቶጋ አሳቲ አባን  
ጌሊዳ ዋዴ ጎዳይ ኢሰታ ቦላ አባ ሃላ ጉዬ ዛሪ ኤሂደሰ፤ ጌዶ  
ኣቲን ኢሰራኤሌ አሳይ አባ ጌዶራ ሜላ ቢታ ቦላራ ሄሜቲዲ  
ፒኒደሰ።

20 እርኔ መቼያ፥ ናቤ ማራማ ካራቤ ኤካዱስ፤ ማጫሳይ ወሪ ካራቤ ባቂዱ ዩጲሼኔ ጉፒሼ ኢዞ ካሊዳስ።

21 ማራማ ኢስታስ ዩፋዛ ዩጲሼ፥  
«ጎዳይ ኬሂ ቶቁ ቶቁ

ጌዳ ጌሻስ ኢዛስ ዩጲቲ።  
ፓራኔ ፓራ ቶጌዳይታ  
ኢዚ አባን ኦሊዳስ»  
ጋ ዩጲዱስ።

### ጨዋ ሃል

22 ሄሳፌ ጉዬ ሙሴይ ኢሰራኤል አሳ ዘኦ አባፌ ፒንሊን ኢስቲ ሹራ ጌቲቲዛ ባዞ ቢዳ። ሄ ባዞን ኢስቲ ሃል ዳሞንታ ሄቩ ጋለስ ሄማቲዳ።

23 ኢስቲ ማራ ጌቲቲዛሶ ጋኪዳ ዋዴ ማራ ሃል ጨዋ ጌዳዳ ጌሻስ ኡያና ዳንዳይቤቲና፤ ሄሳ ጌሻስ ሄ ሶሆይ ማራ ጌቲቲዳስ።

24 አሳይካ፥ «ኑኒ አይ ኡያኔ?» ጌዳ ሙሴ ቦላ ዙዙሚዳስ።

25 ሙሴይ ጎዳስ ዋሲን ጎዳይ ኢዛ ኢሲ ሚል ቤሲዳስ፤ ሙሴይ ሄ ሚላ ሃላን ዩጌን ሃላይ ማልኢዳስ።

26 ሄን ጎዳይ ኢስታስ ዋጋኔ ማራ ኬሲዳሲኔ ኢስታ ፓጪዳስ።

27 ኢዚ ኢስታስ፥ «ጎዳ ኢንቲ ጸሳይ ዮቲዛይሳ ኢንቲ ሎኤሊ ሰዪኮ፥ ኢዛ አይፌ ሲንሳን ሎኦ ኦሊኮ፥ ኢንቲ ኢዛ አዛዞ ዋዚናን ዋሊ ናጊኮ፥ ኢዛ ዋጋካ ኡባ ናጊኮ፥ ታኒ ጌብጼ አሳ ቦላ ኤሂዳ ሃርጌፌ ኢሳካ ኢንቲ ቦላ ኤሂኬ፤ ጋሶይካ ታኒ ኢንቲና ፓሊዛ ጎዳ» ጌዳስ።

27 ሄሳፌ ኢስቲ ታማኔ ናሞኡ ሃላ ፑልቶቲኔ ላፑን ታሙ ዛምባ ሚላቲ ዲዛሶ ኤላሜ ዪዲ ሄን ሃላ ዶናን ኡቲዳ።

## 16

### ማናኔ ኩራቾታ

1 ጌብጼፔ ኬዚዳ ናሞኦንሶ አገናን፥ ታማኔ ኢቻሻንሶ ጋላሳን ኢሰራኤል አሳ ማባራይ ኩሚል ኤላሜፔ ዴንዲ ቢዲ ኤላሜፔኔ ሲናፔ ጌዶን ዲዛ ሲኔ ጌቲቲዛ ባዞ ዪዳ።

2 ኢሰራኤል አሳ ማባራይ ወሪ ባዞን ሙሴ ቦላኔ እርኔ ቦላ ዙዙሚዳስ፤

3 «ጎዳይ ኑና ጌብጼ ቢታን ባ ኩሼን ዋጂዳኮ ሎኦኮሺን! ሄን ኑኒ አሾ ሚዛ ኬሬዛ \* ዩዪ አጂ ኡቲዲ ኑኒ ኮዪዳ ማላ

\* 16:3 ኬሬዛ፡ ኬሬዛ ጌቲቲዛይሲ ኢሲ ኢሲ ባጋ ጋሞሶ ቃላራ አሾ ኢዛ ቦላ ዋሊ ሚዛ ሚሻ ጉሳ።

ካል ካሊ ሚዶስ፤ ጊዶ አቲን አንቴ ኑና ሄፔ ኬሲዲ ሃይሳ ዴራ ኡባ ጋፋን ዋጃናስ ሃ ባዞ ኤሂዴታ» ጊዳ።

4 ሂሰቲን ጎዳይ ሙሴስ፡ «ታኒ አንቴስ ሳሎፔ ሚዛ ካል ቡኪሳና፤ አሳይ ኡባ ጋላሲካ ኬዚዲ ሃቺስ ሃቺስ ጊዳናዝ ጸላላ ማጻና ኮሼስ። አሳይ ታ ኣዛዞ ካሊዛኮኔ ካሎንታኮ ታኒ አሰታ ሄሳን ፓጫ ጸላና።

5 ኡሱፑንፉ ጋላስ አሰቲ ሃራ ዋዴ ማጺዛይሳስ ናምኡ ኩሼ ማጺዲ ካፊቶ» ጊዳስ።

6 ሄሳ ጊሻስ ሙሴይኔ ኣሮኔይ አሰራኤሌ አሳ ኡባስ፡ «አንቴና ጊብጼ ቢታፌ ኬሲዳይ ጎዳ ጊዲዳይሳ ሃቶ ኦማርስ አንቴ ኤራና።

7 ቃሴ አዛ ቦላ አንቴ ዙዙሚዳይሳ አዚ ሲዪዳ ጊሻስ ማላዶ አንቴ ጎዳ ቦንቾ ቤያና። አንቴ ኑ ቦላ ዙዙማናስ ኑኒ ኦኔ?» ጊዳ።

8 ሄሳፌ ጉዬ ሙሴይ፡ «አንቴ አዛ ቦላ ዙዙሚዳይሳ አዚ ሲዪዳ ጊሻስ አዚ አንቴስ ማናስ ኦማርስ አሾ አሚኮ አንቴ ኮዪዳ ማላ ሚዛ ኡቤላካ ኡባ አንቴስ ማላዶ አማና። ኑ ኦኔ? አንቴ ጎዳ ቦላ ዙዙሚዳታ አቲን ኑ ቦላ ዙዙሚቤኬታ» ጊዳ።

9 ሙሴይ ኣሮኔስ፡ «ኔኒ አሰራኤሌ አሳ ማባራ ኡባ፡ ሳዳይ አንቴ ዙዙንፋ ሲዪዳ ጊሻስ ጎዳ ሲንል ሺቂቱ» ጋ ዮታ» ጊዳስ።

10 ኣሮኔይ አሰራኤሌ አሳ ማባራ ኡባስ ዮቲዳ ማላ አሳይ ባዞ ሲሚ ጸሊሺን ሄን ጎዳ ቦንቾይ ሻራራ ቆንጨዳይሳ ቤኢዳ።

11-12 ጎዳይ ሙሴስ፡ «ታኒ አሰራኤሌ ናይታ ዙዙንፋ ሲያዲስ፤ ኔኒ አሰታስ፡ ሕንቴ ኦማርሳ ዋዴ አሾ ማና፤ ማላዶ ኡኬል ካላና፤ ሄ ዋዴ ታኒ ጎዳ አንቴ ጸሳ ጊዲዳይሳ አንቴ ኤራና» ጋዳ ዮታ» ጊዳስ።

13 ሄ ጋላሳ ኦማርሳ ዋዴ ኩራቾቲ ዪዲ አሰራኤሌ አሳይ ዲዛሶን ኩሚዳ፤ ቃሴ ማላዶ አሰቲ ዲዛሶ ዩሾን ጸዛይ ማይኢ ኡቲዴስ።

14 ጸዛይ ጸሰኪሺን ቢታ ቦላን ቦላ ሻቶ ሚሳቲዛ ሊቆ ሚሺ ቤቲዴስ።

15 አሰራኤሌ አሳይ ሄሳ ቤኢዲ ባ ጋርሳን አሶይ አሳ፡ «ሃይሲ ኣዜ?» ጊዳ። ኣይስ ጊኮ አሰቲ አዚ ኣዛኮ ኤሪቤቴና።

ሂሰቲን ሙሴይ አሰታስ፡ «አንቴስ ማናስ ጎዳይ አሚዳ ካል ሃይሳኮ።

16 ጎዳይ፥ «አሳይ ኢሶይ ኢሶይ ባስ ማናስ ኮሺዛ ማላ ሺሾ፤ ኢንቴ ሶ አሳስ ሁኡን ሁኡን ኢሲ ኢሲ ኪሎኔ ባጋ ኤኪቴ» ጊዳሳ፡፡

17 ኢሰራኤል አሳይ ሙሴይ ኢስታስ ዮቲዳ ማላ ኦሊዳስ፤ ባጋይ ዳርሲዲ ባጋይ ቃሴ ጉሊዲ ሺሺዲ፡፡

18 ሺሺዲ ኢስቲ ማኪን ዳርሲዲ ሺሺዳይሳስ ፓላሂቤና፤ ጉል ሺሺዳይሳስካ ፓፊቤና፤ ወሪካ ኢሶይ ኢሶይ ባስ ጊዲዛ ማላ ሺሺዳስ፡፡

19 ሄሳፌ ጉዬ ሙሴይ ኢስታስ፥ «ኦኒካ ኢዛፔ ዋንቶስ አሾፎ» ጊዳሳ፡፡

20 ጊዲኮካ ኢስታፌ ባጋይ ሙሴይ ዮቲዳይሳ ኤኮንታ አጊዲ አቲዳይሳ ዋንቶ ማላዶ ጋካናስ ዋሊዳ፤ ዋሊዳይሲካ ጉጵኒዲ ጸንቂዳስ፡፡ ሄሳ ጊሻስ ሙሴይ ኢስታ ሃንቄቲዳስ፡፡

21 ማላዶ ማላዶ አሳይ ወሪ ባስ ኮሺዛይሳ ላጌ ሺሺዳስ፤ አርሼይ ሚቺዛ ዋዴ ቢታን አቲዳይሲ ማዴዳስ፡፡

22 ኡሱፑንላ ጋላሳን ኢስቲ ካሴይሳስ ናምኡ ኩሼ ኢሲ ኢሲ አሳስ ሄቹ ኪሎ ሺሺዲ፡፡ ሂስቲን ማባራ ሃላቃቲ ወሪ ዪዲ ሄሳ ሙሴስ ዮቲዳ፡፡

23 ኢዚ ኢስታስ፥ «ጎዳይ አዛዚዳይሲ ሃይሳ፤ ዋንቶይ ሸምፖ ጋላሳ፥ ጎዳስ ጌሻ ሳምባታ፡፡ ሄሳ ጊሻስ ኢንቴ ኡካናይሳ ኡኪቴ፤ ኢንቴ ዶይሳናይሳካ ዶይሲቴ፤ ፓላሂዳይሳ ዋንቶስ አሺቴ» ጊዳሳ፡፡

24 ሄሳ ጊሻስ ኢስቲ ሙሴይ አዛዚዳ ማላ ዋንቶስ ዋሊን ጸንቂቤና ዋይኮ ጉጵኒቤና፡፡

25 ዋንቴላ ጋላስ ሙሴይ ኢስታስ፥ «ሃይሳ ሃች ሚ ወርሲቴ፤ አይስ ጊኮ ሃች ጎዳ ሳምባታ፤ ኢንቴ ኢዛ ሃች ዴምባን ዴሜኬታ፡፡

26 ኢንቴ ኡሱፑን ጋላሳን ኢዛ ሺሺቴ፤ ጊዶ አቲን ላፑንላ ጋላሳይ ሳምባታ ጊዲዳ ጊሻስ አይኮይካ ዴና» ጊዳሳ፡፡

27 ጊዶ አቲን ኢሲ ኢሲ አሳቲ ላፑንላ ጋላሳን ሺሻናስ ኬዚዳ ሺን አይኮካ ዴሚቤቴና፡፡

28 ጎዳይ ሙሴስ፥ «ኢንቴ ታ አዛዞኑ ታ ዋጋታ ናኅዛ አይዴ ጋካናስ ኢጸኔ?»

29 ታ ኢንቴስ ሳምባታ ኢሚዳይሳ አኬኪቴ፤ ኡሱፑንላ ጋላሳን ታ ኢንቴስ ናምኡ ጋላሳስ ካል ኢሚዳይሲ ሄሳ ጊሻሳ፡፡ ላፑንላ ጋላስ ወሪካ ባ ዲዛሶን ዲዛሶን ታኮ፤ ኦኒካ አዋካ ቦፖ» ጊዳሳ፡፡

30 ሄሳ ጊሻሰ አሳይ ላፑንፋ ጋላሳን ሾምፒደሰ።

31 ኢስራኤል አሳይ ሄ ካፋዛ ማና ተ ጊ ሱንሊደሰ። ኢዚካ ደቦ አይፌ ማላ ጊዲዲ ቦላ፤ ኤሳራ ኡኬቲዳ ኡኬፋ ማላ ማልኤሰ።

32 ሙሴይ ኢስራኤል አሳሰ፡ «ጎዳይ አዛዚዳይሲ ሃይሳ፡ ታኒ ኢንቴና ጊብጼ ቢታፌ ኬሲዳ ዋዴ፡ ባዞን ሚዚዳ ካፋ ኢስቲ ቤያና ማላ፡ ማናፌ ኢሲ ኢሲ ኪሎኔ ባጋ ኢንቴ ሲንፋፌ ያና ዩሌታታሰ አሺ ዋሊቴ፡ ጊ አዛዚደሰ» ጊደሰ።

33 ሂሰቲን ሙሴይ አሮኔ፡ «ኢሲ ጸሮ ኤካዳ ኢሲ ኪሎኔ ባጋ ጊዲዛ ማና ኢዛን ቆላ፤ ሂሰታዳ ያና ዩሌታታሰ ሚንጃና ማላ ጎዳ ሲንፋን ዋላ» ጊደሰ።

34 ጎዳይ ሙሴ አዛዚዳ ማላ ሚንጃናሰ፡ አሮኔይ ማና ጎዳ ማርካ ታቦታ ሲንፋን ዋሊደሰ።

35 ኢስራኤል አሳይ ባ ዳና ቢታ ቢ ጋካናሰ ኦይዱ ታሙ ላይሰ ኩሜሰ ማና ሚዳ፤ ኢስቲ ካናኔ ቢታ ዛዋ ጋካናሰ ማና ሚሼ ዴኢዳ።

36 ኢሲ ኪሎይኔ ባጋይ ሄ ዋዴ ማኪዛ ጊታ ማካ ሚሻሰ ታማፌ ኢሲ ኩሼኮ።

## 17

ዛላ ሹቻፌ ሃፋ ኬሰ

(ዛሬ 20:1-13)

1 ኢስራኤል ማባራይ ዉሪ ጎዳይ አዛዚዳ ማላ ሲና ጌቴቲዛ ባዞፌ ዴንዲ ቢዲ ኤራፊዲሜ ጌቴቲዛሶን ኡቲደሰ፤ ጊዶ አቲን አሳሰ ኡያናሰ ሃሊ ሄን ቤቲቤና።

2 ሄሳ ጊሻሰ ኢስቲ ሙሴራ ኦዬቲዲ ኢዛ፡ «ኑሰ ኡያና ሃላ አማ» ጊዳ።

ሙሴይ ዛሪዲ፡ «ኢንቴ ታናራ አይሰ ኦዬቴቲ? ጎዳ ኢንቴ አይሰ ፓጩቲ?» ጊደሰ።

3 ጊዶ አቲን አሳይ ሄን ሳሜቲዲ ሙሴ ቦላ ዙዙሚደሰ። ኢስቲ፡ «ኔኒ ኑና፡ ኑ ናይታኔ ኑ ሚሄ ሳሞን ዋፋናሰ ጊብጼፔ አይሰ ኬሳዲ?» ጊዲ ሙሴ ቦላ ጉጉሚዳ።

4 ሂሰቲን ሙሴይ፡ «ታኒ ሃ አሳ ዋሰቶ? ኢስቲ ታና ሹቻን ጫዳና ጌቴሰ» ጊዲ ጎዳኮ ዋሲደሰ።

† 16:31 ማና፡ ማና ጉሲ ኢብራዌታ ቃላራ፡ «ሃይሲ አዜ?» ጉሳ።

16:31

ታይ 11:7-8 16:33 ኢብ 9:4

5 ጎዳይ ሙሴ፥ «ኢስራኤል አሳ ጨማታፔ ኔናራ ኤካዳ፥ ካሴ ኔኒ አባዬ ሻፋ ሃላ ኢዛራ ሾጪዳ ጉፌዛ ኔ ኩሼን ኦይካዳ አሳፔ ሲንሐ ባ።

6 ታኒ ሲና ዙማን ዲዛ ዛላ ቦላ ሄን ኔ ሲንላን ኤቃዳ ናጋና፤ ኔኒ ሄ ዛላ ሾጪ፤ አሳይ ኡያና ማላ ሃላ ኢዛፔ ኬዛና» ጊን ሙሴይ ኢስራኤል ጨማታ ሲንላን ኢዚ ጊዳ ማላ ኦሊዴሰ።

7 ኢስራኤል አሳይ፥ «ጎዳይ ኦ ጊዶን ዲዜዬ? ዴኔ?» ጊ ጎዳ ፓጪዲ ኦዬቲዳ ጊሻሰ ሄ ሶሆዛ ሙሴይ ማሳኔ \* ማሪባ † ጊ ሱንሐዴሰ።

### አማሌቂታ ጸኔቲስ

8 አማሌቂ አሳይ ዪዲ ኤራፊዲሜን ኢስራኤል ናይታ ኦሊዴሰ።

9 ሙሴይ ኢያሶ፥ «ኔኒ ኑሰ አሳ ጋርሳፌ ኢሲ ኢሲ አሰ ዶራ ኤካዳ ዋንቶ አማሌቂታራ ኦሌታና ኬዛ፤ ታኒካ ጸሳ ጉፌ ኦይካዳ ቋቃሶሆን ኤቃና» ጊዴሰ።

10 ኢያሶይ ሙሴይ ጊዳ ማላ፥ አማሌቂታራ ኦሌቲዴሰ። ሙሴይ፥ አሮኔይኔ ሁሬይ ቋቃሶ ኬዚዳ።

11 ሙሴይ ባ ኩሼ ፑዴ ዴንሐሺን ኢስራኤል አሳይ ጸኔሰ ሺን ኢዚ ባ ኩሼ ዚቂሲሺን አማሌቂ አሳይ ጸኔሰ።

12 ሙሴ ኩሼይ ኢጾቲሺን አሮኔይኔ ሁሬይ ሹቕ ኤኪ ኤሂዲ ሙሴ ኢዛ ቦላ ኡቲሲዳ። ኢሰቲ ኢሶይ ኢሲ ባጋራ ኡሻቻ ኩሻ ኢሶይ ኢሲ ባጋራ ሃዲርሳ ኩሻ ቋ ሂሰቲ ኦይኪዳ። ሂሰቲን አርሼይ ዉላና ጋካናሰ ኢዛ ኩሼይ ቋ ጊ ጋሞኢዴሰ።

13 ሄሳ ጊሻሰ ኢያሶይ አማሌቂ ኦላንቻታኔ አማሌቂ አሳ ጊላ ማሻን ጸኒዴሰ።

14 ሄሳፌ ጉዬ ጎዳይ ሙሴሰ፥ «ታኒ አማሌቂ አሳይ ቆፌቶንታ ማላ ኢሰታ ቢታ ቦላፌ ኩሜሐ ቆይሳና። ሃይሲ ኡባ ዋዴ ቆፌታና ማላ ማጸፋን ጸፋዳ ኢያሶሰ ናባባ ሲሶንታ አጎፋ» ጊዴሰ።

15 ሙሴይካ ያርሾ ያርሺዛሶ ኦሊዲ፥ «ጎዳይ ታ ባንዲራ» ጊ ሱንሐዴሰ።

16 ቃሴካ፥ «ቱማፔ ጎዳይ ባ ኩሼ ዴንሐዲ ዬሌታፔ ዬሌታ ጋካናሰ አማሌቂታራ ኦሌታናሰ ጫቂዴሰ» ጊዴሰ።

\* 17:7 ማሳ፥ ማሳ ጉሲ ኢብራቂታ ቃላራ፥ «ፓጪቲስ» ጉሳ። † 17:7 ማሪባ፥ ማሪባ ጉሲ ኢብራቂታ ቃላራ፥ «ዙዙንሐ» ዋይኮ፥ «ፓጪቲስ» ጉሳ። 17:14 ዛሬ 25:17-19፤ 1ሳሜ 15:2-9

## 18

ሙሴ ቤኣና ዮቶሬ ማዛሙራ

1 ሚዲያሜ ቢታ ቄሴ፥ ሙሴ ቦሎ ዮቶሬይ፥ ጸሳይ ሙሴሲኔ ኢዛ ኣሳ ኢሰራኤሌ ናይታሰ ኦሒዳይሳ ሄሲካ ጎዳይ ኢሰታ ጊብጾ ቢታሬ ኬሲዳይሳ ኡባ ሲዪዳሰ።

2-3 ሄ ዋዴ ሙሴ ቦሎ ዮቶሬይ፥ ሙሴይ ጉዬ ዛሪ ሞይዚዳ ሙሴ ማቼዮ ጺፖሮኔ ኢዚ ናምኡ ናይታ ባናራ ኤኪ ዪዳሰ። ሙሴይካ፥ «ታኒ ኣሳ ቢታን ቤቲ ኣሰ ጊዳዲሰ» ጊሼ ባይራ ናዛ ጌርሾሚ ጊ ሱንሒዳሰ።

4 ቃሴካ፥ «ታ ኣዋ ጸሲ ታና ማዲዳሰ፤ ኢዚ ታና ጊብጾ ካዋ ቶራፒ ኣሽዳሰ» ጊሼ ናምኣንሖ ናዛ ኤልኤዜሬ ጊ ሱንሒዳሰ።\*

5 ሙሴ ቦሎ ዮቶሬይ ሙሴ ኣቱማ ናይታራኔ ሙሴ ማቼይራ ጊዲዲ ባዘን ጸሳ ዙማ ኣቻን ዲዛ ሙሴኮ ዪዳሰ።

6 ኢዚ፥ «ታኒ ኔ ቦሎ ዮቶሬይ፥ ኔ ማቼይራኒ ኢዚ ናይታ ናምኣታራ ኔኮ ሄ ቦሰ» ጊዲ ኪታ ሙሴኮ ዪዳሰ።

7 ሄሳ ጊሻሰ ሙሴይ ባ ቦሎዛራ ጋጋናሰ ኬዚዲ ሆኪዲ ኢዛ ዪራዳሰ። ኢሰቲ ኢሶይ ኢሳ ሳርሒዳፔ ጉዬ ሙሴ ዳንካኔ ጊዶ ጌሊዳ።

8 ጎዳይ ኢሰራኤሌ ኣሳ ጊሻሰ ጊብጾ ካዋ ቦላኔ ጊብጾ ኣሳ ቦላ ኦሒዳይሳ፥ ኦጌ ቦላ ኢሰታ ጋኪዳ ዳቡራኔ ጎዳይ ኢሰታ ኣሽዳይሳ ኡባ ሙሴይ ባ ቦሎዛሰ ዮቲዳሰ።

9 ኢሰራኤሌ ኣሳ፥ ጊብጾ ኣሳ ኩሼፔ ኣሻናሰ ጎዳይ ኦሒዳ ሎኦ ኦሶ ኡባ ሲዪዲ ዮቶሬይ ኡፋዬቲዳሰ።

10 «ኢንቴና ጊብጾ ኣሳ ኩሼፔ ካዋ ፓሮኔ ኩሼፔ ኣሽዳ ጎዳይ ባ ኣሳ ጊብጾ ኣሳ ኩሼፔ ኬሲ ኤኪዳይሲ ኢዚ ጋላቲቶ።

11 ኢዚ ኢሰራኤሌ ኣሳ ቦላ ኦቶሬቲዳይታሰ ሃይሳ ኦሒዳ ጊሻሰ ጎዳይ ሃራ ኤቃ ጸሳታ ኡባሬ ጎባ ጊዲዳይሳ ታኒ ሃኢ ኤራዲሰ» ጊዳሰ።

12 ሄሳሬ ጉዬ ሙሴ ቦሎ ዮቶሬይ ጸጌቲዛ ያርሾ ቃሴካ ሃራ ያርሾታ ጸሳሰ ሺሺዳሰ። ኣሮኔይኔ ኢሰራኤሌ ጪማቲ ዉሪ ጸሳ ሲንሳን ሙሴ ቦሎዛራ ካሐ ማናሰ ዪዳ።

ዴሬሰ ፒርዲዛ ኣሳቲ ዶሬቲዳ  
(ዛሬ 1:9-18)

18:2-3 ኬሳ 2:21-22 18:2-3 ሃዋ 7:29 \* 18:4 ኤልኤዜሬ ጉሲ ኢብራዊታ ቃላራ፥ «ጸሳይ ማዲዳሰ» ጉሳ።

13 ዋንቴላ ጋላስ ሙሴይ አሳስ ፒርዳናስ ኡቲን አሳይ ኢዛ ሲንላን ዩዲ ዩዲ ኤቂዛ ጊሻስ ሙሴይ ማላዶፔ ኦማርሳ ዋዴ ጋካናስ ኡቲዴስ።

14 ሙሴ ቦሎይ ሙሴይ አሳስ ኦሊዛይሳ ኡባ ቤኢዲ፥ «ኔኒ ሃ አሳስ ኦሊዛይሲ ሃይሲ ኣዜ? ሃይሲ አሳይ ወሪ ማላዶፔ ደሚዲ ኦማርሳ ዋዴ ጋካናስ ኔ ሲንላን ዩዲ ዩዲ ኤቂሺን፥ ማዶይ ባይንዳ አሳ ማላ ኔኒ ኔርካ ኣይስ ፒርዳስ ኡታዲ?» ጊዴስ።

15 ሂስቲን ሙሴይ ባ ቦሎዛስ፥ «አሳይ ጸሳ ሼኔ ኦይቻናስ ታኮ ዩዛ ጊሻሳ።

16 ኢስታ ጊዶን ዮኦይ ዲኮ ታኮ ዬቴስ፤ ታኒካ ኢስታ ጊዶን ዲዛ ዮኦ ፒርዳይስ፤ ጸሳ ማራኔ ዋጋ ኢስታ ኤሪሳይስ» ጊዴስ።

17 ዮቶሬይካ፥ «ሃይሲ ኔኒ ኦሊዛይሲ ሎኦ ዴና።

18 ኔኒኔ ኔናራ ዲዛ አሳይ ዳቡራ ጸላላ ዳቡሬታ፤ ሃይሲ ኦሲዚ ኔስ ዳሮ ዴጾ፤ ኔኒ ሃይሳ ኔርካ ኦላናስ ዳንዲያካ።

19 ኣኔ ሃኢ ታ ኔና ዘራይስ! ታ ዮቲዛይሳ ሲያ፤ ጸሲ ኔናራ ጊዶ። ኔኒ ሃ አሳ ጊሻስ ጸሳ ሲንላን ኤቃ፤ አሳዛ ዮኦካ ጸሳኮ ሺሻ።

20 ጸሳ ማራኔ ዋጋ ኢስታ ኔኒ ታማርሳ፤ ኢስቲ ዋኒ ዳናኮ ኢስቲ ኦላና ኦሶ ኢስታ ቤሳ።

21 ቃሴ አሳ ኡባ ጊዶፌ ኤራ አሳታ፥ ጸሳስ ባቢዛይታ፥ አማኔቲዳይታኔ ማታኤ ኢጺዛይታ ዶራዳ ኢስታፌ አሳስ ሻላቃታ፥ ማቶ ሃላቃታ፥ ሃሞሳ ሃላቃታኔ ኣሲራ ሃላቃታ ሂስታ ሱንላ።

22 ኢስቲ ኡባ ዋዴ አሳስ ፒርዴቶ፤ ጊዶ ኣቲን ዴጾ ዮኦ ኡባ ኔኮ ኤሄቶ፤ ዋዩሶንታ ዮኦ ኡባ ኢስቲ ሄን ወርሴቶ። ኢስቲ ኔናራ ጊሼቲዛ ጊሻስ ቶሆይ ኔስ ካዉያና።

23 ኔኒ ሄሳሶ ኦሊኮ ሃይሲ ጸሳ ሼኔ ጊዲኮ ኔኒ ዳሮ ዳቡራካ። ቃሴ ሃ አሳይ ወሪካ ባ ዮኦይ ፖሌቲን ኡፋይሳን ባ ሶ ባ ሶ ባና» ጊዴስ።

24 ሙሴይ ባ ቦሎዛ ቃላ ሲዩዴስ፤ ኢዚ ጊዳይሳ ኡባካ ኦሊዴስ።

25 ሙሴይ ኢስራኤሌ ኡባ ጊዶፌ ኤራ አሳታ ዶሪዲ አሳ ካሊሊዛ ሻላቃታ፥ ማቶ ሃላቃታ፥ ሃሞሳ ሃላቃታኔ ኣሲራ ሃላቃታ ሂስቲ ሱንሊዴስ።

26 ኢስቲካ አሳስ ኡባ ዋዴ ፒርዲዳ፤ ባና ዴጺዳ ዮኦዛ ሙሴኮ ኤሄዳ ሺን ዴጾንታ ዮኦዛ ኡባ ባርካ ወርሲዳ።

27 ሄሳፌ ጉዬ ሙሴይ ባ ቦሎ ዮቶሬ ሞይዚን ዮቶሬይ ጉዬ ባ ዴሬ ሲሚዴስ።

## 19

ጎዳይ ሲና ዙማ ቦላ ኢሰራኤል አሳሰ ቆንጩል

<sup>1</sup> ኢሰራኤል አሳይ ጊብጾፔ ኬዚዳ ሄሻንሉ አገናን ኮይሮ ጋላሰ ሲና ባዞ ጋኪዳሰ።

<sup>2</sup> ኢስቲ ኤራፊዲሚፔ ዳንዲዲ ሲና ባዞ ቢዲ ባዞን ዲዛ ዙማ ሲንላን ኡቲዳ።

<sup>3</sup> ሙሴይካ ጸሳኮ ፑዴ ዙማ ቦላ ኬዚን ጎዳይ ዙማ ቦላ ዲሼ ኢዛ ጸይጊዲ፤ «ኔኒ ያቆቤ ኬላ አሰ ጊዲዳ ኢሰራኤል ናይታሰ ሂዘጋ ዮታ፤

<sup>4</sup> ታኒ ጊብጾ አሳ ቦላ አይ ኦሊዳኮ ቃሴ ጎሌ ካፎይ ባ ና ባ ቁፊን ቶኪዛ ማላ ታኒ ኢንቴና ዋሰታ ቶካዳ ታኮ ኤሂዳኮ ኢንቴ ኢንቴ አይፌራ ቤዪዳ።

<sup>5</sup> ሂሰቲን ሃኢ ኢንቴ ታሰ ኩሚል አዛዜቲኮ፤ ኢንቴ ታ ጫቆ ቃላ ናጊኮ፤ ኩሚል ዳራ ጋርሳን ኢንቴ ታሰ ቡዞ ዳሬ ጊዳና። ቢታይ ወሪ ታሰ ጊዲኮካ፤

<sup>6</sup> ኢንቴ ታ ካዋቲላሰ ዲማ ሻኬቲዳ ቁሴታኔ ዲማ ዳሬ ጊዳና፤፤ ኔኒ ኢሰራኤል ናይታሰ ዮታና ቃላይ ሃይሳ» ጊዳሰ።

<sup>7</sup> ሂሰቲን ሙሴይ ዙማ ቦላፌ ዲጌ አሳኮ ዋጂዲ ዳሬ ጨማታ ጸይጊ ሺሺዲ ጎዳይ ዮታ ጊዳ ቃላታ ኡባ ኢሰታሰ ዮቲዳሰ።

<sup>8</sup> አሳይ ወሪ ኢሲ ቃላን ጊዲዲ፤ «ጎዳይ ጊዳይሳ ኡባ ኑ አላና» ጊን ሙሴይ ኢስቲ ጊዳይሳ ጎዳኮ ኤኪ ቢዳሰ።

<sup>9</sup> ጎዳይ ሙሴ፤ «ታኒ ኔናራ ሃሳይሺን አሳይ ሲያና ማላኔ ኢስቲ ኔናን ኡባ ዋዴካ አማኔታና ማላ፤ ታኒ ኔኮ ዋልቃማ ሻራራ ያና» ጊዳሰ። ሃሳፌ ጉዬ ሙሴይ አሳይ ጊዳይሳ ጎዳሰ ዮቲዳሰ።

<sup>10</sup> ጎዳይ ሙሴሰ፤ «ኔኒ አሳኮ ባዳ ሃቺኔ ዋንቶ ኢሰታ ጌሻ። ኢስቲ ባ ማይኦ ሜጨዲ፤

<sup>11</sup> ሄሻንሉ ጋላሳሰ ጊጌቲቶ። ጋሶይካ ሄሻንሉ ጋላሳን አሳይ ወሪ ቤዪሺን ታኒ ጎዳይ ሲና ዙማ ቦላ ዋጃና።

<sup>12</sup> ኔኒ አሳይ ዲዛሶ ዩሾን አሳሰ ዛዋ ዋላዳ ኢሰታሰ፤ «ዙማ ቦላ ፑዴ ኬዘንታ ማላ ዋይኮ ዙማ ጸጸ ቦቾንታ ማላ ኢንቴና ኤሪቴ። ዙማ ቦቾዳይ ኦኒካ ቱማፔ ሃይቃናሰ ቤሴሰ።

<sup>13</sup> አሰ ዋይኮ ሜሄ ጊዲን ዛዋ ፒኒ አጂኮ ኦኒካ ባ ኩሼን ኢዛ ቦቾንታ ሹቻን ጫዲዲ ዋይኮ ዋንዳፊን ዲኪዲ ዋጅ»

ጌሰ። ዛፍ ጎቺ ፑኒኮ ኢስቲ ፑዴ ዙማ ቦላ ኬዛና ዳንዳዬቴስ» ጌዴስ።

<sup>14</sup> ሙሴይ ዙማፔ አሳኮ ዱጌ ዋዲዳፔ ጉዬ አሳ ጌሺን አሳይ ባ ማይኦ ሜጪዴስ።

<sup>15</sup> አሳካ፣ «ሄቫንሶ ጋላሳስ ጊጌቲቴ፤ ማጫሳራ አቆፒቴ» ጌዴስ።

<sup>16</sup> ሄቫንሶ ጋላስ ማላዶ ዳዳ ጊሪሲ ሲዬቲዴስ። ዋልቃንላ ፖኦይኔ ዋልቃማ ሻራይ ዙማ ቦላ ቤቲዴስ፤ ዛፍይ ፑኒቲዛ ዳር ዋልቃማ ጊሪሲ ሲዬቲዴስ። ሄሳ ጊሻስ አሳይ ዉሪ ባ ዲዛሶን ባቢዲ ኮኮሪዴስ።

<sup>17</sup> ሙሴይካ አሳ ጸሳራ ጋላናስ አሳይ ዲዛሶፔ ኬሲን አሳይ ዙማ አቻን ኤቂዴስ።

<sup>18</sup> ጎዳይ ሲና ዙማ ቦላ ታማራ ዋዲዳ ጊሻስ ጌታ ጮጮፔ ኬዚዛ ማላ ጩዋይ ቱሉ ጊ ኬዚዲ ዙማ ኩሜሳ ካሚዴስ፤ ዙማዚ ኩሜሳ ኬሂ ቃዲዴስ።

<sup>19</sup> ዛፍዛ ጊሪሳይካ ኬሂ ዳሪ ዳሪ ቢዳ ዋዴ ሙሴይ ሃሳዪን ሃሳዪን ጸሲ ኢዛስ ዛሪ ዛሪዲ ቃላን ሃሳይዴስ።

<sup>20</sup> ጎዳይ ካሴ ሲና ዙማ ቦላ ዋዲዳ ዋዴ ሙሴ ፑዴ ዙማ ሁኤ ጴይጊን ሙሴይ ፑዴ ኬዚዴስ።

<sup>21</sup> ጎዳይ ኢዛ፣ «ኔኒ ዱጌ ባዳ አሳይ ቤያና ጌዲ ሃ ታኮ ዛዋ አቋንታ ማላኔ ኢስታፌ ዳርቲ ሃይቆንታ ማላ አሳ ሃንቃ።

<sup>22</sup> ሃራይ አቶሺን ታ ማታ ሺቂዛ ቄሴቲካ ኡባ ዋዴ ባና ጌሻናስ ኮሼስ፤ ሂስቶንታ ኢዲኮ ጎዳይ ኢስታ ቃጸያና» ጌዴስ።

<sup>23</sup> ሙሴይ ጎዳስ፣ «አሳይ ዙማ ቦላ ፑዴ ያናስ ዳንዳዬና፤ አይስ ጊኮ ኔኒ ኔ ሁኤን፣ ሳ ሶሆዛ ጌሻ ማላ ዲማሳዳ፣ ሃ ዙማ አቻን ዛዋ ዋሊቴ» ጋዳ ኑስ ዮታ ዋላዳሳ» ጌዴስ።

<sup>24</sup> ሂስቲን ጎዳይ ኢዛ፣ «ኔኒ ዱጌ ሃኢ ኤሌ ዋዲዳ ፑዴ ኬዛ። አርኔይካ ኔናራ ዮ። ቄሴታኔ አሳ ታ ቃጸዮንታ ማላ ኢስቲ ዛዋ ፒኒዲ ፑዴ ታኮ ዮፔቶ» ጌዴስ።

<sup>25</sup> ሄሳ ጊሻስ ሙሴይ ዱጌ አሳኮ ዋዲዳ ጎዳይ ጌዳይሳ ኢስታስ ዮቲዴስ።

## 20

ታሙ አዛዞታ  
(ዛሬ 5:1-21)

- 1 ጎዳይ ሃሳይዳ ቃላቲ ኡባይ ሃይሳፌ ካሊዛይታ፤  
 2 «ኔና ጊብጾፔ አይሌቴላ ቢታፌ ኬሲዳ ጎዳ ኔ ጸሳይ ታና።  
 3 «ታፔ ኣቲን ሃራ ኤቃ ጸሳታሰ ጎይኖፋ።  
 4 «ቦላ ሳሎን ዲዛ ሚሽ ጊዲን፥ ወይኮ ጋርሳ ሳኣን ዲዛ ሚሽ ጊዲን፥ ወይኮ ቢታፌ ጋርሳን ሃላ ጊዶን ዲዛ ሚሽ ጊዲን አይኮካ ሚሳቲሳዳ ኔሰ ሚሰሌ ሂሰታዳ ሜጶፋ።  
 5 ኢሰታሰ ሆኮፋኔ ኢሰታሰ ጎይኖፋ። አይሰ ጊኮ ታኒ ጎዳ ኔ ጸሳይ ቃናቲዛ ጸሳኮ፤ ታና ኢጸዛይታ ኣዋታ ናጋራ ጊሻሰ ናይታ ሄቫንሶ ዩሌታኔ ኦይዳንሶ ዩሌታ ጋካናሰ ቃጸያይሰ።  
 6 ቃሴ ታኒ ታና ሲቂዛይታሲኔ ታ ኣዛዞ ናጊዛይታሰ ዳሮ ሺ ዩሌቴላ ጋካናሰ ታኒ ታ ሲቆ ቤሲዛ ጸሳ።  
 7 «ጎዳ ኔ ጸሳ ሱንሳ ሃዳን ዴንሶፋ፤ አይሰ ጊኮ ጎዳ ኔ ጸሳይ ባ ሱንሳ ሃዳን ዴንሳዛይታ ቃጸያና።  
 8 «ሳምባታ ጋላሳ ሃራ ጋላሳታፔ ዲማሳዳ ናጋ።  
 9 ኔ ኦሊዛ ኦሶ ኡባ ኡሱፑን ጋላሳታን ኦፋ።  
 10 ጊዶ ኣቲን ላፑንላ ጋላሳይ ጎዳ ኔ ጸሳሰ ሳምባታ። ሄ ጋላሰ አይኮ ኦሶካ ኦሶፋ፤ ኔኒ ወይኮ ኔ ኣቱማ ናይ፥ ወይኮ ኔ ማጫ ናይ፥ ወይኮ ኔ ኣቱማ አይሌይ፥ ወይኮ ኔ ማጫ አይሌይ፥ ወይኮ ኔ ሚዛይ፥ ወይኮ ኔ ዴሬን ዲዲ ኔሰ ኦሊዛ ሃራ ዴሬ ኣሰ ጊዲን ሄ ጋላሳን አይ ኦሶካ ኦሶፍቴ።  
 11 አይሰ ጊኮ ኡሱፑን ጋላሳን ጎዳይ ሳሎ፥ ሳኣ፥ ኣባኔ ኢሰታ ጊዶን ዲዛ ኡባ ሜጶዲ ላፑንላ ጋላሰ ሽምፒዴሰ። ሄሳ ጊሻሰ ጎዳይ ሳምባታ ጋላሳ ኣንጂዴሰኔ ዴማሲዴሰ።  
 12 «ጎዳ ኔ ጸሳይ ኔሰ ኢሚዛ ቢታን ኔ ዳሮ ላይሳ ዳና ማላ፥ ኔ ኣዋኔ ኔ ኣዮ ቦንቻ።  
 13 «ኣሰ ወጶፓ።  
 14 «ላይማቶፓ።  
 15 «ካይሶቶፓ።  
 16 «ኦና ቦላካ ዋርዶ ማርካቶፋ።

**20:5** ኬሳ 34:17፤ ሉዌ 19:4፤ 26:1፤ ዛሬ 4:15-18፤ 27:15      **20:6** ኬሳ 34:6-7፤ ታይ 14:18፤ ዛሬ 7:9-10      **20:7** ሉዌ 19:12      **20:8** ኬሳ 16:23-30  
**20:10** ኬሳ 23:12፤ 31:15፤ 34:21፤ 35:2፤ ሉዌ 23:3      **20:11** ሜጶ 2:1-3፤ ኬሳ 31:17      **20:12** ዛሬ 27:16፤ ማቶ 15:4፤ 19:19፤ ማር 7:10፤ 10:19፤ ሉቃ 18:20፤ ኤፌ 6:2-3      **20:14** ሉዌ 20:10፤ ማቶ 5:27፤ 19:18፤ ማር 10:19፤ ሉቃ 18:20፤ ኦሮ 13:9፤ ያቆ 2:11      **20:15** ሉዌ 19:11፤ ማቶ 19:18፤ ማር 10:19፤ ሉቃ 18:20፤ ኦሮ 13:9      **20:16** ኬሳ 23:1፤ ማቶ 19:18፤ ማር 10:19፤ ሉቃ 18:20

17 «አሳ ከሐ አሞቶፋ፤ አሳ ማቾ ዋይኮ ኢዛ አይሌ ዋይኮ ኢዛ አይሌዮ ዋይኮ ኢዛ ቦራ ዋይኮ ኢዛ ሃሬ ዋይኮ ኢዛሰ ዲዛ አይ ሚሺካ አሞቶፋ» ጊዴሰ።

18 አሳይ ዉሪ ዳዳይ ጊሪዛይሳኔ ዛዬይ ዛዬቲዛይሳ ሲዪዲ ቃሴ ዋልቃንሒ ዋልቃሚዛይሳኔ ዙማይ ጩዋቲዛይሳ ቤኢዲ ኮኮሪሼ ሃሆን ኤቂዴሰ።

19 አሳይ ሙሴሰ፤ «ኑኒ ሃይቆንታ ማላ ጸሲ ኑናራ ሃሳዮፖ፤ ኑኒ ኑሰ ዮታ፤ ኑኒ ሲያና» ጊዴ።

20 ሙሴይ አሳሰ፤ «ጸሲ ኢንቴና ፓጫናሰ፤ ኢዛ ያሺ ኢንቴ ዋዚናን ኩሚን ኢንቴ ናጋራ ኦሶንታ ማላ ዪዳ ጊሻሰ ባቦፍቴ» ጊዴሰ።

21 አሳይ ሃሆን ኤቂ ዲሺን ሙሴይ ጸሲ ዲዛሶ ዋልቃማ ሻራ ቋማኮ ሸቂዴሰ።

### ያርሾ ያርሺዛ ሶሆ ጊሻሰ ኢሜቲዳ ዋጋታ

22 ሄሳፌ ጉዬ ጎዳይ ሙሴ፤ «ኢሰራኤሌ አሳሰ፤ ታኒ ሳሎፔ ኢንቴሰ ሃሳይሺን ኢንቴ ኢንቴ አይፌራ ቤኢዴታ።

23 ታፔ ኣቲን ሃራ ጸሲ ኢንቴሰ ዶፖ፤ ቢራፔ ዋይኮ ዋርቃፌ ኢንቴሰ ኤቃ ጸሳታ ሜዲዲ ጎይኖፍቴ።

24 « ኑኒ ታሰ ያርሾ ያርሺዛሶ ኡርቃፌ ሜዳዳ ጸጌቲዛ ያርሾታ፤ ኢሲፌቴላ ያርሾታ፤ ኔ ዶርሳታ፤ ኔ ዳይሻታ፤ ኔ ሚሄታ፤ ኢዛ ቦላ ያርሻ። ታ ሱንሒ ቆፌታና ማላ፤ ኢንቴ ኦሒዳሶ ኡባ ሶሆ ያዳ ታ ኢንቴና ኣንጃና።

25 ኑኒ ታሰ ያርሾ ያርሺዛሶ ሹቻፌ ኦሒዛ ጊዲኮ ማሴቲዳ ሹቻፌ ኦሶፋ፤ አይሰ ጊኮ ኑኒ ማሲዛ ቢራታን ኢዛ ቦቺኮ ኔ ኢዛ ቱኒሳሳ።

26 ታሰ ያርሾ ያርሺዛሶ ፑዴ ኬዛናሰ ያንጋሬ ሜዳዳ ኢዛ ቦላ ኬዘፓ፤ ጋሶይካ ኑኒ ኬዚዛ ዋዴ ኔ ካሎቴሒ ቤታና፤ ጋዳ ዮታ» ጊዴሰ።

## 21

### አይሌታ አይሶ ዋጋ (ዛሬ 15:12-18)

1 «ኑኒ ኢሰራኤሌ ናይታሰ ኢማና ዋጋይ ሃይሳ።

2 ነኒ ኢስራኤል ናይታ ጋርሳፊ ኣይሌ ሻሚኮ ኢዚ ነስ ኡሱፑን ላይላ ኦሶ፤ ጊዶ ኣቲን ላፑንላ ላይላን ኢዚ ኣይኮካ ቃንጽንታ ኣይሌቴላፊ ጮ ማላ ዬዴቶ።

3 ኢዚ ባርካ ዪዳ ጊዲኮ ባርካ ቦ፤ ባ ማቼይራ ዪዳ ጊዲኮ ኢዛ ማቼያካ ኢዛራ ቡ።

4 ኢዛ ጎዳይ ኢዛስ ማቸ ኤኪዳ ጊዲኮ ማቼያ ኢዛስ ኣዴ ናይታ ዋይኮ ማጫ ናይታ ዬሊዳ ጊዲኮ፤ ሄ ማጫሳያኔ ኢዚ ናይቲ ኢዛ ጎዳስ ኣቲኮ ኢዚ ባርካ ኬዚ ቦ።

5 ጊዶ ኣቲን ሄ ኣይሌይ፤ ታኒ ታ ጎዳ፤ ታ ማቸዮኔ ታ ናይታ ሲቃይስ፤ ታኒ ኣይሌቴላፊ ኬዚኬን ጊኮ።

6 ኢዛ ጎዳይ ኢዛ ፒርዲዛ ኣሳ ሲንላ ኣሶ፤ ሄሳፊ ጉዬ ኬላ ፔንጌ ዋይኮ ፔንጌ ቆሲላላኮ ኢዛ ኤፊዲ ኢዛ ሃይላ ጎንላን ሉኮ። ሂስቲኮ ኢዚ ባ ዴኦ ላይላ ኡባን ኢዛስ ኣይሌ ጊዳና።

7 «ኣሲ ባ ማጫ ናዮ ኣይሌቴላስ ባይዚኮ ኣዴ ኣይሌቴ ኣይሌቴላፊ ኬዚዛ ማላ ኢዛ ኬዙ።

8 ኢዛ ባና ዶሪዲ ኤፊዳ ጎዳ ኡፋይሶንታ ኢጺኮ ኢዚ ጎዳይ ኢዛ ዋዚሳናስ ኮሼሰ። ኢዚ ኢዚሰ ኣማኔቶንታ ኣጊዳ ጊሻሰ ኢዛ ኣላጋሰ ባይዛና ቤሴና።

9 ኢዚ ኢዛ ባ ናስ ኤካናስ ኮይኮ ባ ማጫ ናስ ኦሊዛ ማላ ኢዚሰ ቤሲዛይሳ ኦሶ።

10 ኢዚ ባስ ሃራ ማቸ ኤኪኮ ኮይሮ ማቼይሰ ቁማ ዋይኮ ማይኦ ፓጪሶፖ፤ ቃሴ ኢዚራ ኣቆ ኣጎፎ።

11 ኢዚ ሃይታ ሄቫታ ኢዚሰ ኢሞንታ ኢጺኮ ኣይኮ ሚሼይካ ቃንጾቶንታ ኣይሌቴላፊ ኬዛዳ ቡ።

### ኢታ ኦሊዳ ኣሳቲ ቃጸዬቲዛ ዋጋ

12 «ኣስ ዋዲዳ ኣሲ ሃይቃናስ ቤሴሰ።

13 ጸሳ ሼኔ ጊዲ ኡቲን ቆፖንታ ዲሼ ኣስ ዋዲዳይ ታኒ ጊግሲዳሶ ቤቲ ቦ።

14 ጊዶ ኣቲን ኣስ ዋዲና ቆፒዲ ኤሪሼ ሃራ ኣስ ዋዲኮ ሄሳዴይ ኣታናስ ጊዲ ሄ ታ ጊግሲዳ ታስ ያርሾ ሺሺዛሶ ዪኮ ያርሺዛሶሆዛፔ ሃራሶ ኤፋዳ ዋዲ።

15 «ባ ኣዋ ዋይኮ ባ ኣዮ ዋዲዛ ኣሲ ኦኒካ ሃይቆ።

16 «ኣሳ ዋልቃን ኦይኪዲ ባይዚዛዴይ ዋይኮ ዋልቃን ኦይኪን ኣሲ ኢዛ ኩሼን ቤቲዳዴይ ሃይቃናስ ቤሴሰ።

17 «ባ ኣዋ ወይኮ ባ ኣዮ ጫደዛዳይ ሃይቆ።

18 «ናምኡ ኣሳቲ ባ ጋርሳን ኦዬቲኮ፡ ኢሶይ ኢሳ ሹቻራ ጫደኮ ወይኮ ኩሼራ ኢጪኮ ሄ ቆሄቲዳዴዚ ሃይቆንታ ሃርጊዲ ሂጸን ኢቸኮ፡

19 ሄሳፌ ዴንዲዲ ጉፊራ ካሬ ጊዶን ሄሜቲኮ፡ ሄ ቆሂዳይሲ ቃጸዬቶንታ ኣቲሰ፤ ጊዲኮካ ኢዚ ኢዛ ኦሶ ቲቂዳ ጊሻሰ ሚሼ ቃንጸናሲኔ ኢዚ ፓጻና ጋካናሰ ኢዛ ጸላናሰ ኮሼሰ።

20 «ኣሲ ባ ኣቱማ ኣይሌ ወይኮ ማጫ ኣይሌዮ ጉፊን ሸጪኮ ሄ ሸቻ ጊዶን ሄራካ ኢዛ ኩሼን ሃይቂኮ ሸጪዳይሲ ቃጸዬታናሰ ቤሴሰ።

21 ጊዶ ኣቲን ሄ ቆሄቲዳይሲ ኢሲ ጋላሰ ወይኮ ናምኡ ጋላሰ ጋካናሰ ሃይቆንታ ኣጊኮ ሄ ኣይሌዚ ኢዛ ሚሽ ጊዲዳ ጊሻሰ ኢዚ ቃጸዬቲና።

22 «ናምኡ ኣሳቲ ባ ጋርሳን ኢሶይ ኢሳራ ኦዬቲሼ ቃንጻራ ዲዛ ማጫሳዮ ቦሻሰ ጋሊኮ፡ ሄሳፌ ሃራ ኢታ ሚሽ ኢዚ ቦላ ጋሶንታ ኣጊኮ፡ ኢዚ ቦላ ቆሆ ጋሊዳዴይ ሄ ማጫሳይ ኣዚናይ ኦይቺዳይሳ ዳናቲ ፒርዲኮ ኣይ ሚሼካ ቃንጸ።

23 ጊዶ ኣቲን ኢዚሰ ቦሻይ ዳሪኮ ሼምፖ ጊሻሰ ሼምፖ፡

24 ኣይፌ ጊሻሰ ኣይፌ፡ ኣቻ ጊሻሰ ኣቻ፡ ኩሼ ጊሻሰ ኩሼ፡ ቶሆ ጊሻሰ ቶሆ፡

25 ጸሳ ጊሻሰ ጸሰ፡ ማዲንጻ ጊሻሰ ማዲንጻ፡ ቆኦ ጊሻሰ ቆኦ ኤካናሰ ቤሴሰ።

26 «ኢሲ ኣሲ ኣቱማ ወይኮ ማጫ ኣይሌ ኣይፌ ሸጪ ቶይሲኮ ሄ ኣይፌዛ ጊሻሰ ኣይሌቲፋፌ ኬሲ ዬዶ።

27 ሄሳፋካ ባ ኣይሌይ ወይኮ ባ ኣይሌዛ ኣቶ ሚንፊኮ ሄ ኣቻ ጊሻሰ ኣይሌቲፋፌ ኬሲ ዬዶ።

28 «ቦራይ ማጫሰ ወይኮ ኣቱማሰ ኢጪ ወፏኮ፡ ሄ ቦራይ ሹቻን ጫዴቲ ሃይቆ፤ ኢዛ ኣሾይ ሜቲቶፎ። ጊዶ ኣቲን ቦራ ጎዳይ ቃጸዬቶፎ።

29 ጊዶ ኣቲን ቦራይ ካሴካ ኢጪዛ ቦራ ጊዲኮ፡ ኣሳይ ቦራዛ ጎዳሰ ዮቲዲሺን ቦራ ጎዳይ ቦራ ቃቾንታ ኣጊኮ፡ ቦራይ ኣዴ ወይኮ ማጫ ኣሰ ወፏኮ ሄ ቦራይ ሹቻን ጫዴቲ ሃይቆ፤ ቃሴ ቦራዛ ጎዳይካ ሃይቆ።

30 ጊደ እቲን ኢዚ ጨጎ ቃንጻና ማላ ኦይሹቲኮ ኢሰቲ ኦይቹዳይሳ ኦይ ጊዲኮካ ቃንጹዲ ባ ሹምፖ ዋዞ።

31 ቦራይ እቱማ ና ዋይኮ ማጫ ና ኢጨ ዋዲኮ ፒርዳይ ኢሲ ማላ ጊደ።

32 ቦራይ እቱማ ኦይሌ ዋይኮ ማጫ ኦይሌዮ ኢጨ ዋዲኮ ቦራ ጎዳይ ኦይሌዛ ጎዳሰ ሄቩ ታሙ ቢራ ጨጎ፤ ቦራይካ ሹቻን ጫዳቲዲ ሃይቆ።

33 «ኢሲ ኢሲ ኦላ ካማ ቃሪኮ ዋይኮ ኦላ ቦኪዲ ካሞንታ ኣጊኮ፤ ቦራይ ዋይኮ ሃሬይ ሄ ኦላን ዉሊኮ።

34 ሄ ኦላዛ ጎዳይ ሜሄዛ ዋጋ ቃንጾ። ኢዚ ሜሄዛ ጎዳሰ ዋጋ ቃንጹዲ ሃይቁላ ባሰ ኤኮ።

35 «ኢሲ ኢሳ ቦራይ ሃራ ኢሳ ቦራ ኢጨ ዋዲኮ፤ ኢጨ ዋዲዳ ፓጻ ቦራ ባይዚዲ ኢዛ ሚሻኔ ሃይቁዳ ቦራዛ ኣሾዛ ጊደን ጊና ሻኪ ኤኬቶ።

36 ጊደ እቲን ሄ ቦራይ ኢጨዛ ቦራ ጊዲዳይሲ ካሰቲ ኤሬቲሺን፤ ኢዛ ጎዳይ ኢዛ ቃቸንታ ኣጊኮ፤ ኢዛ ጎዳይ ቦራ ጊሻሰ ቦራ ቃንጹዲ ሄ ሃይቁዳይሳ ባሰ ኤኮ።

## 22

### ኢሲ ባ ሃር ናጊዛ ዋጋ

1 «ኢሲ ኢሲ ቦራ ዋይኮ ዶርሳ ካይሶቲ ኤኪዲ ሹኪኮ፤ ዋይኮ ባይዚ ኤኪኮ፤ ኢሲ ቦራ ጊሻሰ ኢቻሹ ቦራ፤ ኢሲ ዶርሳ ጊሻሰ ኦይዲ ዶርሰ ቃንጾ።

2 «ካይሶይ ኬላ ቦኪሹ ኦይኬቲዲ ሾጩቲ ሃይቁኮ ሾጪዳይሲ ሱላ ጉሲዳ ጊሻሰ ኦይቹቲና።

3 ጊደ እቲን ሄሲ ጋዴይ ዋንቲ ጌዪን ሃኒዛ ጊዲኮ ኢዚ ሄ ጉኪዳ ሱላ ኣጮን ኦይሹቲሰ። ካይሶዚ ካይሶቲዳይሳ ቃንጾ፤ ጊደ እቲን ኢዛሰ ኦይኮይካ ባይንዳ ጊዲኮ ካይሶቲዳይሳ ቃንጻናሰ ኢዚ ባይዜቶ።

4 ኢዚ ካይሶቲዳ ሜሃይ ፓጻ ዲሼ ኢዛ ኩሼን ቤቲኮ፤ ቦራ ዋይኮ ሃሬ ዋይኮ ዶርሳ ጊዲኮካ ኢዚ ባ ካይሶቲዳይሳሰ ናምኤ ኩሼ ቃንጾ።

5 «ኢሲ ኢሲ ባ ሜሄ ዳምባን ዋይኮ ኦይፌይ ሜቲቲዛ ሚላ ጊደን ሄሚሹ፤ ሜሃታ ሃራ ኢሳ ካላን ላኦ ዬዲ ሄሚኮ፤ ኢዚ ባ ካላፌ ዋይኮ ኦይፌይ ሜቲቲዛ ባ ሚላ ኡባፌ ሎኢዛይሳ ኣፊላማ ቃንጾ።

6 «ኢሲ ኣሲ ቡራ ጸጊኮ ታማይ ዴንዲዲ ቡራዛ ወርሲዲ ደሬን ዲዛ ካል ወይኮ ኤቆን ዲዛ ካላ ሙሌራ ሚዛ ጊዲኮ ኮይሮ ታማ ኦይሊዳ ኣዴዚ ኣፊላማ ቃንጾ።

7 «ኢሲ ኣሲ ቢራ ወይኮ ሃራ ሚሽ ናጊሳናሰ ባ ሾሮሰ ሃዳራ አሚኮ፥ ሾሮዛሶፔ ሄ ሚሻ ካይሶቲዳ ካይሶዚ ኦይኬቲኮ፥ ካይሶዚ ሄ ሚሻሰ ናምኡ ኩሼ ቃንጾ።

8 ጊዶ ኣቲን ካይሶዚ ቤቶንታ ኢጲኮ፥ ሃዳራ ኤኪዳ ኣዴዚ ፒርዲዛይታኮ ሺቂዲ ሃዳራ ሚሻ ኢዚ ሞንታይሳሰ ጫቆ።

9 «ኣሲ ኣይ ሞቶንካ ቦራ ጌዶን፥ ወይኮ ሃራ ጌዶን፥ ወይኮ ደርሳ ጌዶን፥ ወይኮ ማይኦ ጌዶን፥ ወይኮ ሃራ ቆይዳ ሚሻ ጌዶን፥ ሃይሲ ታይሳ) ጊዲ ሞቲቲኮ፥ ናምኡ ባጋይካ ባ ዮኦዛ ፒርዲዛይታ ሰንሐ ኣሌቶ፤ ፒርዲዛይቲ ዋርዶሲዳ ኣሲ ሃንኮይሳሰ ናምኡ ኩሼ ቃንጾ።

10 «ኣሲ ባ ሾሮሰ ሃራ፥ ወይኮ ቦራ፥ ወይኮ ደርሳ፥ ወይኮ ሃራ ኣይ ሜሄካ ሃዳራ አሚን ኦኒካ ቤኦንታ ሃይቂኮ፥ ወይኮ ቆሄቲኮ፥ ወይኮ ኣሲ ቦንቂ ኤፊኮ።

11 ሃዳራዴይ ባ ሾሮ ሜሄዛ ቦቾንታይሳሰ ጎዳ ሲንፋን ጫቂኮ፥ ኢስታ ጊዶን ዲዛ ዮኦዚ ወሬሰ። ሄ ሜሄዛ ጎዳይ ጫቆዛ ኤኮ፤ ቃንጸሳናሰ ቤሴና።

12 ጊዶ ኣቲን ሜሄዚ ሃዳራዴፌ ካይሶቲቲዳ ጊዲኮ ሜሃዴሰ ቃንጾ።

13 ሄ ሜሄዛ ዶኣይ ሚዳ ጊዲኮ፥ ማርካ ጊዳና ማላ ዶኣይ ሚሽን ኣቲዳይሳፌ ኤኪ ኤሂ ቤሶ፤ ሂሰቲዲ ሜቲቲዳ ሜሄዛ ጊሻሰ ቃንጾፎ።

14 «ኣሲ ባ ሾሮፔ ሜሄ ጋርጺ ኤኪኮ ኢዛ ጎዳይ ባይንዳሶን ሄ ሜሄይ ቆሄቲኮ ወይኮ ሃይቂኮ ሄ ሜሄዛ ጊሻሰ ቃንጾ።

15 ጊዶ ኣቲን ኢዛ ጎዳይ ኢዛራ ዲኮ፥ ጋርጺዳይሲ ቃንጾፎ፤ ኪራሰ ኤኪዳ ጊዲኮ ኪራሰ ጨገዛ ሚሻይ ኣጮዛሰ ቃንጾ ጊዶ።

### ጌሻ ዴኦኔ ኣማኖ ዋጋ

16 «ኢሲ ኣሲ ኣዚናሰ ጊጎንታ ጌላኦዮ ባሌሊዲ ኢዚራ ዚንኢዛ ጊዲኮ ኢዞ ጨሎሺዲ ባሰ ማቾ ኤኮ።

17 ኢዚ ኣዋይ ኢዞ ኢዛሰ ኢሞንታ ኢጲኮ፥ ጌላኦዮ ኤኪዛ ኣሲ ጨሎሻሰ ኢሜቲዛ ሚሻ ኬና ቢራ ኢዚ ኣዋሰ አሞ።

18 «ቢታ ቢቲዛ ማጫሰ ፓጾ ዋሶፋ።

19 «ሜሄራ ጋጊዛ ኣሲ ኦኒካ ሃይቆ።

20 «ጎዳስ ጸላላፔ ኣቲን ሃራ ጸሳስ ሹኪ ያርሺዛ ኣሲ ኦኒካ ሃይቂ ጳዮ።

21 «ቤተዲ ዩዳ ኣስ ቆሆፒቴ፤ ዋይኮ ዋዪሶፒቴ፤ ጋሶይካ ኢንቴካ ጊብጼ ቢታን ቤቴ ጊዲዲ ዴኢዴታ።

22 ኣዚናይ ሃይቂዳ ኣምኤዮኔ ኣዋይ ዋይኮ ኣያ ሃይቂዳ ና ዋዪሶፒቴ።

23 ኢንቴ ኢስታ ዋዪሲን ኢስቲ ታኮ ዋሲኮ ታኒ ኢስታ ዋሶ ቱማፔ ሲያና፤

24 ሄ ዋዴ ታ ሃንቆይ ኢንቴ ቦላ ዴንዳና፤ ታኒ ኢንቴና ማሻን ወርሳና፤ ኢንቴ ማቼቲ ኣምኤታ ኢንቴ ናይቲካ ኣዋይ ባይንዳ ዩኦ ናይታ ጊዳና።

25 «ኢንቴ ጊዶን ዲዛ ታ ኣሳስ ኢሲ ማንቆ ኣሳስ ሚሹ ታልኢኮ፤ ባ ሚሽ ዲቻስ ኢሚዛ ኣሳ ማላ ሃናፒቴ፤ ኔኒ ዬሎ ኢዛ ኦይቾፋ።

26 ኔኒ ኢሲ ሚሻ ጊሻስ ኔ ላጌ ማይኦ ኦይኪኮ ኣርሼይ ወሎንታ ዲሺን ኢዛስ ዛራ።

27 ኣዛስ ጊኮ ኢዚ ባ ካሎ ካሚዛይ ኢዚን ጸላ፤ ሃራ ኣይ ማይኢዲ ኣቃናስ ዳንዳይዜ? ኢዚ ታስ ዋሲኮ ታ ሚሹቲዛ ጊሻስ ኢዛስ ሲያና ኢዛ ማዳና።

28 «ጸሳ ቦላ ጫሻ ቃላ ሃሳዮፓ፤ ዋይኮ ዴሬ ኣይሲዛዴ ቃንጎፋ። \*

29 «ኔ ካላ ጼራ፤ ዋይኔ ሚላ ኣይፌ ጼራኔ ዋጋራ † ዛይቴ ታስ ያርሾ ሺሻ። ኔኒ ኔ ኣቱማ ናይታ ጊዶን ባይራቲዛ ና ታስ ኢማናስ ቤሴስ።

30 ቦራፔ፤ ዴይሻፌኔ ዶርሳፌካ ሄሳሶ ኦላ። ኢስቲ ላፑን ጋላሳይ ጋካናስ፤ ባ ኣዪራ ኣዪራ ጋምኤቶ፤ ኦስፑንላ ጋላስ ኢስታ ታስ ኢማ።

31 «ኢንቴ ታስ ጌሻ ኣስ ጊዳናስ ኮሹስ፤ ሄሳ ጊሻስ ዶኣይ ዴምባን ዋዲዳ ዋይኮ ዳፊ ዳኪዳ ሜሄ ኣሾ ካናስ ዬጊቴ ኣቲን ሞፒቴ።

---

22:21 ኬሳ 23:9፤ ለዌ 19:33-34፤ ዛሬ 24:17-18፤ 27:19 22:25 ለዌ 25:35-38፤ ዛሬ 15:7-11፤ 23:19-20 22:27 ዛሬ 24:10-13 22:28 ሃዋ 23:5 \* 22:28 ጸሳን ጊዛይሳ ፒርዲዛይታን ጋና ዳንዳይቲስ። † 22:29 ዋጋራ፡ ዋጋራ ጊዛይሳ ኢሲ ኢሲ ባጋ ጋሞሶ ቃላን ዋይራ ዋይኮ ሻማሆ ዋይኮ ጉልታ ጌቴስ። 22:31 ለዌ 17:15

## 23

### ቱማ ፒርዳ

- 1 «ዋርዶ ዮኦ ላሎፋ፤ ዋርዶ ማርካታዳ ኢታ አሰ ማዶፋ።
- 2 «ኢታ ሚሽ ኦላናሰ ዳሮ አሳ ካሎፋ፤ ፒርዳ ሚርቃናሰ ዳሮ አሳራ ጊዳዳ ማርካቶፋ።
- 3 ማንቆ አሲ ፒርዳሶ ሸቂኮ ኢዛ ማንቆቴል ቤኣዳ ማዳ ፒርዶፋ።
- 4 «ኔ ዋርኬ ቦራይ ዋይኮ ሃሬይ ቆይዳይሳ ዳሚኮ ኢዛዳሰ ዛራ ኢማ።
- 5 ኔና ኢጲዛ አሳሰ ሃሬይ ጫናራ ኩንዲ ዲሺን ቤኢኮ ኢዛራ ማዳታዳ ዳንላ አቲን ሄን አጋጎፓ።
- 6 «ፒርዳሰ ዱቡሻን ሸቃዳ፤ ማንቆ አሳ ፒርዳ ዋቢሶፓ።
- 7 ዋርዶ ዋቶ ሲዮፓ፤ ጌሽ ዋይኮ ጲሎ አሰ ሃይቆሰ ኣላ ኢሞፋ፤ አይሰ ጊኮ ዋሮ ኦሊዳዳ ታኒ ማላ ዬዲኬ።
- 8 «ማታኤ ኤኮፋ፤ አዛሰ ጊኮ ማታኤይ ዴሊዛይታ አይፌ ቆቂሴሲኔ ጲሎታ ቃላ ሚርቄሰ።
- 9 «ሃራ ዳሬፔ ዪዳ ቤቴ አሰ ቆሆፒቴ፤ ቤቴ አሰ ጊዳሊ አይ ማላ ዳጲዛኮ ኢንቴ ኤሬታ፤ አይሰ ጊኮ ኢንቴ ኢንቴ ሁኤን ቤቴ ጊዲዲ ጊብዴ ቢታን ዳኢዳታ።

### ላፑንላ ላይሊኔ ላፑንላ ጋላሰ

- 10 «ኡሱፑን ላይሊኔ ጋካናሰ ኔ ጎያዳ ዜሪዳ ካላ ማጻ ሸሻ።
- 11 ላፑንላ ላይላን ጋዴዛ ጎዮንታ ሻቻ፤ ሂሰቲኮ ኔ ዳሬ ጋርሳን ዲዛ ማንቆቲ ሄሳፌ ማና ካል ዳማና፤ ቃሴ ኢሰታፌ አቲዛይሳ ደአቲ ማና። ኔኒ ኔ ዋይኔ ቶኪዛ ጋዴ ቦላኔ ዛይቴ ኢሚዛ ዋጋራ ሚላ ጋዴ ቦላካ ሄሳሶ ኦላ።
- 12 «ኡሱፑን ጋላሰ ኔ ኦሶ ኦላ፤ ኔ ቦራይኔ ኔ ሃሬይ ሸሞፓና ማላኔ ኔሶን ዬሌቲዳ አይሌይኔ ቤቴ አሲ፤ ሸሞፓና ማላ፤ ላፑንላ ጋላሰ ኦሶ ኦሶ።
- 13 «ታኒ ኢንቴና ጊዳይሳ ኡባ ሚንሊዲ ኦሊቴ፤ ሃራ ጸሳታ ሱንል ዳይጎፒቴኔ ኢሰታ ዋሶፍቴ።

### ጊታ ባኣሌታ

23:1 ኬሳ 20:16፤ ሉዌ 19:11-12፤ ዛሬ 5:20      23:3 ሉዌ 19:15      23:5  
ዛሬ 22:1-4      23:8 ሉዌ 19:15፤ ዛሬ 16:19፤ 23:9፤ ኬሳ 22:21፤ ሉዌ  
19:33-34፤ ዛሬ 24:17-18፤ 27:19      23:11 ሉዌ 25:1-7      23:12 ኬሳ  
20:9-11፤ 31:15፤ 34:21፤ 35:2፤ ሉዌ 23:3፤ ዛሬ 5:13-14

14 «ላይላን ሄሹቶ አንቲ ታሰ ባኣሌ ቦንቺቲ።

15 ኣቢቤ ጌቲቲዛ ኣጊናን ባሬቲዳ ጋላሳን ኡኬላ ባኣሌ ቦንቺቲ፤ ኣይሰ ጊኮ አንቲ ጊብጾፔ ኬዚዳይ ሄ ኣጊናና። ታኒ አንቲና ኣዛዚዳ ማላ ላፑን ጋላሰ ኢርሾይ ጌሎንታ ኡኬላ ሚቲ።

«አንቲፌ ኢሳዴይካ ታ ሲንላን ሚላ ኩሼ ቤቶፎ።

16 «ቃሴ አንቲ አንቲ ጋዴን ዜሪን፣ ኮይሮ ጋኪዳ ካላ ማጺዛ ዎዴ፣ ካላ ጾራ ሺሺዛ ባኣሌ ቦንቺቲ።

«ቃሴካ ላይላ ዉርሴላን፣ ካላ ኡባ ሺሺ ዉርሴዛ ዎዴ፣ ካላ ሺሾ ባኣሌ ቦንቺቲ።

17 ኣዴቲ ዉሪ ኡባ ሃሪዛ ጎዳ ታ ሲንላ ላይላን ሄሹቶ ዬቶ።

18 «ኔኒ ያርሾ ሱላ ታሰ ሺሻሼ ኢርሾራ ኡኬቲዳ ኡኬላራ ሺሾፋ። ሄ ባኣሌዛ ቦንቺዛ ጋላሰ ያርሹቲዳ ሞጴፔ ማላዶሰ ኣይኮይካ ኣቶፎ።

19 ኔ ጋዴን ባይራ ካጺዳ ካላ ኡባፌ ሎኢዛይሳ ጎዳ ኔ ጸሳ ሶ ኤካ ያ። ዴይሻ ላቃ ኢዛ ኣዬይ ማላን ዶይሶፋ።

### ሂደታ ቃላታኔ ካሊዛ ዎጋታ

20 «ኔ ኦጌን ኔና ናጋና ማላኔ ታኒ ኔሰ ጊግሲዳሶ ኔና ኤፋና ማላ፣ ታኒ ኪታንቻ ኔ ሲንላራ ዬዳና።

21 ኢዚ ዮቲዛይሳ ኤሮ ጋዳ ኢዛሰ ኣዛዜታ፤ ኢዛ ቦላ ማካሎፋ፤ ታ ኢዛ ከቲዳ ጊሻሰ አንቲ ናጋራ ኦሊኮ አንቲሰ ኢዚ ኣቶ ጌና።

22 ኢዚ ዮቲዛይሳ አንቲ ሎኤሊ ሲዪኮ፣ ታኒ ዮቲዛይሳ ኡባ ኦሊኮ አንቲ ሞርኬታ ኡባ ታኒ ሞርካና፤ አንቲናራ ኤቄቲዛይታራ ታኒካ ኤቄታና።

23 ታ ኪታንቻይ አንቲፌ ሲንላ ቢዲ፣ አንቲና ኣሞሬታ ቢታ፣ ሂቲታ ቢታ፣ ፓሪዜታ ቢታ፣ ካናኔታ ቢታ፣ ሂዌታ ቢታኔ ያቡሴታ ቢታ ኤፋና። ታኒ ኢሰታ ሙሌራ ጳይሳና።

24 ኢሰታ ኤቃታ ሲንላን ሆኮፍቲ፣ ዎይኮ ጎይኖፍቲ፣ ዎይኮ ኢሰታ ሃኖ ቁሎፍቲ። አንቲ ኢሰታ ጳይሳናሲኔ ቱሳ ማላ ኤቄ ዲዛ ኢሰታ ሹቻ ኤቃታ ሚንፊሬላናሰ ቤሴሰ።

25 ጎዳ አንቲ ጸሳሰ ጎይኒቲ፤ ሂሰቲኮ፣ ኢዚ አንቲና ካላኒኔ ሃላን ኣንጃና፤ ታ አንቲ ጊዶፌ ሃርጌ ዲጋና።

26 አንቲ ቢታን ኣይ ማጫሲካ ቦሽቴናኔ ማይኔና። ታኒ አንቲ ዳና ላይላ ኣዲሳና።

27 «ኢንቴናራ ጋጊዛ ዴሬታ ኡባ ዳጋንፋና ማላ ታኒ ታ ያሻቴል ኢንቴ ሲንፋራ ዬዳና፤ ኢንቴ ሞርኬቲ ወሪ ኢንቴሰ ዘኮ ዛሪዲ፤ ባቃታና ማላ ታ ኦፋና።

28 ታኒ ኢንቴፌ ሲንፋራ ካዜ ዬዳዳ ሂዌታ፤ ካናኔታኔ ሂቴታ ጎዳ ኬሳና።

29 ጊዶ ኣቲን ቢታይ ካሎ ኣቶንታ ማላኔ ዶኣይ ዳርንታ ማላ፤ ታ ኢሰታ ኢሲ ላይፋ ጋርሳን ጎዲኬ።

30 ጊዶ ኣቲን ኢንቴ ቆዳን ዳሪዲ፤ ሄ ቢታ ላታና ጋካናሰ፤ ታኒ ኢሰታ ጉል ጉል ጎዳ ኬሳና።

31 ታኒ ኢንቴ ዛዋ ዘኦ ኣባፌ ሜዲቴራኔ ኣባ ጋካናሰ፤ ባዘፌ ኤፊራጺሴ ሻፋ ጋፋና። ሄ ቢታን ዲዛዝ ኡባ ታኒ ኢንቴ ኩሼን ኣፋ ኢማና፤ ኢንቴካ ኢሰታ ኢንቴ ሲንፋፌ ጎዲ ኬሳና።

32 ኢሰታራ ዎይኮ ኢሰታ ኤቃ ጸሳታራ ጫቆን ጌሎፒቴ።

33 ኢሰታ ኢንቴ ቢታን ዎልፍቴ፤ ኢንቴ ሂሰቶንታ ኣጊኮ ኢሰታ ኢንቴና ታ ቦላ ናጋራ ኦሲሳና፤ ኣይሰ ጊኮ ኢሰታ ኤቃታሰ ጎይኒዛይሲ ቱማፔ ኢንቴሰ ናርጸ ጊዳና» ጊዴሰ።

## 24

### ጸሲ ባ ኣሳሰ ጌሊዳ ጫቆ ቃላ ሚንፊዴሰ

1 ጎዳይ ሙሴ፤ «ኔኒ፤ ኣርኔይ፤ ናዳቤይ፤ ኣቢሁይኔ ኢሰራኤሊፒ ላፑን ታሙ ዴሬ ሃላቃቲ ጎዳኮ ዙማ ቦላ ፑዴ ኬዚዲ ሃሆን ኤቂዲ ታሰ ጎይኒቴ።

2 ጊዶ ኣቲን ኔኒ ኔርካ ታኮ ሺቃ፤ ሃራቲ ታ ማታ ሺቆፔቶ። ቃሴ ኣሳይካ ኔናራ ፑዴ ኬዘፖ» ጊዴሰ።

3 ሙሴይ ዪዲ ጎዳ ቃላኔ ኢዛ ዎጋ ኡባ ኣሳሰ ዮቲን ኣሳይ ወሪ ኢሲ ቃላን፤ «ጎዳይ ዮቲዳይሳ ኡባ ኑኒ ኦፋና» ጊዴሰ።

4 ሙሴይ ጎዳይ ዮቲዳይሳ ኡባ ጸፊዴሰ።

ዎንቴፋ ጋላሰ ማላዶ ዎንታራ ዴንዲዲ ዙማ ጋርሳን ያርሺዛሶ ገግሲዲ ኢሰራኤሊ ኣሳ ታማኔ ናሞኡ ቆሞታ ሱንፋን ታማኔ ናሞኡ ሹቕ ቱሳ ማላ ኤሲዴሰ።

5 ኢዚ ኢሰራኤሊ ኣሳፔ ናቴፋ ኣቱማ ናይታ ኪቲን፤ ኢሰቲ ቢዲ ጎዳሰ ሚርጎታ ጸጌቲዛ ያርሾኔ ኢሲፊቴፋ ያርሾ ሂሰቲ ያርሺዲ።

6 ሙሴይ ሱፋፌ ባጋ ኤኪዲ ኬሬታን ቆሊዴሰ፤ ኣቲዳ ሱፋ ያርሾ ያርሺዛ ሶሆዛን ጫጫፊዴሰ።

7 ሄሳፌ ጉዬ ጫቆ ቃላ ማጸፋ ኤኪዲ ኣሳሰ ቶቁ ሂሰቲዲ ናባቢን ኣሳይ፤ «ጎዳይ ዮቲዳይሳ ኡባ ኑኒ ኦፋናኔ ኣዛዜታና» ጊዴሰ።

8 ሙሴይካ ኬሬታን አቲዳ ሱላ ኤኪዲ አሳ ቦላ ወጺዲ አሳ፡ «ቤኢቱ፡ ሃይሲ ጎዳይ ሃይታ ቃላታ ኢንቴስ ኢሚሽ ኢንቴናራ ዋሉዳ ጫቆ ሱላ» ጊደሰ።

9 ሄሳፌ ጉዬ ሙሴይ፡ አሮኔይ፡ ናዳቤይ፡ አቢሁይኔ ኢሰራኤል ሃላቃታ፤ ላፑን ታማቲ ፑዴ ኬዚዲ፡

10 ኢሰራኤል ጸሳ ቤኢዳ፤ ኢስቲ ቤኦይሲካ ኢዛ ቶሆፕ ጋርሳራ ሳሎ ማላ ጌዬ ኡቲዳ ሲምፔሬ ጌቴቲዛ ሹቻፌ ኦሴቲዳ ሚሽ ሚሳቲዛ ወይጌ ዲዛይሳኮ።

11 ጊዶ አቲን ጸሲ ኢሰራኤል አሳ ሃላቃታ ዋዲቤና፤ ኢስቲ ጸሳ ቤኢዳ፤ ኢዛ ሲንላን ሚዳኔ ኡዪዳ።

### ሲና ዙማ ቦላ ሙሴ ኬስ

12 ጎዳይ ሙሴስ፡ «ኔኒ ታኮ ዙማ ቦላ ፑዴ ሃያ፤ ሃ ታኮ ኬዛዳ ሃን ጋምኣ፤ ሂስቲኮ ኔኒ ዋጋ ታማርሳና ማላ ታኒ ዋጋኔ አዛዘ ኢዛ ቦላ ጸፊዳ ሎቻ ሹቻታ ኔስ ኢማና» ጊደሰ።

13 ሄሳፌ ጉዬ ሙሴይ ባ አይሌ ኢያሶራ ባና ኬዚን ሙሴይ ፑዴ ጸሳ ዙማ ቦላ ኬዚደሰ።

14 ኢሰራኤል አሳ ሃላቃታ ኢዚ፡ «ኮኒ ኢንቴኮ ሲማናሽ ጋካናስ ሃይሳን ዲሺቴ፤ አሮኔይኔ ሁሬይ ሃን ኢንቴናራ ዴቴስ፤ ዮኦይ ዲዛ አሲ ኦኒካ ኢስታኮ ቦ» ጊደሰ።

15 ሙሴይ ዙማ ቦላ ፑዴ ኬዚን ጸሳ ሻራይ ዙማ ካሚደሰ።

16 ጎዳ ቦንቾይካ ሲና ዙማ ቦላ ዋዲ ጋምኢደሰ፤ ኡሱፑን ጋላስ ጋካናስ ሻራዚ ዙማ ጎዚ ኦይኪደሰ፤ ላፑንላ ጋላሳን ሻራ ጊዶራ ጎዳይ ሙሴ ዴይጊደሰ።

17 ኢሰራኤል ናይታስ ጎዳ ቦንቾይ ዙማ ዴራን ኤጺዛ ታማ ሚሳቲዲ ቤቲደሰ።

18 ሄሳፌ ጉዬ ሙሴይ ሄ ሻራ ጊዶ ጌሊዲ ፑዴ ዙማ ቦላ ኬዚዲ ሄን ኦይዱ ታሙ ጋላሲኔ ኦይዱ ታሙ ቃማ ጋምኢደሰ።

## 25

### ጸሳ ዱንካኔ አላናስ ኢሚቲዳ ኢሞታ

1 ጎዳይ ሙሴስ ሂዘጊደሰ፡

2 «ታስ ኢሞታ ኤሃና ማላ ኔኒ ኢሰራኤል ናይታስ ዮታ፤ ታስ ኢማናስ ኢዛ ዋዚናይ ኢዛ ኢማ ኢማ ጊን ኢሚዛ አሳ ኢሞታ ኡባ ኔ ታስ ኤካ።

<sup>3</sup> እንጥ ኢስታፌ ኤካና ኢሞታይ ሃይታንታ፤ ዋርቃ፥ ቢራ፥ ጸርቁማላ፥

<sup>4</sup> ሳሎ ሚሳቲዛ ቃጪና፥ ኦቻ ቴራ ሚሳቲዛ ቃጪና፥ ጾቃ ዞኦ ቃጪናን ቦላ ሊቆ ላይኖ፥ ዳይሻ ኢስኬ፥

<sup>5</sup> ጳርሾ ኢቴ ዞኦ ቃላሚን ዬጊ ኬሲዳይሳ፥ ኣባ ጊደን ዲዛ ኢሲ ዶኣ ጋልባ፥ ኦዶሮ ሚሐ፥

<sup>6</sup> ጸሞፔስ ዋጋራ ዛይቴ፥ ቲዬቲዛ ዛይቴሲኔ ኤጻኔስ ሳዊሲዛ ቂማሚ፥

<sup>7</sup> ኤፋዴኒኔ ቲራ ቦላን ዲዛ ከሴታ ጊደን ዋሒዛ ማርጊዴ ጌቴቲዛ ሹቻታኔ ሃራ ኣልኦ ሹቻታ።

<sup>8</sup> «ሂስቲዲ ታኒ ኢስታ ጊደን ኣቃና ማላ ኢስቲ ታስ ዱማ ጎይኒዛ ሶ ጊጊሴቶ።

<sup>9</sup> ጸሳ ዱንካኔዛኔ ኢዛ ጊደን ዲዛ ሚሻታ ታኒ ኔና ቤሲዛ ሌሚሶዛ ማላ ኦሒቴ።

### ጫቆ ቃላ ታቦታ

(ኬሳ 37:1-9)

<sup>10</sup> «ኢስቲ ኦዶሮ ሚሓፌ ኣዱሳቴላይ ናሞኡ ዋቋኔ ባጋ፥ ጎሞፓይ ኢሲ ዋቋኔ ባጋ፥ ቶቃቴላይ ቃሴ ኢሲ ዋቋኔ ባጋ ጊዲዛ ታቦታ ኦሴቶ።

<sup>11</sup> ሶ ባጋኔ ካሬ ባጋ ዋላካይ ባይንዳ ዋርቃን ሚሻ፤ ኢዛ ዩዪ ኣቋናስ ቦላ ባጋ ጸንጸ ዋርቃራ ዩሻ ኣላ ኦላ።

<sup>12</sup> ታቦታስ ኦይዱ ዋርቃ ሳጋዮታ ኦላዳ ኦይዱ ቶሆታን ኢሲ ባጋራ ናሞኡ ሳጋዮታ፥ ቃሴ ሃንኮ ባጋራ ናሞኡ ሳጋዮታ ኦላ።

<sup>13</sup> ሄሳፌ ጉዬ ኦዶሮ ሚሓፌ ቶሆ ሚሓታ ኬሳዳ ዋርቃ ቲያ።

<sup>14</sup> ታቦታ ቶካና ማላ ታቦታዛ ሚሌን ዲዛ ሳጋዮታን ቶሆ ሚሓታ ጌልላ።

<sup>15</sup> ቶሆ ሚሓቲ ታቦታ ሳጋዮታ ጊደን ዴቶ፤ ኢስቲ ሄፔ ሙሌካ ኬዘፔቶ።

<sup>16</sup> ታኒ ኔስ እሚዛ ጫቆ ቃላ ማርካ ታቦታ ጊደን ዋላ።

<sup>17</sup> «ሃራራ ዋላኬቶንታ ዋርቃፌ ጸላላ ናሞኡ ዋቋኔ ባጋ ኣዱቂዛ፥ ኢሲ ዋቋኔ ባጋ ኣኪዛ ማርቴላ ካማ ኦላ።

<sup>18</sup> ካማዛ ጴራ ናሞኡ ባጋራ ቆጶዳ ናሞኡ ኪሩቤታ ዋርቃፌ ኦላ።

<sup>19</sup> ኢሲ ኪሩቤዛ ኢሲ ባጋ ጋጸን፥ ናሞኣንሎ ኪሩቤዛ ሃንኮ ባጋ ጋጸን ናሞኣታካ ማርቴላ ካማዛራ ጋላ ኦላ።

<sup>20</sup> ኪሩቤቲ ባ ቂፌ ዴንሒዲ ማርቴላ ካማ ቦላራ ካሜቶ፤ ቃሴ ኢሶይ ኢሳኮ ሲሚ ኡቲዲ ካማዛኮ ጴሌቶ።

21 ታኒ ኔስ አሚዛ ጫቆ ቃላ ማርካ ታቦታ ጊደን ዋላ፤ ቃሴ ካማዛ ታቦታስ ቦላ ባጋራ ዋላ።

22 ጫቆ ቃላ ማርካይ ኢዛን ዲዛ ታቦታ ካማ ቦላ ዲዛ ናምኡ ከሩቤታፔ ጊደን ታኒ ኔናራ ጋጋዳ ኢስራኤሌ አሳስ አሚዛ አዛዙ ኡባ ሄን ታ ኔስ አማና።

ጸሳስ ሸቂዛ ኡኬል ኢዛን ዋሊዛ ጸራጴዛ

(ኬሳ 37:10-16)

23 «ኦዶሮ ሚላፌ አዱሳቴላይ ናምኡ ዋቆ፡ ጎምፓይ ኢሲ ዋቆ፡ ቋቃቴላይ ቃሴ ኢሲ ዋቆ፤ ባጋ ጊዲዛ ኢሲ ጸራጴዛ ኦላ።

24 ሂስታዳ ዋላካይ ባይንዳ ዋርቃን ቲያ፤ ቃሴ ኢዛ ዩሾን ዋርቃ ጸንጸ ዩሻ አላ።

25 ሄሳሶካ ቃሴ አሆቴሊ ታቆኮ ጊዲዛ ጸንጸ ኢዛ ቦላ ዩሻ አላ። ሂስታዳ ኢዛ ቦላ ዋርቃ ባልጸንል ዩሻ አላ።

26 ጸራጴዛዛስ ኦይዱ ዋርቃ ሳጋዮታ ሜቆዳ፡ ጸራጴዛ ቶሆቲ ዲዛ ኦይዱ ባጋራ ኦይላ።

27 ጸራጴዛ ቶካናስ ቶሆ ሚል ኢዛ ጊደራ አሊዛ ሳጋዮቲ ጸራጴዛዛስ ጸንጸ ማታን ዴቶ።

28 ሄ ቶኪዛ ሚላታ ኦዶሮ ሚላፌ ኬሳዳ፡ ዋርቃ ቲያዳ ኢስታራ ጸራጴዛዛ ቶካ።

29 ሄሳሶካ ቃሴ ሳኔታኔ ፒልኦታ፡ ዱቃና ጸርታኔ ኬሬታ ዋላካይ ባይንዳ ዋርቃፌ አላ።

30 ታ ሲንል አፂዛ ጌሻ ኡኬላይ ኡባ ዋዴካ ጸራጴዛ ቦላፌ ቆዮፖ።

ጸምፔ ኢስታ ቦላ ዋሊዛ ባላታ

(ኬሳ 37:17-24)

31 «ዋርቃፌ ጸላ ቆጶዳ ጸምፔ ኢስታ ቦላ ዋሊዛ ባላታ ኬሳ፤ ቃሴካ ኢዛ ቆጶዳ ጸምፔዚ ኢዛን ኤቂዛ ቶሆ፡ ጊደ ቶማኔ ቶማዛ ኩሬታ፡ ጴመታኔ ጨሻታ ኡባ ኦላ። 32 ኢሲ ሚሌራ ሄሹ ባላቲ፡ ኢሲ ሚሌራ ቃሴካ ሄሹ ባላቲ ኢሲ ቦላ ኡሱፑን ሃጋቲ ኢዛስ ዴቶ።

33 ኡሱፑን ባላታሰካ ኢሳስ ኢሳስ ጴመይኔ ጨሻይ ኢዛን ዲዛ ኦቾሎኔ ጌቴቲዛ ሚላ ጨሽ ሚሳቲዛ ሄሹ ኩሬቲ ዴቶ።

34 ጸምፔዛ ጊደ ቶማይ፡ ጴመቲኔ ጨሻቲ ኢዛን ዲዛ ኦቾሎኔ ጌቴቲዛ ሚላ ጨሽ ሚሳቲዛ ኦይዱ ኩሬቲ ዴቶ።

35 ናምኣይ ናምኣይ ኢሲፌ ዋላን ዲዛ ሄሹ ባላታፔ ጋርሳራ ኢሲ ኢሲ ደምይ ዳኦ።

36 ደምቴኒ ባላቲ ወሪ ጊዶ ቶማዛፔ ቆጶቲዲ ዋላካይ ባይንዳ ዋርቃፌ ኦሴቴቶ።

37 «ሄሳፌ ጉዬ ጸምፔ ዋሊዛሶዛሰ ላፑን ኤጲዛሶ ገገሳዳ ጸምፔቲ ሲንላ ባጋ ፖኣና ማላ ኦይላ።

38 ጸምፔዛ ቦላ ኤጲሹ ቃሚዳ ሻሎታ ኬሲዛ ቃጶታኔ ጲጸ ዋሊዛ ሳኔታ ዋላካይ ባይንዳ ዋርቃፌ ኦላ።

39 ጸምፔዚኔ ኢዛ ሚሻቲ ወሪ ሄሹ ታማኔ ኢቻሹ ኪሎ ገራሜ ገዲዛ ዋላካይ ባይንዳ ዋርቃፌ ኦሴቴቶ።

40 ታኒ ኔና ዙማ ቦላ ቤሲዳ ሌሚሶዛ ካላዳ ኣኬካን ኦላ።

## 26

ጸሳ ዲንካኔ

(ኬሳ 36:8-38)

1 «ቃሴ ሎኤሊ ሱቄቲዳ ቦላ ላይኖፔ ዳዴቲዳ ታሙ ማጋላሻታ ዲንካኔዛ ገደን ገገሳ። ቃሴካ ሳሎ ሚሳቲዛ፥ ኦቻ ቴሪ ሚሳቲዛኔ ጴቃ ዘኦ ቃፎሪናራ ሄ ማጋላሻታ ቦላ ኢሲ ሂላን ኪሩቤታ ሚሰሌ ኦሲሳ።

2 ማጋላሻቲ ወሪ ኢሲ ገና ገዴቶ፤ ኢሳ ኢሳ ኣዲሳቴላይ ናምኡ ታማኔ ኦሰፑን ዋጳ፤ ጎምፓይ ቃሴ ኦይዲ ዋጳ ገደ።

3 ኢቻሹ ማጋላሻታ ኢሲፌ ጋላ ሲካ፤ ሃንኮ ኣቲዳ ኢቻሹ ማጋላሻታካ ኢሰታሶካ ኦላ።

4 ኢሲፌ ጋገ ሲኬቲዳ ማጋላሻታፔ ጋጸን ዲዛ ማጋላሻሰ ባልጸንላ ቦላ ሳሎ ሚሳቲዛ ጫርቃፌ ሲጴ ኦላ፤ ቃሴ ኢሲፌ ጋገዲ ሲኬቲዳ ሃንኮ ማጋላሻንካ ሄሳሶ ኦላ።

5 ኢሲፌ ጋገዳ ኢሲ ማጋላሻ ቦላ ኢቻሹ ታሙ ሲጴ ሚሳቲዛ ሚሸ፤ ቃሴ ኢሲፌ ጋገዳ ሃንኮ ማጋላሻ ቦላካ ኢቻሽ ታሙ ሲጴ ሚሳቲዛ ሚሸ ኦላ፤ ሄ ሲጴ ሚሳቲዛ ሚሻቲ ወሪካ ሄ ባጋራኔ ሃ ባጋራ ኢሳይ ኢሳራ ገናን ዳቶ።

6 ሄሳፌ ጉዬ ዋርቃፌ ኢቻሽ ታሙ ቃጶታ ሜዳዳ ገደ ዲንካኔዚ ኢሲኖ ገደና ማላ፥ ሄ ማጋላሻታ ማንጸኮታን ኢሳ ኢሳራ ኦይሴላ።

7 «ገደ ዲንካኔዛ ቦላራ ሃራ ዲንካኔ ኦላናሰ ታማኔ ኢሲ ማጋላሻታ ዳይሻ ኢሰኬፌ ዳዳ።

8 ታማኔ ኢሲ ማጋላሻቲካ ኢሲ ገና ገዴቶ፤ ኢሲ ኢሲ ማጋላሻ ኣዲሳቲላይ ሄሹ ታሙ ዋቋ፥ ጎምፓይ ቃሴ ኦይዱ ዋቋ ገደ።

9 ኢቻሹ ማጋላሻታ ኢሲ ባጋራ ኡሱፑን ማጋላሻታ ቃሴ ሃንኮ ባጋራ ጋላ ሲካ። ኡሱፑንላ ማጋላሻይ ሲንላራ ሶ ባጋ ሲሚ ቃላምኤቶ።

10 ጋሊ ሲኪዳ ማጋላሻታፔ ኢሲ ማጋላሻ ጋጸን ኢቻሽ ታሙ ሲጼ ሚሳቲዛ ሚሻታ ኦላ፤ ቃሴ ጋሊ ሲኪዳ ሃንኮ ማጋላሻታፔ ወርሴላ ማጋላሻ ባልጸንላ ቦላ ኢቻሽ ታሙ ሲጼ ሚሳቲዛ ሚሻታ ኦላ።

11 ጸርቂማላፔ ኢቻሹ ታሙ ቃጴታ ኦላዳ፥ ቃንጎ ሚሳቲዛ ሚሻታ ገደ ጌልላ፤ ሂሰታዳ ቦላ ዱንካኔዛ ኢሲፌ ጋላ ኦይላ። ሂሰቲኮ ሃ ናምኡ ኦይኬቲዳ ካማቲ ኢሲኖ ገደና።

12 ቦላ ዱንካኔዛ ማጋላሻታፔ ፓላሂዳ ባጋ ማጋላሻይ ገደ ዱንካኔዛሰ ጉዬራ ኣላሌቶ።

13 ቦላ ዱንካኔዛ ማጋላሻቲ ናምኡ ባጋራካ ኢሲ ኢሲ ዋቋ ማላ ፓላሂዳ ሄራ ሃራ ኣላሌቲዱ ገደ ዱንካኔዛ ካማና ማላ ናምኡ ባጋ ሚሌራ ኣላሌቶ።

14 «ቦላ ባጋ ዱንካኔዛ ቦላራ ካማናሰ ዘኦ ቃላሚን ጌሊ ኬዚዳ ጳርሾ ኢቲ ገገሳ፤ ቃሴ ኢዛ ቦላራ ካማናሰ ሃላ ገደ ዶኣ ጋልባፌ ሃራ ካማ ገገሳ።

15 «ገደ ዱንካኔዛ ቶሌ ሚላታ ኦዶሮ ሚላፌ ኦላ።

16 ኢሲ ኢሲ ቶሌ ሚላሰ ኣዲሳቲላይ ታሙ ዋቋ፥ ጎምፓይ ኢሲ ዋቋኔ ባጋ ገደ።

17 ኢሲ ቶሌ ሚላሰ ኢሲ ቦላ ኦይኬቲ ኡቲዳ ናምኡ ቶሆታ ኦላ። ገደ ዱንካኔዛ ቶሌ ሚላታ ኡባካ ሂሳሶ ኦላ፤

18 ገደ ዱንካኔዛሰ ዱጌ ባጋራ ናምኡ ታሙ ቶሌ ሚላታ ኬሳዳ፥

19 ኢሲ ኢሲ ቶሌ ሚላሰ ናምኡ ኤቆሶ፥ ሙሌራ ኦይዱ ታሙ ኤቆሶ ቢራፔ ገገሳ።

20 ገደ ዱንካኔዛሰ ፑዴሃ ባጋራ፥ ናምኡ ታሙ ቶሌ ሚላታ ኬሳዳ፥

21 ኢሲ ኢሲ ቶሌ ሚላሰ ናምኡ ኤቆሶ፥ ሙሌራ ኦይዱ ታሙ ኤቆሶ ቢራፔ ገገሳ።

22 ቃሴ ገደ ዱንካኔዛሰ ጉዬራ ኣርሼይ ወሊዛ ባጋራ ኡሱፑን ቶሌ ሚላታ ኬሳዳ፥

23 ጉዬ ባጋራ ዱዛ ዘዜታሰ ናምኡ ቶሌ ሚላታ ገገሳ።

24 ጉዬ ባጋራ ዱዛ ቶሌ ሚላቲ ወሪ ጸጸፔ ጴራ ጋካናሰ ኢሲ ቦላ ጋገ ኦይኬቲዳ፥ ጴራን ኢሶይ ኢሳራ ሳጋዮን ኦይኬቲቶ፤

ሄሳሶካ ናምኡ ዘዘታ ቦላ ዲዛ ናምኡ ቶሌ ሚላቲካ ሃራ ቶሌ ሚላታራ ኦይኬቲቶ።

<sup>25</sup> ኢሲ ኢሲ ቶሌ ሚላሰ ጋርሳራ ናምኡ ናምኡ ቶሌ ኤቆሶይ ዴኣ፤ ሙሌራ ኦስፑን ቶሌ ሚላቲኔ ቢራፔ ኦሴቲዳ ታማኔ ኡሱፑን ኤቆሶይ ዴዮ።

<sup>26</sup> «ቃሴ ሜጋ ሚላታ ኦዶሮ ሚላፌ ኬሳ። ጊዶ ዱንካኔዛሰ ኢሲ ባጋ ሚሊን ዲዛ ቶሌ ሚላታሰ ኢቻሹ ሜጋ ሚላታ።

<sup>27</sup> ቃሴ ሃንኮ ባጋ ሚሊን ዲዛ ቶሌ ሚላታሰ ሃኢካ ኢቻሹ ሜጋ ሚላታ ገሊሳ። ሄሳሶካ ጊዶ ዱንካኔዛሰ ጉዬራ ኦርሼይ ወሊዛ ባጋራ ዲዛ ቶሌ ሚላታሰ ኢቻሹ ሜጋ ሚላታ ገሊሳ።

<sup>28</sup> ጊዶ ሜጋ ሚላቲ ቶሌ ሚላታሰ ጊዶራ ሃ ጋጸፔ ሄ ጋጸ ጋካናሰ ካንፊ ኬዛናሰ ቤሴሰ።

<sup>29</sup> «ቶሌ ሚላታ ዋርቃን ቲያዳ ሜጋ ሚላቲ ኢሰታ ጊዶራ ኦጲዛ ሳጋዮታ ዋርቃፌ ኦላ፤ ቃሴ ሜጋ ሚላታካ ዋርቃን ቲያ።

<sup>30</sup> ጊዶ ዱንካኔዛ ታኒ ኔና ዙማ ቦላን ቤሲዳ ለሚሶዛ ማላ ቶካ።

<sup>31</sup> «ሳሎ ሚሳቲዛፔ፣ ኦቻ ቴራ ሚሳቲዛ ቃጨናፔኔ ጾቃ ዘኦ ቃጨናፔኔ ሎኢ ሱቄቲዳ ሊቆ ላይኖፔ ኢሲ ማጋላሻ ኦላ፤ ሄ ማጋላሻዛ ቦላ ኪሩቤታ ሚሰሌ ሲኪ ሜጲዛ ሂላን ኦሲሳ።

<sup>32</sup> ሂሰታዳ ኦዶሮ ሚላፌ ኦሴቲዲ ዋርቃን ቲዬቲዳ ኦይዱ ኤቆ ሚላታ ቦላ ዲዛ ዋርቃፌ ኦሴቲዳ ካቆታን ካቃ። ሄ ኦይዱ ኤቆ ሚላቲ ቢራፔ ኦሴቲዳ ኤቆሶታን ጌሌቶ።

<sup>33</sup> ሄ ማጋላሻዛ ጊዶ ዱንካኔዛ ካራን ዲዛ ቃጵታፔ ጋርሳራ ካቃዳ፣ ጫቆ ቃላሰ ማርካ ጊዲዳ ታቦታ ማጋላሻዛፔ ጋላ ባጋራ ዋላ፤ ሂሰቲኮ ሄ ማጋላሻዚ ጌሽ ጌቴቲዛ ሶሆዛ ኡባፌ ዱማቲዛ ቆልኣፌ ጊዶን ሻካና።

<sup>34</sup> ማሮቴላ ካማ ኡባፌ ዱማቲዳ ቆልኣን ዲዛ ጫቆ ቃላሰ ማርካ ጊዲዳ ታቦታ ቦላ ዋላ።

<sup>35</sup> ጸራጴዛዛ ማጋላሻፔ ካሬራ ፑዴ ባጋራ ዋላ፤ ጸምፔ ዋሊዛ ባላ ቃሴ ኢዛ ገናን ዱጌ ባጋራ ዋላ።

<sup>36</sup> «ዱንካኔዛን ጌሊዛ ፔንጌዛሰ ሳሎ ሚሳቲዛ ቃጨናፔ፣ ኦቻ ቴራ ሚሳቲዛ ቃጨናፔ፣ ጾቃ ዘኦ ቃጨናፔኔ ሎኢ ሱቄቲዳ ሊቆ ላይኖፔ ጸልፔን ኣሌቂሲ ኦሴቲዳ ማጋላሻ ገሊሳ።

<sup>37</sup> ማጋላሻዛሰ ኢቻሹ ኤቆ ሚላታ ኦዶሮ ሚላፌ ኬሳዳ፣ ዋርቃን ቲያ፤ ኢሰታ ካቆቲካ ዋርቃፌ ኦሴቲዳ ጊዴቶ፤ ኤቆ ሚላታሰ ጸርቂማላፔ ኦሴቲዳ ኢቻሹ ኤቆሶ ገሊሳ።

## 27

ጳርቂማላፔ ኦሴቲዳ ያርሾሶሆ  
(ኬሳ 38:1-7)

<sup>1</sup> «ኦዶሮ ሚላፌ ያርሺዛሶ ኦላ። ሄ ያርሺዛሶዛ ጶቃቴላይ ሄቩ ዋቋ፤ ጎምፓይኔ ኦዱሳቴላይ ኢሲ ማላ፣ ኢቻሹ ኢቻሹ ዋቋ ጊዲዲ ኦይዲ ዘዜራ ዴዮ።

<sup>2</sup> ኦይዲ ዘዜታ ዉርሴላ ጋጸን ጋጸን ኢሲ ኢሲ ካጨ ሜቋ፤ ካጨቲ ያርሾሶዛፔ ኦሴቲቶ። ሂሰታዳ ያርሺዛሶዛ ጳርቂማላ ቲያ።

<sup>3</sup> ኢዛን ጎኤቲዛ ሚሻታ፣ ቢዲንሐ ካሺዛ ሚሻታ፣ ካሺቲዳ ቢዲንላ ኬሲዛ ሚሻታ፣ ኬሬታ፣ ኦሾ ጸዲዛ ኮንጨታኔ ታማ ካቺዛኔ ኬሲዛ ሚሻታ ኡባ ጳርቂማላፔ ኦላ።

<sup>4</sup> ሂሰታዳ ኢዛሰ ጳርቂማላፔ ዛይዛሬ ማላ ሚሺኔ ኦይዲ ጉላታ ቦላን ኦይዲ ሳጋዮታ ኦላ።

<sup>5</sup> ሂሰታዳ ያርሺዛሶዛሰ ዳባ ቦላ ዋላ።

<sup>6</sup> ኦዶሮ ሚላፌ ያርሺዛሶዛሰ ቶሆ ሚላታ ኬሳዳ ጳርቂማላ ቲያ።

<sup>7</sup> ያርሺዛሶዛ ቶኪዛ ዋዴ ማዳና ማላ ሄ ቶሆ ሚላታሰ ናምኡ ሚሌራ ዲዛ ሳጋዮታን ኦላ።

<sup>8</sup> ታኒ ኔና ዙማ ቦላን ቤሲዳ ማላ ያርሺዛሶዛ ሳንቃፌ ኦላዳ ጊዲዛ ዶያ ኦጋ።

ጸሳ ዲንካኔዛ ጊቤ  
(ኬሳ 38:9-20)

<sup>9</sup> «ጸሳ ዲንካኔዛ ጊቤ ሎኢ ዳዴቲዳ ሊቆ ላይኖፔ ማጋላሻታ ጊሊሳ። ዲጌ ባጋራ ዲዛ ማጋላሻታ ኦዱሳቴላይ ጴቱ ዋቋ ጊዶ።

<sup>10</sup> ኢዛሰ ናምኡ ታሙ ኤቆ ሚላቲኔ ኤቆ ሚላቲ ኢሰታን ኤቂዛ ናምኡ ታሙ ኤቆሶታ ጳርቂማላፔ ኦላ፤ ኢሰታ ሁኤን ቃሴ ካቆታኔ ቶሬ ሚላታ ሁኤ ቦላ ጊታ ሳጋዮታ ቢራፔ ኦላ።

<sup>11</sup> ሄሳሶካ ፑዴ ባጋ ኦዱሳቴላይ ጴቱ ዋቋ፤ ቃሴ ናምኡ ታሙ ቶሬ ሚላቲኔ ኤቆ ሚላታሰ ናምኡ ታሙ ጳርቂማላፔ ኦሴቲዳ ኤቆሶቲ ዴቶ። ሂሰታዳ ቢራፔ ኦሴቲዳ ካቆታኔ ኤቆ ሚላታሰ ሁኤ ቦላ ጊታ ሳጋዮታ ዋላ።

<sup>12</sup> ኦርሼይ ዉሊዛ ባጋራ ኦኮቴላይ ኢቻሹ ታሙ ዋቋ ጊዶ፤ ታሙ ቶሬ ሚላቲኔ ቶሬ ሚላታሰ ታሙ ኤቆሶቲ ዲዛ ማጋላሻቲ ኢዛሰ ዴቶ።

<sup>13</sup> ቃሴ ኦርሼይ ሞኪዛ ባጋራ ኦኮቴላይ ኢቻሹ ታሙ ዋቋ ጊዲዲ፤

14 ፔንጌዛፔ ኢሲ ባጋራ ታማኔ ኢቻሹ ዋዳ ኣዲቂዛ ማጋላሻቲ ዴቶ፤ ኢሰታሰ ሄሹ ኤቆ ሚላቲኔ ኢሰታን ኤቂዛ ሄሹ ኤቆሶቲ ዴቶ።

15 ሄሳሶካ ሃንኮ ባጋራ ታማኔ ኢቻሹ ዋዳ ኣዲቂዛ ማጋላሻቲ ዴቶ፤ ኢሰታሰ ሄሹ ኤቆ ሚላቲኔ ኢሰታን ኤቂዛ ሄሹ ኤቆሶቲ ዴቶ።

16 «ፔንጌዛሰ ናምኡ ታሙ ዋዳ ኣዲቂዛ ማጋላሻ ሳሎ ሚሳቲዛ፤ ኦቻ ቲራ ሚሳቲዛኔ ጸቃ ዘኦ ቃጨናፔኔ ሎኢ ሱቄቲዳ ላይኖፔ ዳዴቲዳ፤ ጸልፔን ሎኢዳ ማጋላሻ ገሊሳ። ኢዛ ቱቂ ኦይካናሰ ኦይዱ ኤቆ ሚላቲኔ ቶሬ ሚላቲ ኢሰታን ኤቂዛ ኦይዱ ኤቆሶታ ገሊሳ።

17 «ጊቤዛ ዩዩ ኣዳናሰ ዲዛ ኤቆ ሚላታ ኡባሰ ቢራፔ ኦሴቲዳ ጌታ ሳጋዮቲ፤ ካቆቲኔ ጸርቂማላፔ ኦሴቲዳ ኤቆሶቲ ዴቶ።

18 ጊቤዛ ኣዲሳቴላይ ጸቱ ዋዳ፤ ኣኮቴላይ ኢቻሽ ታሙ ዋዳ ጊዶ፤ ቶቃቴላይ ኢቻሹ ዋዳ ጊዲዳ ሎኢ ሱቄቲ ዳዴቲዳ ላይኖፔ ኦሴቲዳ ማጋላሻቲ ዴቶ፤ ቃሴካ ጸርቂማላፔ ኦሴቲዳ ኤቆሶቲ ዴቶ።

19 «ጸሳ ዲንካኔዛ ኦሶሰ ጎኤቲዛ ሚሻቲ፤ ዲንካኔዛኔ ጊቤዛ ቶሌ ጳሽኬቲ ዉሪካ ጸርቂማላፔ ኦሴቲቶ።

### ጸምፔ ዛይቲ

(ሌዌ 24:1-4)

20 «ጸምፔይ ቶኦንታ ኤጲሼ ዳና ማላ ኢዛሰ ኮሺዛ ዛይቲ ዋጋራ ሚላ ኣይፌ ጫዲ ጉምኢዲ ጸሎ ዛይቲ ኔሰ ኤሃና ማላ ኢሰራኤሌ ናይታ ኣዛዛ።

21 ኣሮኔይኔ ኢዛ ኣቱማ ናይቲ ጸምፔይ ጎዳ ሲንላን ቃሚዳ ጋዴይ ዋንታና ጋካናሰ ፖኣና ማላ፤ ጸሳ ዲንካኔዛ ጊዶን፤ ጫቆ ቃላሰ ማርካይ ኢዛ ጊዶን ዲዛ ታቦታ ሲንላን ዲዛ ማጋላሻፔ ካሬራ ኤፌቶ። ሃይሲ ኢሰራኤሌ ኣሳሰ ሜርናሰ ዋጋ ጊዲ ዴኦ።

## 28

### ቄሴታ ማይኦ

(ኬሳ 39:1-7)

1 «ኔ ኢሻ ኣሮኔኔ ኢዛ ኣቱማ ናይታ ናዳቤ፥ ኣቢሁ፥ ኤልኤዜሬኔ ኢታማሬ ኔኮ ኢካ ያ፤ ኢሰቲ ቄሴ ጊዲዲ ታሰ ኦላና ማላ ኢሰራኤሌ ኣሳ ጊዶፌ ኢሰታ ዲማሳ።

2 ኢዛሰ ቦንቸኔ ሎኦቴል ኢማና ማላ ኔ ኢሻ ኣሮኔሰ ዲማ ማይኦ ገሊሳ።

3 ታሲ ዲማ ዲማ ኤራቴል ኢሚዳ ኩሼ ሂላ ኤሪዛ ኣሰ ኡባ ዴይጋዳ ኣሮኔስ ማይኦ ገሊሳና ማላ ዮታ፤ ኢዚካ ቄሴ ገዲዲ ታሰ ኦሳናሰ ዲማቶ።

4 ኢስቲ ገሊሳና ማይኦቲካ ሃይታንታኮ፤ ቲራ ኪሴ፥ ኤፋዴ፥ ኤፋዴ፤ ጋርሳራ ማይኢዛ ሃራ ማይኦ፥ ቃሴካ ኡባፌ ጋርሳራ ማይኢዛ ኣዲሳ ማይኦ፥ ጎሴኔ ዳንጮ። ኔ ኢሻይ ኣሮኔይኔ ኢዛ ኣቱማ ናይቲ ቄሴ ገዲዲ ታሰ ኦሊሹ ዲማ ማይኦታ ማይኣና ማላ፥ ማይኦ ገሊሴቶ።

5 ኩሼ ሂላቴል ኤሪዛይቲካ ሄ ማይኦታ ገሊሳናሰ፥ ዋርቃ፥ ሳሎ ሚሳቲዛ፥ ኦቻ ቴራ ሚሳቲዛኔ ጴቃ ዞኦ ቃጪናኔ ሊቆ ላይኖ ኤኪ ኦሌቶ።

### ኤፋዴ

6 «ኤፋዴ ጌቴቲዛ ማይኦ ዋርቃፌ፥ ሳሎ ሚሳቲዛ፥ ኦቻ ቴራ ሚሳቲዛ፥ ጴቃ ዞኦ ቃጪና፤ ሎኢ ሱቄቲዳ ሊቆ ላይኖ፤ ኩሼ ሂላቲ ኣሌቂሲ ገሊሴቶ።

7 ኢዛሰ ሃሹራ ዲጌ ዋጂዛ ናሞኡ ካቆቲ ዴቶ፤ ኢስቲካ ቢዲ ኤፋዴ ማይኦዛራ ኢሲፌ ሃራ ኦይሉዛ ሚሻራ ዳባ ቦላ ኦይኬቲዲ ኢሲኖ ገዴቶ።

8 ሂላይ ሎኤሉዲ ዳዲዳ ዳንጮይካ ኤፋዴዛ ማላ ዋርቃፌ፥ ሳሎ ሚሳቲዛ ኦቻ ቴራ ሚሳቲዛ፥ ጴቃ ዞኦ ቃጪና፤ ሎኢ ባቄቲዳ ላይኖ፤ ኤፋዴዛራ ኢሲፌ ኦይኬቲ ዳዴቶ።

9 «ማርጊዴ ጌቴቲዛ ናሞኡ ሹቻታ ኤካዳ ኢሰራኤሌ ናይታ ሱንሳ ኢስታ ቦላ ዋጫ ጸፋ።

10 ኢስታ ዩሌታ ማራ ማላ ኢሲ ሹቻ ቦላ ኡሱፑን ሱንሳ፥ ሃንኮ ሹቻ ቦላ ቃሴ ኣቲዳ ኡሱፑናታ ሱንሳ ዋጫ ጸፋ።

11 ሂላንቻይ ማታሜ ቦላ ሱንሳ ዋጪ ጸፊዛ ማላ፥ ሄ ናሞኡ ሹቻታ ቦላ ኢሰራኤሌ ናይታ ሱንሳ ዋጫ ጸፋዳ ዩዩ ኣጳናሰ ዋርቃፌ ገጌቲዳ ሚሻ ገደን ዋላ።

12 ሂስታዳ ታማኔ ናሞኡ ኢሰራኤሌ ዜሬላታ ቆፍሲዛዝ ገደና ማላ ሃ ናሞኡ ሹቻታ ኤፋዴዛራ ኦይላዳ ሃሹ ቦላ ዋላ፤ ሂስቲኮ ጎዳ ሲንሳን ኡባ ዋዴ ቆፊታና ማላ ሃ ሱንሳታ ኣሮኔይ ባ ሃሹ ቦላ ቶኮ።

13 ሹቻታ ዋላናሰ ዋርቃፌ ዶቄቲ ገሊዳ ማጫራታ ኦላ።

14 ቃሴ ዋላካይ ባይንዳ ዋርቃፌ ዋደር ማላ ዶቄቲዳ ናሞኡ ኦርዴ ሳንሳላታታ ገሊሳዳ፥ ሹቻታ ዋላናሰ ዋርቃፌ ዶቄቲ ገጌቲዳ ማጫራታራ ጋላ ኦዬሴላ።

ቲራ ኪሴ  
(ኪሳ 39:8-21)

15 «ጎዳ ሼኔይ አዛኮኔ ኢዛ ኦይቺዲ ኤሪዛ ቲራ ኪሴ ኩሼ ሂላንቻን ኦሲሳ። ሄ ቲራ ኪሴ ኤፋዴ ዳዲዳ ማላ፣ ዋርቃፌ፣ ሳሎ ሚሳቲዛ፣ ኦቻ ቲራ ሚሳቲዛኔ ጾቃ ዞኦ ቃጨናፔኔ ሎኢ ሱቄቲዳ ላይኖፔ ዳዳ።

16 ኢዛሰ አዲሳቴላይኔ አሆቴላይ ዳኮቲ ቃላምኤቲዲ ኢሲ ታታኮ ጊዶ።

17 ሄሳፌ ጉዬ ኢዛ ቦላ ኦይዱ ማራን አልኦ ሹቻታ ዋላ፤ ኮይሮ ማራን ሳርዲዮኔ፣ ቶጳዚዮኔኔ ጳሊዛ ኢንቁ።

18 ናምኣንሉ ማራን ባሉሬ፣ ሲምፔሬኔ አልማዜ ጌቲቲዛ አልኦ ሹቻታ፤

19 ሄዛንሉ ማራን ያኪንቲ፣ ኬልቄዶኔኔ አማቴሰጺኖሴ፤

20 ኦይዳንሉ ማራን ቢሪሌ፣ ማርጊዳ፣ ያሰጺዳ። ሃይታንቲ ዉሪ ሹቻታ ዋላናሰ ዋርቃፌ ዶቄቲ ጊጊዳ ማጫራታ ቦላ ኡቴቶ።

21 ኢሰራኤሌ ቆሞታ ሱንላ ቆዳ ማላ፣ ሹቻታ ቆዳይካ ታማኔ ናምኤ ጊዶ፤ ኢሳ ኢሳ ቦላ ማታሜ ማላ ዋጩቲዲ ታማኔ ናምኤ ዜሬላታ ሱንሊ ሄ ሹቻታን ጸፊቶ።

22 «ቲራ ኪሴሰ ዋላካይ ባይንዳ ዋርቃፌ ዋዶሮ ማላ ዶቄቲዳ ኦርዳ ሳንሳላታታ ኦላ።

23 ናምኤ ዪች ዋርቃፌ ጊጊሳዳ ቲራ ኪሴሰ ቆሞ ጋጸ ጸራራ ጋላዳ ኦይላ ዋላ።

24 ሄ ናምኤ ዋርቃ ሳንሳላታታ ቲራ ኪሴታሰ ጸራታን ዲዛ ሳጋዮታራ ጋላ ኦይላ።

25 ሄ ሳንሳላታታሰ ሃንኮ ባጋ ጸራ ቃሴ ኤፋዴዛሰ ሲንላ ባጋራ፣ ሃሼ ቦላ ዲዛ ሹቻታ ዋላናሰ ዋርቃፌ ዶቄቲ ጊጊዳ ማጫራታራ ጋላ ኦይሴላ።

26 ቃሴካ ናምኤ ዋርቃ ዪቻታ ጊጊሳዳ፣ ኤፋዴፔ ካሊ ዲዛ ቲራ ኪሴታሰ ጋላ ባጋራ ዲዛ ናምኤ ጸራታን ኦላ።

27 ሄሳሶካ ዋርቃፌ ሃራ ናምኤ ዪቻታ ጊጊሳዳ ኤፋዴዛሰ ሲንላ ባጋራ፣ ሃሼ ቦላ ዲዛ ካቆዛፔ ጋርሳ ባጋራ፣ ኤፋዴ ዳንጨዛሶፔ ቆሞራ ሲኮይ ጋጊዛሶ ኣቻን ኢሰታ ኦይላ።

28 ቲራ ኪሴን ዲዛ ሳጋዮታ ኤፋዴዛን ዲዛ ሳጋዮታራ ጋሊዲ ሳሎ ሚሳቲዛ ሱቄላን ዳንጨዛራ ጋላ ቃቻ፤ ሂሰቲኮ ቲራ ኪሴዚ ጸሳፌ ቦላራ ዲዛ ጊሻሰ ቃሹይ ሌፔና።

29 «እርኔይ ኡባፌ ዱማ ቆልኣ ጌሊዛ ዋዴ ሄ ቲራ ኪሴን ዲዛ ኢሰራኤል ቆሞታ ሱንፋታ ቶኮ። ሂሰቲኮ ሃይሲ ጎዳ ሲንፋን ኡባ ዋዴ ሃሳኤታና።

30 ቃሴ ኡሪማኔ ቱሚማ ጌቲቲዛይታ ቲራ ኪሴታን ዩጋ። እርኔይ ጎዳ ሲንፋ እዲሼ ባ ቲራን ዋሊ ኤኪ ጌሎ። ጎዳ ሼኔይ አዛኮኔ ኢሰራኤል አሳ ኤሪሳና ማላ፣ ኢዚ ጎዳ ሲንፋን ኦፋናሰ ጌሊዛ ኡባ ዋዴ ቲራ ኪሴፔ ዳይሶፎ።\*

ቄሴቲ ማይኢዛ ሃራ ማይኦታ

(ከ.ሳ 39:22-31)

31 «ኤፋዴዛፔ ቦላራ ማይኤቲዛ አዱሳ ማይኦ ሳሎ ሚሳቲዛ ጫርቃፌ ጸላ ገሊሳ።

32 ሄ አዱሳ ማይኦዛሰ ሁኤይ ጌሊዛሶ ገሊሳ። ሁኤይ ኬዚዛሶዚ ዳኬቶንታ ማላ ሶ ባጋ ቃላምአዳ ዩሻ አላ ሲካ።

33 አዱሳ ማይኦዛሰ ጋርሳ ባጋ ማጫራ ዩሽን ሳሎ ሚሳቲዛ፣ ኦቻ ቲራ ሚሳቲዛኔ ጾቃ ዘኦ ቃጪናፔ፣ ኦርማኔ ጌቲቲዛ ሚላ አይፌ ሚሰሌታ ሜፋ። ሂሰታዳ ኢስታ ጌዶን ዋርቃፌ ኦሴቲዳ ዳላታ ዋላካን ዋላ።

34 ዋርቃ ዳላቲኔ ኦርማኔ ሚላ አይፌ ሚሰሌቲ ሄ አዱሳ ማይኦ ጋርሳ ባጋ ጾራን ዩዩ አቆናሰ ዋላካን ዴቶ።

35 እርኔይ ቄሴቲላን ኦሊዛ ዋዴ ሃ አዱሳ ማይኦዛ ማይኦ፤ ጎዳ ሲንፋ ኡባፌ ዱማ ቆልኣ ጌሊዛ ዋዴኔ ኬዚዛ ዋዴ ዳላይ ጌራና። ኢዚ ሄ ማይኦዛ ማይኢኮ ሃይቄና።

36 ዋላካይ ባይንዳ ዋርቃፌ ኢሲ አሌቆ ገሊሳዳ ማታሚ ዋጪ ኬሲዛ ማላ ኢዛ ቦላ ዋጪዳ፣ ሳዳሰ ጌሽ ጌዲ ዱማቲዴሰን ጋዳ ጸፋ።

37 ሂሰታዳ ሁኤን ጎሳ ቦላ ሳሎ ሚሳቲዛ ቃጪናን ጎሳዛሰ ሲንፋ ባጋራ ኦይላ ካቃ።

38 ሂሰቲዲ እርኔይ ኢዛ ባ ሊጾን ዋሶ፤ ሄን ኢሰራኤል አሳይ ጎዳሰ ኢሞታ ኢሚሼ ሞሪዳ ሚሺ ዲኮካ ሄ ሞርዛ እርኔይ ቶኮ። አሳይ ኤሂዛይሳ ጎዳይ ኤካና ማላ ኢዚ ሄ ጸፊቲዳይሳ ኡባ ዋዴካ ባ ሊጾን ዋላናሰ ኮሼሰ።

39 «እርኔ ሻሚዜ ሊኤ ላይኖፔ ዳዳ፤ ሁኤን ጸጺዛ ጎሳካ ላይኖፔ ገሊሳ። ቃሴ ዳንጮዛካ ጸልፔን አሌቄሳዳ ሲኪሳ።

\* 28:30 ኡሪማይኔ ቱሚማ ኣይሁዳ ቄሴቲ ማይኢዛ ኤፋዴ ጌቲቲዛ ማይኦሰ ቲራ ኪሴን ዋሊዛ ጸላ ሼኔ ኦይቻናሰ ጎኤቲዛ ናምኡ ሚሻታ፤ ጌዶ ኣቲን ኢስቲ ዋኒዲ ዋይኮ ኣዛፔ ኦሴቲዳኮ ኤፊቴና።

40 አርኔ ናይታሰ ቦንቾኔ አሌቆ ጊዳና ማላ፡ ሻሚዜታ፡ ዳንጮታኔ ሁኡን ጸጺዛ ጎሳታ ገገሳ፡

41 ኔኒ ሃ ማይኦታ ኔ አሻ አርኔኔ ኢዛ ናይታ ማይዚዳፔ ጉዬ፡ ኢስቲ ቄሴቴላን ታሰ ኦላና ማላ ኢስታ ዎጋራ ዛይቲ ቲያ፤ ቲያዳ ኢስቲ ቄሴ ጊዱዱ ታሰ ኦላና ማላ ኢስታ ዱማሳ፡

42 ኢስታ ካሎይ ካሚታና ማላ ጋርሳራ ገጸዛ ገለ፡ ጸሳፊ ቢዲ ዎዲራ ጋካናሰ ካሚዛዝ፡ ሊቆ ላይኖ ቃጨናፔ ገገሳ፡

43 አርኔይኔ ኢዛ ናይቲ ጸሳ ዱንካኔ ገዶ ጌሊዛ ዎዴ ዎይኮ ገቤ ገዶን ቄሴቴላን ኦላናሰ ያርሾ ያርሺዛሶ ሸቂዛ ዎዴ ሃይታ ማይኦታ ማይኤቶ፡ ሃሳሶ ሃንኮ ኢስቲ ባንታ ቦላ ቆሆኔ ሃይቆ ኤሄቴና፡ ሃይሲ አርኔሲኔ ኢዛ ዜሬላታሰ ሜርናሰ ዎጋ ገዶ፡

## 29

ቄሴቴላ ኦሶ ገሻሰ አርኔሲኔ ኢዛ ናይታሰ አሜቲዳ ዎጋታ

1 «አርኔይኔ ኢዛ ናይቲ ቄሴ ጊዱዱ ታሰ ኦላና ማላ ኔኒ ኢስታ ዱማሳናሰ ኦላ፤ ዎሶይ ባይንዳ ኢሲ ሚርጎኔ ናምኡ ቆርሾታ ኤካ፡

2 ሎኦ ገሰቴ ቋሌ ኤካዳ ኢርሾ ዬጎንታ ኡኬላ ኡካ፤ ቃሴካ ኢርሾ ዬጎንታ ዛይቲን ጉላ ኡኬላ ኡካ፤ ሃሳሶካ ኢርሾ ዬጎንታ ቄሪ ኡኬላ ኡካዳ ዛይቲ ቲያ፡

3 ኔኒ ሃይታ ለማቴን ዎላዳ፡ ሚርጎዛ ናምኡ ቆርሾታራ ኢሲፊ ታሰ ሺሻ፡

4 «ሂስታዳ አርኔኔ ኢዛ ናይታ ጸሳ ዱንካኔዛ ፔንጌ ኤሃዳ ሃላን ማጫ፡

5 ሃሳፊ ጉዬ ማይኦታ ኤካዳ፡ ሻሚዜ፡ ኤፋዴፔ ቦላራ ማይኢዛ አዱሳ ማይኦ፡ ኤፋዴኔ ቲራ ኪሴ አርኔ ማይዛዳ ኤፋዴዛ ሂላን ዳዴቲዳ ዳንጮን ዳንጨሳ፡

6 ጎሳዛ ኢዛ ሁኡን ጎዚሳዳ፡ ሳዳሰ ጌሽ ጊዱ ዱማቲዴሰን ጌቴቲ ጸፊቲዳ አሌቆዛ ጎሳ ቦላ ዎላ፡

7 ቲዪዛ ዛይቲካ ኤካዳ ኢዛ ሁኡን ቲጋዳ ቲያ፡

8 ኢዛ ናይታካ ኤሃዳ ሻሚዜታ ማይዛ፡

9 ጎሳካ ኢስታ ሁኡን ጎዚሳ፡ ሃሳፊ ጉዬ አርኔኔ ኢዛ ናይታ ዳንጮ ዳንጨሳ፡ ቄሴቴላይ ኢስታሰ ሜርና ኦሶ ዎጋ ገዶ፤ ሃሳሶ ሂስታዳ አርኔኔ ኢዛ ናይታ ቄሴ ሂስታ፡

10 «ኔ ታሰ ሚርጎ ጸሳ ዱንካኔ ሲንላ ኤሂኮ አርኔይኔ ኢዛ ናይቲ ኢዛ ሁኡ ቦላ ባ ኩሼ ዎሊኮ፡

11 ዎፋኖዛ ሃን ጎዳ ሲንላን ሹካ፡

12 ዋፋኖዛ ሱላን ኔ ቢራዴ ጌልላ ኬሳዳ፥ ያርሺዛሶዛ ቦላን ዲዛ ካጩታ ቲያ፤ ቲዩሺን ኣቲዳ ሱላ ያርሺዛሶዛ፤ ጋርሳ ባጋራ ጉሳ።

13 ሄሳፌ ጉዬ ማራጩ ካሚዳ ሞዴ፥ ቲሬዛራ ኦይኬቲ ዲዛ ኣሾ፥ ናሞኡ ከላሆታኔ ኢሰታ ካሚዳ ሃንዳ ኤካዳ፥ ያርሺዛሶዛ ቦላ ዋላዳ ጹጋ።

14 ጊዶ ኣቲን ሚርጎዛ ኣሾ፥ ጋልባኔ ማራጩዛ፥ ሜቲቶንታ ኣሾታ ኣሲ ዲዛሶሆ፤ ሃራሶ ኤፋዳ ናጋራ ያርሾ ጊዳና ማላ ጹጋ፤

15 «ናሞኡ ዳርሾታ፤ ኢሳ ኔ ኤኪኮ ኣሮኔይኔ ኢዛ ናይቲ ባ ኩሼ ኢዛ ሁኤ ቦላ ዋሴቶ።

16 ሹካዳ ሱላ ያርሺዛሶዛ ሚሌ ቦላ ኡባ ባጋራ ወጸ።

17 ዳርሾዛ ኣሾ ቃንጾሬላዳ፥ ቃንላ ኣሾኔ ቶሆታ ሜጫዳ ሁኤዛራኔ ሃንኮ ኣቲዳ ኣሻራ ኢሲ ቦላ ዋላ።

18 ሄሳፌ ጉዬ ዳርሾዛ ሙሌራ ያርሺዛሶዛ ቦላ ጹጋ፤ ሄሲ ጎዳሰ ታማን ጹጌቲዛ ሳዎ ቱኮ ጊዛ ያርሾኩ።

19 «ቃሴ ሃንኮ ዳርሾዛ ኔ ኤኪኮ ኣሮኔይኔ ኢዛ ናይቲ ባ ኩሼ ኢዛ ሁኤ ቦላ ዋሴቶ።

20 ሄ ዳርሾዛ ሹካዳ ኢዛ ሱላፌ ጉሳራ ኤካዳ፥ ኣሮኔሲኔ ኢዛ ናይታሰ ኡሻቻ ሃይላታ ጴራ፥ ኡሻቻ ኩሼ ማንላ ቢራዴታኔ ኡሻቻ ቶሆ ማንላ ቢራዴታ ቲያ፤ ሄሳፌ ጉዬ ኣቲዳ ሱላ ያርሺዛሶ ሚሌ ቦላ ኡባሶራ ወጸ።

21 ያርሺዛሶን ዲዛ ሱላፌ ቲዬቲዛ ዛይቲዛ፤ ጊናራ ኤካዳ፥ ኣሮኔ ቦላኔ ኢዛ ማይኦ ቦላ፥ ኢዛ ናይታ ቦላኔ ኢሰታ ማይኦ ቦላ ወጸ፤ ሂሰቲኮ ኢዛ ኢዛ ናይቲኔ፥ ኢሰታ ማይኦይ ጎዳ ኦሶሰ ዲማታና።

22 «ሃ ዳርሾዛ፤ ጎይናዛኔ ኢዛን ዲዛ ቶልላዛ፥ ማራጩ ቦላን ዲዛ ሞዴ፥ ቲሬዛራ ኦይኬቲ ዲዛ ኣሾ፥ ናሞኡ ከላሆታ፥ ኢሰታ ካሚ ኦይኪዳ ሃንዳራኔ ኡሻቻ ጌዳራ ኔኒ ኤካ፤ ሃይሲ ቄሴቴላ ሱንሐ ኢሚዛ ዋዴ ሹኬቲዛ ዶርሳ።

23 ጎዳ ሲንላን ዋሊዳ ኢርሾይ ጌሎንታ ኡኬላፌ ኢሲኖ፥ ዛይቲይ ዋላኬቶንታ ኡኬላፌ ኢሲኖ፥ ዛይቲራ ኡኪዳ ኢሲ ኮሞፖኔ ኢሲ ቄሪ ኮሞፓ ኤካ።

24 ኔኒ ሃ ካላ ኡባ ኣሮኔ ኩሼኒኔ ኢዛ ናይታ ኩሼን ዋሊኮ ኢሰቲ ያኔ ሃ ቃሴዲ ያርሾ ሂሰቲዲ ጎዳ ሲንላን ሺሼቶ።

25 ሄሳፌ ጉዬ ኔኒ ኢስታ ኩሼፔ ሄይታ ኤካዳ፣ ያርሺዛሶዛ ቦላ ዋላዳ፣ ጸጌቲዛ ያርሾራ ኢሲፌ ጋላዳ፣ ጎዳሰ ሳዎ ቱኑ ጋና ማላ፣ ያርሺዛሶዛ ቦላ ታማን ጸጋ።

26 አሮኔይ ቄሴ ጊዲዲ ሱሚዛ ዋዴ ሹኪዳ ቆርሾዛ አንጋሶ ኤካዳ ጎዳ ሲጎላን ያኔ ሃ ቃሴሊዛ ያርሾ ሂስታ ቃሴላ፤ ሃይሲ ኢንቲና ጋኪዛ ገሻ ጊዳና።

27 «ሄ ሹኪቲዳ ቆርሾዛ አሾፔ ያርሾ ኦሊዲ ያኔ ሃ ቃሴሊዳ አንጋሶዛኔ ጎዳ ሲጎላ ሽቂዳ ጌዳ ዲማሳ። ሄሲካ አሮኔ ገሻኔ ኢዛ ናይታ ገሻ ጊዳና።

28 ኢሰራኤሌ አሳይ ጎዳሰ ሺሺዛ ኢሲፌቲላ ያርሾዛፔ አንጋሶዛኔ ጌዳዛ ኡባ ዋዴካ አሮኔሲኔ ኢዛ አቱማ ናይታ ጋኪዛ ገሻ ጊዳ። አይሰ ጊኮ ሃይሲ ኢሰራኤሌ አሳይ ጎዳሰ ሺሺዛ ኢሞታ።

29 «አሮኔ ቄሴቲላ ዲማ ማይኦይ ኢዛፔ ጉዬ ኢዛ ዜሬላሰ ጊዳ፤ ኢስቲ ቲዬቲዲ ቄሴ ጊዲዛ ዋዴ ሄ ማይኦዛ ማይኦቶ።

30 ኢዛ ናይታፔ ኢዛሶሆን ቄሴ ጊዲዲ ዲማቲዳ ሶሆዛን ኦላናሰ ጸሳ ዲንካኔ ዪዳ አቱማ ናይ ሄ ማይኦዛ ላፑን ጋላሰ ጋካናሰ ማይኦ።

31 «አሮኔይኔ ኢዛ ናይቲ ቄሴቲላን ሱንላናሰ ሹኪቲዳ ቆርሻ አሾ ኤካዳ ዲማ ሶሆዛን ደይሳ።

32 አሮኔይኔ ኢዛ ናይቲ ቆርሾዛ አሻ ለማቴን ዲዛ ኡኬላራ ጸሳ ዲንካኔ ፔንጌን ሜቶ።

33 ኢስቲ ቄሴ ጊዲዲ ሱሚዛ ዋዴኔ ዲማቲዛ ዋዴ ኢስታ ናጋራይ አቶ ጌቲታና ማላ ያርሼቲዳ ሄ ያርሾታ ሜቶ። ጊዳ አቲን ሄ ያርሾቲ ጌሽ ጊዲዳ ገሻሰ ሃራ አሲ ኦኒካ ሞፖ።

34 ቄሴቲላን ሱንላናሰ ሹኪዳ ቆርሾዛ አሾፔ ዋይኮ ኡኬላፌ ማላዶ ጋካናሰ ፓላሂዲ አቂኮ ዲማ ጊዲዳ ገሻሰ ታማን ጸጌቶ አቲን ሜቲቶፎ።

35 «ሄሳላ ሂስታዳ ላፑን ጋላሰ ጋካናሰ ታኒ ኔና አዛዚዳ ማላ አሮኔኔ ኢዛ ናይታ ቄሴ ሂስታዳ ሱንላ።

36 «ናጋራይ አቶ ጌቲታና ማላ ሃቶ ሃቶ ናጋራ ገሻሰ ኢሲ ሚርጎ ያርሻ። ሄሳንካ ያርሺዛሶዛ ጌሻ፤ ሂስታዳ ያርሺዛሶዛ ዲማላናሰ ዛይቲ ቲያ።

37 ያርሺዛሶዛ ናጋራ ጌሾ ዋጋ ላፑን ጋላሰ ጋካናሰ ወርሳዳ ኢዛ ዲማላ። ሂስቲኮ ያርሺዛሶዚ ዲማ ጌሻሶሆ ጊዳና። ኢዛ ቦቺዛዴይ ኡባይ ጌሽ ጊዳና ቤሴሰ።

38 «ያርሺዛሶን ኔኒ ሃች ሃች ሺሻና ያርሾይ ሃይሳ፤ ዬሌቲን ኢሲ ላይላ ኩሞንታ ናሞኡ ኣዳ ላቃ ያርሻ።

39 ኣዳ ላቃታፔ ኢሳ ማላዶ፤ ቃሴ ናሞኣንሶዛ ኦማርሳ ዋዴ ያርሻ።

40 ኮይሮ ጳርሾ ላቃ ኢሲ ኪሎኔ ባጋ ሎኦ ጊሰቱ ጳሌ ኢሲ ሊቲሮ ጉሞኤቲዳ ዛይቱን ሙኑቃዳ ያርሻ፤ ኢሲ ሊቲሮ ዋይኔ ኡሹ ኡሻ ያርሾ ሂሰታዳ ያርሻ።

41 ናሞኣንሶ ጳርሾ ላቃዛ ኦማርሳ ዋዴ ያርሻ። ማላዶይሳ ጊና ጳሌ፤ ዛይቱኔ ዋይኔ ኡሹ ሺሻ። ሄሲካ ጎዳሰ ታማን ጸጌቲዲ ሳዋ ቱኑ ጊዛ ያርሾ ጊዳና።

42 «ሃ ጸጌቲዛ ያርሾይ ዪዛ ዬሌታ ኡባን ጸሳ ዱንካኔዛ ፔንጌን ጎዳ ሲንላን ፓጩይ ባይንዳ ያርሼታናሰ ኮሼሰ። ታኒ ኢንቴናራ ጋጋናይኔ ኔሰ ሃሳያናይ ሄንኮ።

43 ቃሴ ሄን ታኒ ኢሰራኤሌ ናይታራ ጋጋናኔ ታ ቦንሻይካ ሄ ሶሆዛ ዱማ ሶሆ ሂሰታና።

44 «ሄሳ ጊሻሰ ታኒ ጸሳ ዱንካኔዛኔ ያርሺዛሶዛ ዱማሳና፤ ኣሮኔይኔ ኢዛ ናይቲ ታሰ ቄሴ ጊዲዲ ኦላና ማላ ታኒ ኢሰታ ዱማሳና።

45 ሂሰታዳ ታኒ ኢሰራኤሌ ናይታ ጊዶን ዴኣና፤ ቃሴ ታኒ ኢሰታ ጸሳ ጊዳና።

46 ታኒ ኢሰታ ጊዶን ዴኣና ማላ ጊብጾፔ ኢሰታ ኬሲዳ ጎዳ ኢሰታ ጸሳ ጊዲዲይሳ ኢሰቲ ኤራና። ኤ፤ ታኒ ጎዳ ኢሰታ ጸሳ።

## 30

ኤጳኔ ጨዋሲ ያርሺዛሶ

(ኬሳ 37:25-28)

1 «ኤጳኔ ጨዋሲ ያርሺዛሶ ኦዶሮ ሚላፌ ጊጊሳ፤

2 ኢዛሰ ኦይዱ ዘዜይ ዴዮ፤ ኣዲሳቲላይ ኢሲ ዋጳ፤ ኣሆቴላይ ኢሲ ዋጳ፤ ጽቃቴላይ ቃሴ ናሞኡ ዋጳ ጊዶ፤ ካጩቲካ ኢዛራ ኢሲ ቦላ ኦይኬቲ ኦሴቲቶ።

3 ኢዛሰ ቦላ ባጋ፤ ኦይዱ ሚሊታኔ ካጩታ ኡባ ዋላካይ ባይንዳ ዋርቃን ቲያ፤ ኢዛ ዩሾንካ ዋርቃ ባልጸንላ ዩሻ ኣላ።

4 ሄ ባልጸንላፌ ጋርሳራ ኤጳኔ ጨዋሲ ያርሺዛሶዛ ዋርቃፌ ናሞኡ ቃንጎታ ኦላዳ ሄ ባጋራኔ ሃ ባጋራ ኦይሴላ። ሄይቲ ቶኪዛ ዋዴ ቶሆ ሚላታ ጌልላናሳ።

5 ቶሆ ሚላታ ኦዶሮ ሚላፌ ኬሳዳ ዋርቃን ቲያ።

6 ሃ ያርቪዛሶዛ ጫቆ ቃላ ማርካይ ኢዛን ዲዛ ታቦታ ሲንፋን ካቂቲዳ ማጋላሻፔ ካሬ ባጋራ፥ ጫቆ ቃላ ማርካ ቦላን ዲዛ ኣቶ ጌቲቲዛ ሶሆዛ ካማ ገናራ ዋፋ። ሂሲካ ታኒ ኔናራ ጋጊዛሶ።

7 «ኣሮኔይ ማላዶ ማላዶ ጸምፔታ ገጊሳናስ ዪዛ ዋዴ ሳዊዛ ኤጳኔ ያርቪዛሶዛን ጨዋሶ።

8 ኣሮኔይ ኦማርሳ ዋዴ ጸምፔታ ፖኢሲዛ ዋዴ፥ ዛሬሊዲካ ኤጳኔ ጨዋሶ፤ ሂሰቲኮ ኤጳኔይ ጎዳ ሲንፋን ዪዛ ዬሌታሰ ኡባ ዋዴ ጨዋታና።

9 ሃ ያርቪዛሶዛን ሃራ ዲጌቲዳ ኤጳኔካ፥ ዋይኮ ጽጌቲዛ ያርቮ፥ ዋይኮ ካፋ ያርቮ ያርቮፋ፤ ኡሻ ያርቮካ ኢዛ ቦላ ቲጎፓ።

10 ኣሮኔይ ላይፋን ኢሲቶ ናጋራፔ ማሬታናስ ሹኪዛ ማሄ ሱል ኤኪዲ ሄ ያርቪዛሶዛ ቦላ ዲዛ ካጩታ ቦላ ቲዮ። ሂሰቲዲ ጌሾ ዋጋ ፖሎ። ሃ ዋጋይ ሲንፋራ ያና ዋዴታ ኡባን ላይፋን ላይፋን ኦፊቶ። ሃሳፉ ሃ ያርቪዛሶዚ ጎዳስ ዲማ ጌዪዳሶ ጊዶ» ጊዴሰ።

### ሼምፖ ኣሻናስ ቃንጺዛ ሚሼ

11 ሃሳፌ ጉዬ ጎዳይ ሙሴ ሂዝጊዴሰ፥

12 «ኔኒ ኢሰራኤሌ ኣቲማ ኣሳ ታይቢዛ ዋዴ፥ ኢሲ ኢሲ ኣሲ ታይቤቲዲ ባ ሼምፖ ኣሻናስ ጎዳስ ሚሼ ኢሞ፤ ሂሰቲኮ ኔኒ ኢሰታ ታይቤዛ ዋዴ ኣሳ ቦላ ቦሻይ ዬና።

13 ታይቤቲዳ ኣቲማ ኣሳይ ሁኤን ሁኤን ጸሳ ዱንካኔን ኤሬቲዳ ማካ ሚሻ ማላ ኮሺዛ ሚሽ ቃንጾ። ኢሲ ኢሲ ኣሲ ባስ ዲዛ ማላ ኢሞ።

14 ቆዳን ጌሊዛ ኣቲማ ኣሳ ላይፋይ ናሞኡ ታሙ ኩሚዳይኔ ሃሳፌ ቦላይ ወሪ ጎዳስ ኢሞታ ኤሆ።

15 ኢንቲ ኢንቲ ሼምፖ ኣሻናስ ጎዳስ ኢሞታ ኢሚሺን፥ ዱሬይካ ማንቆይካ ኢሲ ማላ ኢማናፔ ኣቲን፥ ዱሬይ ዳርሲዲ ዋይኮ ማንቆይ ጉሊዲ ኢሞፎ።

16 ባ ሼምፖ ኣሻናስ ኢሚዛ ሚሼ ኢሰራኤሌ ኣሳፔ ኤካዳ ጸሳ ዱንካኔዛ ኦሶስ ፔይሻ። ሃ ሚሻይ ኢንቲ ሼምፖ ዋዛናስ፥ ጎዳ ሲንፋን ኢሰራኤሌ ኣሳ ጊሻሰ ሃሳኢሲዛዝ ጊዳና» ጊዴሰ።

### ሚቻ ኬሬ

17 ሃሳፌ ጉዬ ጎዳይ ሙሴስ ሂዝጊዴሰ፥

18 «ሜቻ ኬሬዛኔ ኬሬዛ ኢዛ ቦላ ዋሊዛ ሚሽ ጸርቂማላፔ ሜቶ። ጸሳ ዱንካኔዛፔኔ ያርሺዛሶዛፔ ጊዶን ዋላዳ ኢዛን ሃላ ቲጋ።

19 ሄ ሃላን ኣሮኔይኔ ኢዛ ናይቲ ባ ኩሼኔ ባ ቶሆ ሜጩቴቶ።

20 ኢስቲ ሃይቆንታ ማላ ጸሳ ዱንካኔዛን ጌልሼ ኣይዳካ ሄ ሃላን ሜጩቴቶ። ቃሴ ጎዳሰ ታማን ያርሾ ያርሻናሰ ያርሺዛሶ ማታ ሸቂዛ ዋዴ።

21 ኢስቲ ሃይቆንታ ማላ ባ ኩሼኔ ባ ቶሆ ሜጩቴቶ። ሃይሲ ኣሮኔሲኔ ኢዛ ዜሬላታሰ፡ ዪዛ ዬሌታ ኡባሰ ሜርና ዋጋ ጊዶ» ጊዴሰ።

### ቲዬቲዛ ዛይቲ

22 ጎዳይ ሙሴ ሂዝጊዴሰ፡

23 «ሎኦ ቂማሜታ፡ ሄይቲካ ኡሱፑን ኪሎ ጎጊዛ ካርቤ፡ ሄቹ ኪሎ ሳዊዛ ቃራፋ፡ ሄቹ ኪሎ ሳዊዛ ጉጫቻ ማታኔ

24 ኡሱፑን ኪሎ ቡርጉዴ ኤካ። ሃይሲ ዉሪካ ጸሳ ዱንካኔን ኤሬቲዳ ሜዛኔን ሜዛኔቲዳ ጊዶ። ሄሳ ቦላካ ኦይዱ ሊቲሮ ዋጋራ ዛይቲ ጉጃ ኤካ።

25 ሄይታንታ ሸቶ ኦሊዛ ማላ ዋላካዳ ሳዊዛ ጌሻቴላሰ ቲዬቲዛ ዱማ ዛይቲ ጊሊሳ።

26 ሂሰታዳ ጸሳ ዱንካኔዛ፡ ጫቆ ቃላ ማርካይ ኢዛን ዲዛ ታቦታ።

27 ጸራጴዛኔ ኢዛን ጎኤቲዛ ሚሻታ ኡባ፡ ጸምፔ ዋሊዛ ባላኔ ኢዛ ሚሻታ፡ ኤጻኔ ጩዋሲ ያርሺዛሶዛ።

28 ጸጌቲዛ ያርሾ ያርሺዛሶዛኔ ኢዛን ጎኤቲዛ ሚሻታ ኡባ፡ ሜቻ ኬሬኔ ኢዛ ዋሊዛሶዛ ኡባ ቲያ።

29 ኢስቲ ኬሂ ጌሽ ጊዳና ማላ ኔኒ ኢሰታ ዱማሳ፤ ኢሰታ ቦቹዛይ ዉሪካ ጌሽ ጊዳናሰ ቤሴሰ።

30 «ቃሴካ ኣሮኔይኔ ኢዛ ናይቲ ቄሴ ጊዲዲ ታሰ ኦላና ማላ ኢሰታ ቲያዳ ዱማሳ፤

31 ኢሰራኤሌ ኣሳሰ፡ «ሃይሲ ቡሮ ያና ዬሌታሰካ ቲዬቲዛ ጌሻ ዛይቲ ጊዶ።

32 ሃ ዛይቲዛ ሃራ ኣሰ ቲዮፓ፤ ቃሴ ሃራ ዛይቲ ሃሳሶ ጊጊሶፋ። ኢዚ ዱማ ጊዲዲ ጊሻሰ ኢንቴካ ኢዛ ዱማቴላ ኤሪቴ።

33 ሃይሳ ማላ ሸቶ ጊግሲዛ ኣሲኔ ቲዬታናሰ ቤሶንታ ሃራ ኣሰ ቲዬዛ ኣሲ ኦኒካ ባ ኣሳ ጋርሳፌ ቶዮ» ጋ» ጊዴሰ።

ኤጳኔ

<sup>34</sup> ሃሳፌ ጉዬ ጎዳይ ሙሴስ፡ «ሳዊዛ ቂማማታ፡ ሚላ ኡዛስ፡ ሄሌሎን ዲዛ ሺቶ፡ ሳዊዛ ሺዳኔ ሃራራ ዋላኬቶንታ ኤጳኔ ኤካ፤ ኢስታ ኡባ ማዛኔይካ ኢሲ ገና ገደ።

<sup>35</sup> ሺቶ ማላ ዋላኬቲዳ ኤጳኔ ኦላዳ ኢስታን ጎኤታ፤ ዋላካይ ባይንዳ ጌሺኔ ዲማ ገዳና ማላ ኢዛን ማጺኔ ዬጋ።

<sup>36</sup> ኢዛፔ ኤካዳ ሊቂሳ ጫዳ፤ ሂስታዳ ታኒ ኔናራ ጋጊዛ ጸሳ ዲንካኔዛ ገደን ጫቆ ቃላ ማርካይ ኢዛን ዲዛ ታቦታ ሲንላን ኤጳኔ ጩዋሲ ያርሺዛሶዛ ቦላ ዋላ። ኢዚ ኔሰ ኡባፌ ኣጂዳ ጌሽ ገደና።

<sup>37</sup> ሃይሳ ገግሲዳይሳላ ሃራ ኤጳኔ ገጊሶፍቴ። ሄሲ ታስ ዲማ ጌሽ ገዲዳይሳ ኔ ኡራ።

<sup>38</sup> ሃሳ ሚሳቲዛዝ ገግሲዲ ኢዛ ሳዎ ሲንገዲ ኡፋዬታናስ ኮይዛ ኣሲ ዲኮ ኢዚ ባ ኣሳ ጋርሳፌ ጳዮ» ገደሰ።

## 31

ባስሊኤሌ ኤልያቤ

(ኬሳ 35:30—36:1)

<sup>1</sup> ቃሴካ ጎዳይ ሙሴስ ሂዝገደሰ፡

<sup>2</sup> «ቤያ፤ ታኒ ዩሁዳ ዜሬል ገዲዳ ሁሬስ ናዛ ና፡ ኡሬይ ና፡ ባስሊኤሌ ደራዲሰ።

<sup>3</sup> ኢዛ ታኒ ታ ኣያናን፤ ሂላቴላን፡ ኣኬካኒኔ ኦሶ ኡባ ኦሊዛ ኤራቴላን ኩንላዲሰ።

<sup>4</sup> ሄሲካ ኢዚ ቆፒ ቆፒዲ ሂላቴላን፡ ዋርቃፌ፡ ቢራፔኔ ጸርቂማላፔ ዲማ ዲማ ሚሽ ኦላናሳ።

<sup>5</sup> ሂሳሶካ ኣልኦ ሹቶ ማሲ ማሲዲ ገጊሳናስ፡ ሚል ማሳናሲኔ ሄይታንታ ኡባ ኦላናሳ።

<sup>6</sup> «ሄሳ ቦላካ ቃሴ ኢዛ ማዳና ማላ፡ ዳኔ ዜሬል ገዲዳ ኣሂሳማኬ ና ኤላቤ ደራዲሰ። ታኒ ኔና ኣዛዚዳይሳ ኡባ ኢስቲ ኦላና ማላ፡ ኩሼ ሂላቴል ኤሪዛይታ ኡባሰ ኤራቴል ኢማዲሰ።

<sup>7</sup> ኢስቲ ኦላናይሲ ጸሳ ዲንካኔ፡ ጫቆ ቃላይ ኢዛን ዲዛ ታቦታኔ ታቦታዛ ቦላ ዋሊዛ ኣቶቴላ ካማ፡ ጸሳ ዲንካኔዛ ኦላናስ ጎኤቲዛ ሚሻታ ኡባ።

<sup>8</sup> ጸራጳዛኔ ኢዛ ሚሻታ፡ ዋላካይ ባይንዳ ዋርቃፌ ኦሴቲዳ ጸዎፔ ኢዛ ቦላ ዋሊዛ ሚሽ ኡባራ፡ ኤጳኔ ጩዋሲ ያርሺዛሶዛ።

9 ጸጌቲዛ ያርሾ ያርሺዛሶዛኔ ኢዛ ሚሻታ ኡባራ፥ ሜጨቲዛ ኬሬኔ ኬራ ኢዛ ቦላ ዋሊዛ ሚሻራ፥

10 ዳዴቲ ኦሴቲዳ ጫርቃታ፥ ቄሴ ኣሮኔይ ማይኢዛ ዳማ ማይኦ፥ ኢዛ ኣቱማ ናይቲ ቄሴቲላ ኦሶ ኦሊሼ ማይኣና ማይኦ፥

11 ቃሴ ቲዬቲዛ ዛይቴኔ ጌሻ ሶዛሰ ሳዎ ቱኑ ጊዛ ኤጸኔ። ኢሰቲ ሃይሳ ኡባ ታኒ ኔና ኣዛዚዳ ማላ ኦላና» ጊዴሰ።

### ሳምባታ

12 ሄሳፌ ጉዬ ጎዳይ ሙሴ፥

13 «ኔኒ ኢሰራኤሌ ኣሳሰ፥ ታ ሳምባታ ሎኤሊ ናገቲ። ሄሲ ታኒ ጎዳይ ኢንቴና ታሰ ዳማ ሂሰታዳ ዶሪዳይሳ ቤሲዛዝ ጊዲዲ ያና ዬሌታ ኡባሰ ታፔኔ ኢንቴፌ ጊዶን ማላታ ጊዳና።

14 ኢንቴሰ ሄ ጋላሳይ ዳማ ጊዲዳ ጊሻሰ ሳምባታ ናገቲ። ኢዛ ቱኒሲዛ ኣሲ ሙሌ ሃይቃናሰ ቤሴሰ፤ ሄ ጋላሳን ኦሶ ኦሊዛይ ኦኒካ ባ ኣሳ ጋርሳፌ ጳዮ።

15 ኡሱፑን ጋላሳታን ኢንቴ ኦሶ ኦሊቴ፤ ጊዶ ኣቲን ላፑንላ ጋላሳይ ታሰ ጎዳሰ ዳማቲዳ ሼምፖ ሳምባታ፤ ሄ ጋላሳን ኦሊዛይ ኦኒካ ሙሌራ ሃይቃናሰ ቤሴሰ።

16 ኢሰራኤሌ ኣሳይ ሄ ሳምባታ ጋላሳ ና ናሰ ሜርናሰ ማላታ ሂሰቲዲ ናሳ።

17 ታኒ ኡሱፑን ጋላሳታን ሳሎኔ ሳኣ ሜዳዳ ላፑንላ ጋላሳን ኦሶ ኣጋዳ ሼምፒዳ ጊሻሰ፥ ታሲኔ ኢሰራኤሌ ናይታሰ ጊዶን ሃይሲ ሜርናሰ ጫቆ ጊዳና ጋ» ጊዴሰ።

18 ጎዳይ ሙሴራ ሲና ዙማ ቦላ ሃሳይዛይሳ ዉርሲዳ ማላ ኢዚ ባ ቢራጴን ጸፊዳ ታሙ ኣዛዘታ ኦይኪዳ ናምኡ ማሴቲዳ ሹቻታ ሙሴሰ ኢሚዴሰ።

## 32

ዎርቃፌ ኦሴቲዳ ማራ ሚሰሌ

(ዛሬ 9:6-29)

1 ሙሴይ ዙማፔ ዎጶንታ ኬሂ ጋምኢዳይሳ ቤኢዲ ኣሳይ ኣሮኔ ዩሾን ሺቂዲ፥ «ኣኔ ሃያ፤ ኔኒ ኦና ካሌሊዛ ኤቃ ጸሳታ ኦሰ ሜዳ። ጊብጼ ቢታፌ ኦና ኬሲዳ ሙሴይ ጊዲኮ ኢዚ ዋኒዳኮ ኦ ኤሮኮ!» ጊዳ።

31:15 ኬሳ 20:8-11፤ 23:12፤ 34:21፤ 35:2፤ ሉዌ 23:3፤ ዛሬ 5:12-14

31:17 ኬሳ 20:11 32:1 ሃዋ 7:40

2 ሂሳቱን አሮኔይ አሰታሰ። «አንቲ ማቼታ ሃይላን፣ አንቲ አቱማ ናይታ ሃይላን፤ ማጫ ናይታ ሃይላን ዲዛ ዋርቃ ኬሲዲ ታሰ ሃ ኤኪ ዪቲ» ገደሰ።

3 ሄሳፌ ጉዬ አሳይ ዉሪ ባ ሃይላ ዋርቃ ኬሲዲ አሮኔስ ኤሂደሰ።

4 አዚ ሄሳ አሰታ ኩሼፔ ኤኪዲ ታማን ሴሪሲዳፔ ጉዬ ቆጸዛ ሚሻን ቆጸዲ ማራ ሚሰሌ ሜዲደሰ።

ሄሳፌ ጉዬ አሳይካ፣ «ኢሰራኤል አሳዉ! ኑና ገብጾ ቢታፌ ኬሲዳ ኑ ጸሳቲ ሃይታንታ» ገደሰ

5 አሮኔይ ሄሳ ቤኢዲ ማራ ሚሰሌዛ ሲንላን ያርሺዛሶ ገገሲዲ፣ «ዋንቶ ጎዳሰ ባኣሌ ጋላሰ ገዳና» ገ አዋጁደሰ።

6 ሄሳ ገሻሰ ዋንቲላ ጋላሰ አሳይ ዋንታራ ዴንዲዲ ጸጌቲዛ ያርሾታኔ ኢሲፌቲላ ያርሾታ ያርሺደሰ። ሂሳቲዲ አሳይ ማናሲኔ ኡያናሰ ኡቲደሰ። ሚ ኡዬ ሲሚዲ ቃሴ ዲራናሲኔ ጉፓናሰ ዴንዲዲደሰ።

7 ሂሳቲን ጎዳይ ሙሴስ፣ «ኔ ገብጾፔ ኬሳ ኤሂዳ ኔ አሳይ ናጋራ ኦላዲ ባናቲላ ቲኒሲዳ ገሻሰ ኤሶን ዲጌ ዋዳ።

8 ታኒ አሰታ አዛዚዳ ኦጌፔ አሰቲ ኤሶን ሸርኢ ገቺዳ። ዋርቃ ሴሪሲዳይሳ ማራ ሚሳቲሲዲ፣ ባሰ ኤቃ ጸሳታ ሜዲዲ አዛሰ ጎይኒዳኔ ያርሺዳ። ቃሴካ፣ «ኢሰራኤል አሳዉ! ኑና ገብጾ ቢታፌ ኬሲዳ ኑ ጸሳቲ ሃይታንታ» ገደ።

9 «ታኒ ሃ አሳ ቤያዲሰ፤ አሰቲ ባንታ ዋዚና ሙሚዳ አሳ።

10 ሃኢ ታ ሃንቆይ አሰታ ቦላ ኤጺ ኬዚን ታኒ አሰታ ዳይሳናይሳ ኔኒ ታና ዲጎፋ። ሄሳፌ ቃሴ ታ ኑና ገታ ካዋቲላ ሂሰታና» ገደሰ።

11 ገደ አቲን ሙሴይ ጎዳ ባ ጸሳ፣ «አቤት ጎደ! ኔኒ ኔ ገታ ዋልቃኒኔ ኔ ሚኖ ቄሴን ገብጾፔ ኬሳዳ ኤሂዳ ኔ አሳ ቦላ ሄሳላ አዛሰ ሃንቁታይ?

12 ገብጾ አሳይ፣ «አዚ አሰታ ዙማታ ቦላን ዋዳናሲኔ ቢታፌ ፒቲ ዳይሳናሰ አታ ቆፋን ኬሲደሰ» አይሰ ጌቲታይ? ኔኒ ኔ ዋልቃማ ሃንቆፌ ሲማ፤ አሳ ዳይሳናሰ ቆፒዳይሳ አጋ።

13 ኔ አይሌታ አብራሃማ፣ ዪሳቃኔ ያቆቤ ቆፓ፤ ኔኒ አሰታሰ፣ «ታኒ አንቲ ዜሬላ ሳሎ ጸሊንቲ ማላ ዳርሳና፤ ታኒ አንቲሰ አማና ገደ ቢታ ኡባካ አንቲ ዜሬላታሰ አማና፤ አሰቲ ሄ ቢታ ሜርናሰ

ላታና፤ ጋዳ ኔኒ ኔ ሱንላን ጫቂዳ ቃላ ዩሻ ቆፓ» ጊዲ ጋናቲዳሰ።

14 ሄሳ ጊሻሰ ጎዳይ ባ አሳ ቦላ ኢታ ሚሽ ኤሃናሰ ቆፒዳይሳ አጊዳሰ።

15 ሄሳፌ ጉዬ ሙሴይ ዙማ ቦላፌ ዱጌ ዋጂሼ ታሙ አዛዙቲ ኢሰታ ቦላ ናምኡ ባጋራ ጸፊቲ ኡቲዳ ናምኡ ማሴላ ሹቻታ ባ ኩሼን ኦይኪ ኤኪ ዪዳሰ።

16 ሄ ማሴቲዳ ሹቻታ ጊግሲዳይ ጸሳ፤ ሹቻታ ቦላ ዋጪዲ ጸፊዳይካ ጸሳ።

17 ኢያሶይ አሳይ ዋጫሚዛይሳ ሲዪዲ ሙሴሰ፡ «አሳይ ዲዛሶን ኦላ ዋሶይ ሲዬቴሰ» ጊዳሰ።

18 ሙሴይካ ዛሪዲ፡ «ታኒ ሲዪዛይሲ ሃይሲ ዬላፌ አቲን፡ ኦላን ጸኒዳይታ ቃላ ዋይኮ ጸኔቲዳይታ ቃላ ዳና» ጊዳሰ።

19 ሙሴይ ዳሬዚ ዲዛሶ ማቲሼ ማራ ሚሰሌዛ ሲንላን አሳይ ዱሪሽኒኔ ፑፒሽን ቤኢዲ ኬሂ ሃንቄቲዲ ማሴቲዳ ሹቻታ ዙማ ጋርሳን ቦላፌ ዬጊዲ ሜንፔሬሊዳሰ።

20 አሳይ ሜጂዳ ማራካ ኤኪዲ ታማን ጸጊዳሰ፤ ሄሳፌ ጉዬ ሊቂሲ ጋጪ ሃላን ማጂዲ ኢሰራኤሌ አሳይ ኡያና ማላ ኦሊዳሰ።

21 ሄሳፌ ጉዬ፡ ሙሴይ አርኔ፡ «ሃ አሳይ ኔና ዋሰቲን ኔኒ ኢሰታ ሃይሳ ማላ ጊታ ናጋራ ኦላና ማላ ካሌላዲ?» ጊዳሰ።

22 አርኔይካ ዛሪዲ፡ «ታ ጎዶ፡ ሃንቄቶፋ! ሃይሲ አሳይ ኢታ ኦላናሰ አይ ማላ ኮይዛኮ ኔ ኤራሳ።

23 ኢሰቲ ታና፡ ሱና ካሌሊዛ ኤቃ ጸሳታ ኑሰ ሜጃ። አይሰ ጊኮ ኑና ጊብጻፔ ኬሲ ኤሂዳ ሙሴይ ኢዚ ዋኒዳኮ ኑ ኤርኮ!» ጊዳ።

24 ሂሰቲን ታኒ ኢሰታሰ፡ ሳኒቴ ቦላ ዲዛ ዋርቃ ኬሲዲ ሃሚቴ» ጋዲሰ፤ ሄሳፌ ጉዬ ኢሰቲ ታሰ ኢሚዳ ዋርቃ ታኒ ታማን ዬጊን ሃይሲ ማራይ ኬዚዳሰ» ጊዳሰ።

25 አርኔይ አሳ ላኦ ዬዲ አጊን አሳይ ባ ሞርኬታ ሲንላን ካወዱዲ ካጄታናይሳ ሙሴይ ቤኢዳሰ።

26 ሄሳ ጊሻሰ ሙሴይ አሳይ ዱንካኒዲ ዲዛሶ ጌሊዛ ፔንጌን ኤቂዲ፡ «ጎዳ ባጋ ጊዲዳ አሲ ኦኒካ ታኮ ሃ ዮ!» ጊን ሌዌ ቆሞቲ ወሪ ኢዛኮ ሸቂዳ።

27 ሄሳፌ ጉዬ ኢዚ ኢሰታሰ፡ «ጎዳ ኢሰራኤሌ ጸሳይ፡ ሳሳይ ወሪ ባ ጊላ ማሻ ባ ጸሳን ጸሳን ጊዲዲ አሳይ ዱንካኒዳሶን

ጋጸፔ ጋጸ ጋካናስ፥ አሳ ጊደን ያኔ ሃ ሲሜሬቲዲ ባ ኢሻ፥ ባ ላጌኔ ባ ሾሮ ዋጵ» » ጊደስ።

28 ሌዌ ቆሞቲ ሙሴይ አዛዚዳ ማላ ኦሴዳ፤ ሄ ጋላስ አሳፔ ሄሹ ሺ ጊዲዛ አሲ ሃይቂዳስ።

29 ሄሳፌ ጉዬ ሙሴይ ሌዌ ቆሞታ፥ «ሃች ኢንቴ ጎዳስ ዲማቲዳታ፤ አይስ ጊኮ ኢንቴ ኢንቴ ናይታኔ ኢንቴ ኢሻታ ዋጵናስ አዛዜቲዲ ዋጵዳታ፤ ሃች ጎዳይ ኢንቴና አንጂዲዳስ» ጊደስ።

**ኢስራኤል አሳ ጊሻስ ሙሴ ዋሳ**

30 ዋንቴላ ጋላስ ሙሴይ አሳ፥ «ኢንቴ ጊታ ናጋራ ኦሴዳታ ሺን ሃኢ ታኒ ጎዳኮ ፑዴ ዙማ ቦላ ኬዛና፤ ታ ኢንቴ ናጋራ አቶ ጊሳናኮ ኦኔ ኤሪዛይ» ጊደስ።

31 ሂስቲን ሙሴይ ጎዳኮ ሲሚ ቢዲ፥ «ሃይሲ አሳይ ጊታ ናጋራ ኦሴዳስ፤ ኢስቲ ባስ ዋርቃፌ ኤቃ ጸስ ሜጲዳ።

32 ጊደ ኣቲን አቤት ጎደ! ሃኢ ኢስታ ናጋራ አቶ ጋ፤ አካይ ጊኮ ኔኒ ጸፊዳ ማዝጋባፔ ታ ሱንላ ቁጫ ዲጋ» ጊደስ።

33 ሂስቲን ጎዳይ ዛሪዲ ሙሴስ፥ «ታኒ ታ ማዝጋባፔ ታ ቦላ ናጋራ ኦሴዳ አሳታ ሱንላ ቁጫና።

34 ሃኢ ባዳ ሃ አሳ ታኒ ኔስ ዮቲዳ ሶ ካሌላ፤ ታ ኪታንቻይካ ኔና ካሌላና፤ ጊደ ኣቲን ቃጸያና ዋዴይ ጋኪሺን ኢስታ ናጋራ ጊሻስ ታ ኢስታ ቃጸያና» ጊደስ።

35 አርኔይ ዋርቃፌ ማራ ሚስሌ ሜጵና ማላ አሳይ ኢዛ ዋዴሲዳ ጊሻሲኔ ኢዚ ሜጲዳ ጊሻስ ጎዳይ ኢስታ ቦላ ቦሻ ዬዲዳስ።

## 33

**ኢስራኤል አሳይ ሲና ዙማ ኣቻፌ ዴንዲ ባና ማላ ሙሴስ ጎዳ አዛዛ**

1 ሄሳፌ ጉዬ ጎዳይ ሙሴስ፥ «ኔኒኔ ኔ ጊብጼፔ ኬሲዳ አሳይ ሃይሳፌ ዴንዲዲ፥ ታኒ ኢንቴ ዜሬላታስ ኢማና፤ ጋ ዋሴዳ ቢታ ቢቴ። ሄ ቢታይ ታኒ ኣብራሃሜስ፥ ዬሳቃሲኔ ያቆቤስ ኢማና ጋዳ ካሴ ጫቃ ዋሴዳይሳ።

2 ታኒ ኢንቴፌ ሲንላራ ኪታንቻ ኪታዳ፥ ካናኔታ፥ ኣሞሬታ፥ ሂቴታ፥ ፓሪዜታ፥ ሂዌታኔ ያቡሴታ ጎዳና።

3 ማሊኔ ኤሲ ጎጊዛ ሄ ቢታ ቢቴ። ጊዶ ኣቲን ኢንቴ ዋዚና ሙሚ ኣስ ጊዱዳ ጊሻስ ታኒ ኢንቴና ኦጌን ዳይሶንታ ማላ ታ ኢንቴናራ ቢኬ» ጊዴስ።

4 ኣሳይ ሄሳ ኢታ ዮኦዛ ሲዱዲ ኬሂ ዩኪዴስ። ሄ ዋዴፔ ዶሚዲ ኣሳይ ወሪካ ኣሌቆስ ኣሊዛይሳ ኣጊዴስ።

5 ኃሶይካ ጎዳይ ሙሴስ፡ «ኢስራኤል ኣሳስ፡ ሓንቴ ዋዚና ሙሚዳ ኣሳ። ሃራይ ኣቶሺን ጉላ ዋዴ ታ ኢንቴናራ ኢሲፌ ቢዛኮ ታኒ ኢንቴና ዳይሳና። ሃኢ ኢንቴ ኣሌቆ ኬሲቺቴ፤ ሂስቲኮ ታኒ ኢንቴ ቦላ ኣይ ኦላናኮ ኢንቴ ቤያና፡ ጋ» ጊ ዮቲ ዋሊዴስ።

6 ኢስራኤል ኣሳይ ሲና ዙማፔ ዶሚዲ ባ ኣሌቆ ሚሻ ኬሲ ዋሊዴስ።

### ጋይቶቴላ ዱንካኔ

7 ሙሴይ ዱንካኔዛ ኤኪ ኤፊዲ ኣሳይ ዱንካኔዳሶፔ ሃሲ ቶሊዴስ። ዱንካኔዚ፡ «ጋይቶቴላ ዱንካኔ» ጌቴቲ ሱሚዴስ። ጎዳ ኦይቻናስ ኮይዛይ ወሪ ሄ ጋይቶላ ዱንካኔይ ዲዛሶ ቤስ።

8 ሙሴይ ሄ ዱንካኔዛኮ ቢዳ ዋዴ ኣይዴካ ኣሳይ ወሪ ባ ዱንካኔዛ ፔንጌን ፔንጌን ኤቂዲ ሙሴይ ዱንካኔዛን ጌላና ጋካናስ ኢዛ ጸሌስ።

9 ሙሴይ ጋይቶላ ዱንካኔዛ ጊዶ ጌሊዳ ዋዴ ቱሳ ማላ ሻራይ ዲጌ ዋዴን ጎዳይ ሙሴራ ሃሳይሼ ዱንካኔዛ ፔንጌን ጋምኤስ።

10 ቱሳ ማላ ሻራዛ ዱንካኔዛ ፔንጌን ቤኢዳ ኡባ ዋዴ፡ ኣሳይ ወሪ ባ ፔንጌን ፔንጌን ኤቂዲ ዲዛሶሆን ዲሼ ጎዳስ ጎይኔስ።

11 ኣሲ ባ ላጌራ ሃሳይዛ ማላ ጎዳይ ሙሴራ ሲንላን ኤቂዲ ሃሳዬስ። ሄሳፌ ጉዬ ሙሴይ ዱንካኔይ ዲዛሶ ጉዬ ሲሜስ ሺን ኢዛ ማዲዛ ናቴላ ና፡ ናዌ ና ኢያሶይ ጋይቶቴላ ዱንካኔዛፔ ሻኬቴና።

### ሙሴይ ጎዳራ ሃሳይዴስ

12 ሙሴይ ጎዳስ፡ «ኔኒ ታና፡ ሃይሳ ኣሳ ካሌላ» ጋዳሳሺን ታናራ ኔኒ ኦና ከቲዛኮ ታና ኤሪሳቤካ። ኔኒ፡ «ታኒ ኔና ኔ ሱንላን ኤራይስ፤ ኔኒ ታ ሲንላን ሳቤቲዳ ኣሳ» ጋዳሳ።

13 ኔ ሲንላን ታ ሳቤቲዳ ጊዲኮ ታኒ ኔና ኤራና ማላኔ ሲንላፊካ ኔ ሲንላን ሳቤታሼ ዳና ማላ፡ ኔ ኦጌ ታና ታማርሳ። ሃ ኣሳይ ኔ ኣሳ ጊዲዳይሳ ቆፓ» ጊዴስ።

14 ሂስቲን ጎዳይ ዛሪዲ፡ «ታኒ ኔናራ ባና፤ ታኒ ኔና ሸምፒሳና» ጊዴስ።

15 ሂሰቲን ሙሴይ ኢዛ፥ «ኔኒ ኑናራ ቦንታ ጊዲኮ ሃይሳፌ ኑና ኬሶፋ።»

16 ኔኒ ኑናራ ቦንታ ኢዲኮ ታናኒኔ ኔ ኣሳን ኔኒ ሳቤቲዳይሳ ኣሳይ ወሪ ዋሰቲ ኤራኔ? ቢታ ቦላ ዲዛ ሃራ ኣሳ ኡባፌ ታናኔ ኔ ኣሳ ዲማሲዛይ ሃራ ሚሺ ኣዜ?» ጊዴሰ።

17 ሂሰቲን ጎዳይ ሙሴ፥ «ታ ኔናን ሳቤቲዳ ጊሻሲኔ ኔና ኔ ሱንላን ኤሪዛ ጊሻሰ ኔኒ ታና ኦይቺዳይሳ ቃሴካ ታኒ ኦላና» ጊዴሰ።

18 ሂሰቲን ሙሴይ፥ «ሂሰቲኮ ኔ ጊታ ቦንቸዛ ታና ቤሳርኪ?» ጊዴሰ።

19 ጎዳይ፥ «ታኒ ታ ሎኤቴላ ኡባ ኔ ሲንላራ ኣላና፤ ታ ጊሻ ሱንላካ ኔ ኣቸን ኣዋጃና። ታኒ ጎዳ፤ ታኒ ማራናሰ ኮይዛይታ ማራና፤ ቃሴ ሚሺታናሰ ኮይዛይታሰካ ሚሺታና።»

20 ጊዶ ኣቲን ኔኒ ታ ኣይፌሶ ቤያካ፤ ኣይሰ ጊኮ ኦኒካ ታና ቤኢዲ ፓጳ ኣቴና» ጊዴሰ።

21 ሄሳፌ ጉዬ ጎዳይ፥ «ኔኒ ታ ኣቸን ኤቃናሰ ዛላ ቦላ ኤቃናሶይ ሃይሳን ዴሰ።»

22 ታ ቦንቸይ ኣፄ ቢዛ ዋዴ ታኒ ኔና ዛላ ዛኣ ጊዶን ዋላና። ኣፄና ጋካናሰ ታ ኩሼን ኔና ካማና።

23 ሄሳፌ ጉዬ ታኒ ታ ኩሼ ዲጊኮ ኔኒ ታ ዞኮ ቤያናሺን ታ ኣይፌሶይ ቤታናሰ ቤሴና» ጊዴሰ።

## 34

ናሞኣንሶ ማሴቲዳ ሹቻታ  
(ዛሬ 10:1-5)

1 ጎዳይ ሙሴሰ፥ «ኮይሮይታ ሚሳቲዛ ናሞኡ ሹቻታ ማሳ ጊጊሳ፤ ሂሰቲኮ ታኒ ሄ ማሴቲዳ ሹቻታ ቦላ ካሴ ኔኒ ሜንሊዳ ሹቻታ ቦላን ዲዛ ቃላታ ጸፋና።»

2 ዋንቶ ማላዶ ፑዴ ሲና ዙማ ቦላ ኬዛናሰ ጊጌታ፤ ሂሰታዳ ታናራ ሄን ዙማ ቦላን ጋጋ።

3 ኔናራ ኦኒካ ኬዘፖ፤ ዋይኮ ዙማ ቦላ ኣዋንካ ቤቶፎ፤ ሃራይ ኣቶሺን ዶርሲ ዋይኮ ሜሄ ወዴይካ ዙማ ሲንላን ሄሜቶፎ» ጊዴሰ።

4 ሄሳ ጊሻስ ሙሴይ ኮይሮ ሹቻታ ሚሳቲዛ ናሞኡ ሹቻታ ማሲዲ ጎዳይ አዛዚዳ ማላ፡ ሹቻታ ባ ኩሼን ኦይኪ ኤኪዲ፡ ማላዶ ዋንታራ ፑዴ ሲና ዙማ ቦላ ኬዚዳስ።

5 ኬዚን ጎዳይ ሻራራ ዱጌ ዋጂ ኢዛራ ሄን ኤቂዲ ባ ሱንላ፡ «ጎዳ» ጊ ኤሪሲዳስ።

6 ጎዳይ ሙሴ ሲንላራ፡ «ታኒ ጎዳይ ቃጴታይን ማርታይ ኩሚዳ ጸሳ፡ ሃንቄታናስ ጋሞኢዛ፡ ሜርናስ ሲቂዛኔ አማኔቴላይ ዳሪዳ ጸሳ።

7 ታኒ ታ ሜርና ሲቆዛ ሺ ዬሌታ ጋካናስ ናጋይስ፤ ኢታቴላ፡ ማካላኔ ናጋራ አቶ ጋይስ። ጊዲኮካ ሞሪዛዴ ቃጸዮንታ ኣጊኬ፤ አዋታ ናጋራ ጊሻስ ናይታኔ ናይታ ናይታ፡ ሄዳንላ ዬሌታኔ ኦይዳንላ ዬሌታ ጋካናስ ቃጸያይስ» ጊ አዋጂሺ አጂዳስ።

8 ሂሰቲን ሙሴይ ሄራካ ቢታ ቦላ ጉፋኒ ጎይኒዲ፡

9 «አቤት ጎዶ! ኔኒ ታናን ኡፋዬቲዳ ጊዲኮ ኔ ኦናራ ኢሲፌ ባና ማላ ታ ኔና ዋሳይስ። ሃይሲ አሳይ ዋዚና ሙሜ ጊዲኮካ ኑ ኢታቴላኔ ኑ ናጋራ አቶ ጋዳ ኦና ኔ አስ ሂሰታ» ጊዳስ።

#### ጨቆ ቃላ ኦራላቴላ

(ኬሳ 23:14-19፤ ዛሬ 7:1-5፤ 16:1-17)

10 ሂሰቲን ጎዳይ፡ «ታኒ ኢንቴናራ ጨቆ ጌላዲስ፤ ሃይሳፌ ካሴ ቢታ ቦላ ዲዛ ካዋቴላ ኡባን ሃኒ ኤርንታ ማላሊሲዛ ሚሻ ኔ አሳ ኡባ ሲንላን ኦላና፤ ታኒ ጎዳይ ኢንቴስ ኦሊዛ ኦሶይ አይ ማላ ማላሊሲዛዛኮ ኔኒ ኢሰታ ጊዶን ዲዛ አሳይ ቤያና።

11 ሃቕ ታኒ ኢንቴና አዛዚዛ አዛዞ ናጊቴ፤ ኢንቴ ሲንላፌ አሞሬታ፡ ካናኔታ፡ ሂቴታ፡ ፓሪዜታ፡ ሂዌታኔ ያቡሴታ ታኒ ጎዳና።

12 ኢሰቲ ኢንቴስ ናርጸ ጊዶንታ ማላ ኢንቴ ቢዛ ቢታን ዲዛ አሳራ ጨቆ ጨቁቶፍቴ።

13 ኢሰቲ ያርሺዛሶሆታ ላሊቴ፤ ኢሰቲ ጎይኒዛ ሹቻታካ ሜንፎሬሊቴ፤ ቃሴ አሺሮ ጌቴቲዛ ኢሰታ ማጫ ኤቃ ጸሳይ ሚስሌታካ ሜንፎሬሊ ዬጌቴ።

14 ታኒ ጎዳይ ቃናቲዛ ጸሳ ጊዲዛ ጊሻስ ታፔ ኣቲን ሃራ ኤቃ ጸሳታስ ጎይኖፍቴ።

15 «ሂ ቢታን ዲዛ አሳታራ አይ ጨቆካ ጨቁቶፍቴ፤ አይስ ጊኮ ኢሰቲ ታናን አማኔቶንታ ኢጲዲ ባ ኤቃታ ካሊዛ ዋዴኔ ኢሰታስ ያርሺዛ ዋዴ ኢሰቲ ኢንቴና ጸይጊኮ ኢንቴ ኢሰታ ያርሾ ማና።

16 ቃሴ ኢንቴ ኢስታ ማጫ ናይታፔ ዶሪዲ ኢንቴ ኣቱማ ናይታሰ ኤካና፤ ሄ ዎዴ ሄ ማጫ ናይቲ ታናን ኣማኔቶንታ ኢጲዲ ባ ኤቃ ጸሳ ካሊዲ ኢንቴ ኣቱማ ናይቲ ኢስታ ካላና ማላ ኦላና።

17 «ኢንቴስ ጎይናና ኤቃ ጸሳታ ኣዛፔካ ሴሪሲዲ ሜጶፍቴ።

18 «ኡኬላ ባኣሌ ቦንቺቴ፤ ታኒ ኢንቴና ኣዛዚዳ ማላ ላፑን ጋላሳስ ኢርሾይ ጌሎንታ ኡኬቲዳ ኡኬላ ሚቴ፤ ሄሳካ ኢንቴ ጊብጾፔ ኬዚዳ ኣቢቤ ኣገናን ኦሊቴ።

19 «ኡሎፔ ባይራ ዩሌቲዛ ኣቱማ ናይ ወሪ ታሳ፤ ኢንቴ ሜሄ ኡባፌካ ቦራ ጊዲን፣ ዎይኮ ዶርሳ ጊዲን ባይራይ ታሳ፤

20 ኮይሮ ዩሌቲዳ ሃሪ ማር፣ ዶርሳ ላቃራ ላማዳ ዎዛ፤ ዎዛንታ ኢጲኮ ኢዛ ቆጼ ሚርቃ ዎጵ። ኔ ናይታፔ ባይራ ዩሌቲዳ ኣቱማ ና ኡባ ዎዛ።

«ኦኒካ ኢሚዛ ሚሽ ኦይኮንታ ሜላ ኩሼ ታ ሲንላን ቤቶፎ።

21 «ኡሉፑን ጋላስ ኦሊቴ ሺን ላፑንላ ጋላስ ሸምፒቴ፤ ጎሻ ዎዴ ጊዲን ዎይኮ ማጸ ዎዴንካ ላፑንላ ጋላሳን ሸምፒቴ።

22 «ጊስቴ ጶራ ኢንቴ ማጺዛ ዎዴ ካላ ሺሾ ባኣሌ ቦንቺቴ፤ ሄ ላይላ ወርሴላ ካላ ሺሺዛ ዎዴካ ዳሴ ባኣሌ ቦንቺቴ።

23 ኢሰራኤሌ ኣቱማ ኣሳይ ወሪ ጎዳ ኡባ ሃሪዛ ኢሰራኤሌ ጸሳ ሲንላን ላይላን ሄዡቶ ቤቴቶ።

24 ዱማ ዱማ ዴሪታ ታኒ ኢንቴ ሲንላፌ ዩዳላ ኬሳና፤ ሂስታዳ ኢንቴ ዛዋ ታኒ ኣሳና። ጎዳ ኢንቴ ጸሳ ሲንላን ኢንቴ ላይላን ሄዡ ቤታናስ ፑዴ ኬዚዛ ዎዴ ኦኒካ ኢንቴ ቢታ ኣሞቴና።

25 «ኢንቴ ታስ ሱላ ያርሾ ያርሺዛ ዎዴ ኢርሾ ዩጊዲ ኡኪዳ ኡኬላራ ያርሾፍቴ። ፓዚጋ ቦንቺዛ ጋላሳስ ያርሺዳ ያርሾፌ ማላዶስ ኣይኮይካ ኣቶፎ።

26 «ኢንቴ ጋዴን ባይራ ካጲዳ ካላፌ ኮይሮ ጶራ ጎዳ ኢንቴ ጸሳ ኬላ ኤሂቴ።

«ዴይሻ ላቃ ኢዛ ኣዩይ ማላን ዶይሶፍቴ» ጊዴስ።

27 ጎዳይ ሙሴስ፣ «ታኒ ኔናራኔ ኢሰራኤሌ ኣሳራ ጫቆ ጫቂቲዛይ ሃ ቃላቲ ጊዛ ማላ ጊዲዳ ጊሻስ ሃ ቃላታ ጸፋ» ጊዴስ።

34:17 ኬሳ 20:4፤ ሉዊ 19:4፤ ዛሬ 5:8፤ 27:15    34:18 ኬሳ 12:14-20፤ ሉዊ 23:6-8፤ ታይ 28:16-25    34:19 ኬሳ 13:2    34:20 ኬሳ 13:13    34:21 ኬሳ 20:9-10፤ 23:12፤ 31:15፤ 35:2፤ ሉዊ 23:3፤ ዛሬ 5:13-14    34:22 ሉዊ 23:15-21፤ ታይ 28:26-31    34:25 ኬሳ 12:10    34:26 ዛሬ 24:21፤ 26:2

28 ሙሴይ ካል ሞንታኔ ሃሉ ኡዮንታ ኦይዱ ታሙ ጋላሲኔ ኦይዱ ታሙ ቃማ ጎዳራ ሄን ጋሞኢዱ ጫቆ ቃላ ጊዱዳ ታሙ ኣዛዞታ ማሴቲዳ ሹቻ ቦላ ጸፊዴስ።

#### ሙሴ ኣይፌሶ ጸልቂቲል

29 ሙሴይ ናምኡ ማሴቲዳ ሹቻታ ባ ኩሼን ኦይኪዱ ሲና ዙማፔ ዱጌ ዋጲዳ ዋዴ፥ ኢዚ ጎዳራ ሃሳይሼ ጋሞኢዳ ጊሻሰ ኢዛ ኣይፌሶይ ጸልቂዴስ፤ ጊዶ ኣቲን ኢዚ ሄሳ ኤሪቤና።

30 ኣሮኔይኔ ኢስራኤሌ ኣሳይ ወሪ ሙሴ ጼሊዱ ኢዛ ኣይፌሶይ ጸልቂዛይሳ ቤኢዱ ኢዛኮ ሽቃናሰ ባቢዳ።

31 ጊዶ ኣቲን ሙሴይ ኢስታ ጼይጊን ኣሮኔይኔ ዴሬዛ ካሌሊዛ ሃላቃቲ ወሪ ኢዛኮ ዪን ኢዚ ኢስታ ሃሳይሲዴስ።

32 ሄሳፌ ጉዬ ኢስራኤሌ ኣሳይ ወሪ ኢዛኮ ሽቂን ጎዳይ ኢዛሰ ሲና ዙማ ቦላ ኢሚዳ ኣዛዞታ ኡባ ኢዚ ኢስታሰ ኢሚዴስ።

33 ሙሴይ ኢስታሰ ዮቲ ወርሲዱ ባ ኣይፌሶ ናጸላን ካሚዴስ።

34 ጊዶ ኣቲን ሙሴይ ጎዳ ሲንል ኢዛራ ሃሳያናሰ ጋይቶቲል ዱንካኔ ጊዶ ጌሊዛ ዋዴ ናጸላ ባ ኣይፌሶፔ ቃሬስ። ሄፔ ኬዚዱ ጎዳይ ኣዛዚዳይሳ ኢስራኤሌ ኣሳሰ ዮቲስ።

35 ሙሴይ ዮቲዛ ዋዴ ኢስራኤሌ ኣሳይ ኢዛ ኣይፌሶይ ጸልቂዛይሳ ቤኢዴስ። ሄሳ ጊሻሰ ሙሴይ ጎዳራ ሃሳያና ባና ጋካናሰ ባ ኣይፌሶ ዛሬሊዱ ናጸላን ካሚስ።

## 35

#### ሳምባታ ቦንቺዛ ዋጋ

1 ሙሴይ ኢስራኤሌ ኣሳ ኡባ ሺሺዱ፥ «ኢንቲ ኦፋና ማላ ጎዳይ ኣዛዚዳይሲ ሃይሳፌ ካሊ ዱዛይሳ።

2 ሳሚንታ ጊዶን ኡሱፑን ጋላሰ ጸላላ ኦሶ ኦሊቲ፤ ጊዶ ኣቲን ላፑንላ ጋላሳይ ኢንቲስ ዱማ ጋላሳ፤ ጎዳሰካ ሸምፖ ሳምባታ። ሄ ጋላሰ ኣይ ኦሶካ ኦሊዛ ኣሲ ኦኒካ ሃይቃናሰ ቤሴስ።

3 ሳምባታ ጋላሳን ኢንቲ ሶን ሶን ታማ ኤሶፍቲ» ጊዴስ።

#### ጸላ ዱንካኔ ኦሶስ ኮሺዛ ሚሻታ

(ኬሳ 25:1-9)

4 ሙሴይ ኢስራኤሌ ማባራሰ ኩሜላስ፥ «ጎዳይ ኢንቲና ሂዝጊ ኣዛዚዴስ።

5 እንጅስ ዲዛይሳፌ ጎዳስ አሞታ ኤሂቴ፤ ጎዳስ አሞታ ኤሃናስ ኮይዛይ ኦኒካ ዋርቃ፥ ቢራ፥ ጸርቂማላ፥

6 ሳሎ ሚሳቲዛ ቃጪና፥ ኦቻ ቲራ ሚሳቲዛ ቃጪና፥ ጾቃ ዞኦ ቃጪናኔ ሊቆ ላይና፥ ዳይሻ አንታሻ፥

7 ዞኦ ቃላሜን ጌሊ ኬዚዳ ጳርሾ አቴ፥ ቃጪቴዳ ጋልባ፥ ኦዶሮ ሚሳ፥

8 ጸምፔስ ዋጋራ ዛይቴ፥ ቲዬቲዛ ዛይቴኔ ኤጸኔ ሳዊዛ ቂማሜ፥

9 ኤፋዴኔ ቲራ ኪሴን ዋሊዛ ማርጊዳ ጌቴቲዛ ሹቻታኔ ሃራ ጸልቂዛ አልኦ ሹቻታ ኤሆ።

10 «እንጅ ጊዶን ዲዛ ኩሼ ሂላንቻይ ኡባይ ዪዲ ጎዳይ አዛዚዳይሳ ኡባ ኦሉ።

11 ጸሳ ዱንካኔዛ፥ ዱንካኔዛስ ሶ ባጋራኔ ካሬ ባጋራ ካሚዛ ዱንካኔ፥ ቃጾታ፥ ቶሌ ሚሳታ፥ ጎርዴ ሚሳታ፥ ቱሳታኔ ኢስቲ ኢስታን ኤቂዛ ቶሆታ፥

12 ታቦታኔ ኢዛ ቶኪዛ ቶሆ ሚሳታ፥ አቶ ጌቴቲዛ ካማኔ ታቦታ ካሚዛ ማጋላሻ፥

13 ጸራጴዛዛ፥ ኢዛ ቶኪዛ ቶሆ ሚሳታራኔ ኢዛስ ኮሺዛ ሚሻታ ኡባ፥ ጎዳ ሲንላን ዋሊዛ ዱማ ኡኬላ፤

14 ጸምፔ ኢዛ ቦላ ዋሊዛ ሚሻ ኢዛስ ኮሺዛ ሚሻታራ፥ ጸምፔታ፥ ጸምፔ ዛይቴ፥

15 ኤጸኔ ጩዋሲዛሶዛኔ ኢዛ ቶኪዛ ቶሆ ሚሳታ፥ ቲዬቲዛ ዛይቴኔ ሳዊዛ ኤጸኔ፥ ጸሳ ዱንካኔዛ ፔንጌ ማጋላሻ፥

16 ጸጌቲዛ ያርሾ ያርሺዛሶኔ ጸርቂማላፔ ኦሴቲዳ ዛይዛሬዛ፥ ኢዛ ቶኪዛ ቶሆ ሚሳታኔ ኢዛስ ኮሺዛ ሚሻታ ኡባ፥ ጸርቂማላፔ ኦሴቲዳ ሜቻ ኬሬኔ ኢዛ ዋሊዛሶ፥

17 ዱንካናስ ካሬ ባጋ ወይጌ ማጋላሻታ፥ ቱሳታኔ ኢስታ ቶሆታ፥ ዱንካናስ ካሬ ባጋ ወይጌ ጌሊዛ ፔንጌዛ ማጋላሻ፥

18 ጸሳ ዱንካኔዛ ቶሊዛ ጳሽኬታ፥ ዱንካናስ ካሬ ባጋ ወይጌ ጳሽኬታኔ ኢስታ ዋዶታ፥

19 ቂሴቲ ዱማሶዛን ኦሊሼ ማይኣናስ ዳዴቲዳ ማይኦታ፥ ቂሴ ኣርኔይኔ ኢዛ ናይቲ ቂሴቴላ ኦሶ ኦሊሼ ማይኢዛ ማይኦታ ኦላና» ጊዴሰ።

### ኣሳይ ኤሂዳ አሞታ

20 ሄሳፌ ጉዬ ኢሰራኤሌ ኣሳይ ወሪ ሙሴ ሲንላፌ ኬዚ ቢዴሰ።

21 ኢማናሰ ኮዪዳይቲኔ ኢሰታ ዋዚናይ ኢሰታ ኢማ ኢማ ጊዳይቲ ወሪ ዪዲ ጸሳ ዱንካኔዛስ፥ ኢዛ ጊዶን ኦሴቲዛ ኦሶሲኔ ጌሻ ማይኦ ኡባሰ ኮሺዛ ሚሽ ኡባ ኤሂዳ።

22 ኢማና ኮይዛ አቱማይኔ ማጫይ ወሪ ዪዲ ዋርቃፌ ኦሴቲዳ አሌቆታ፥ ሃይሳ ዋርቃ፥ ሳጋዮ፥ ቆጴን አሊዛ ጸንጋላታኔ ዋርቃ አሌቆታ ኤሂዲ ጎዳሰ ያኔ ሃ ቃሴሊዛ ያርሾ ሂሰቲ ሺሺዳ። \*

23 ሳሎ ሚሳቲዛ ቃጪናይ፥ ኦቻ ቴራ ሚሳቲዛ ቃጪናይ፥ ጾቃ ዞኦ ቃጪናይ፥ ዋይኮ ላይኖ ጌቴቲዛ ሊቆ ቃጪናይ፥ ዋይኮ ዳይሻ አንታሻያይ፥ ዞኦ ቃላሜን ጌሊ ኬዚዳ ቆርሾ ኢቴይ፥ ዋይኮ ቃጪቱዳ ጋልባይ ዲዛ አሲ ወሪ ኤሂዳሰ።

24 ቢራ ዋይኮ ጸርቂማላ ኢማናሰ ዳንዳይዛይ ወሪ ባ ኢሞታ ጎዳሰ ኢሚዳሰ፤ ቃሴ ኦዶሮ ሚሊ ዲዛ አሳይ ወሪ ዱማ ዱማ ኦሶስ ኦዶሮ ሚሊ ኤሂዳሰ።

25 ኩሼ ሂላ ኤሪዛ ማጫሳይ ወሪ ባ ኩሼን ሱቂዳ ሳሎ ሚሳቲዛ ቃጪና፥ ኦቻ ቴራ ሚሳቲዛ ቃጪና፥ ጾቃ ዞኦ ቃጪናኔ ሊቆ ላይኖ ኤሂዳሰ።

26 ቃሴካ ኢሞታ ኢማናሰ ኮዪዳ ማጫሳይ ወሪ ዳይሻ አንታሻ ዳዲ ኤሂዳ።

27 ሃላቃቲ ኤፋዴኔ ቲራ ኪሴን ዋሊዛ ማርጊዴኔ ሃራ ቦንቹቲዳ ሹቻታ ኤሂዳ።

28 ቃሴካ ጸሞፔስ፥ ሳዊዛ ኤጻኔሲኔ ቲዬታናሰ ዋጋራ ዛይቴኔ ቂማሜ ኤሂዳ።

29 ኢሰራኤሌ አሳይ ወሪ አቱማይኔ ማጫይ፥ ኢሰቲ ኦላና ማላ ጎዳይ ሙሴ ባጋራ አዛዚዳ ኦሶስ ጊዲዛ ኢሞታ ኡባ ባ ዶሳን ጎዳሰ ኤሂዳሰ።

### ጸሳ ዱንካኔ አሊዛ ኩሼ ሂላንቻታ (ኬሳ 31:1-11)

30 ሙሴይ ኢሰራኤሌ አሳሰ፥ «ቤኢቴ፤ ጎዳይ ዩሁዳ ቆሞፌ ሁሬስ ናዛ ና፥ ኡሬይ ና ባሰሊኤሌ ዶሪዳሰ።

31 ጎዳይ ኢዛ ጸሳ አያናን፥ አጼ ኤራን፥ አኬካኒኔ ኦሶ ኡባ አሊዛ ኤራቴላን ኩንሊዳሰ።

32 ሄሲካ ሂላን ኦሶ ቆፒ ኬሲዲ ዋርቃፌ፥ ቢራፔኔ ጸርቂማላፔ ዱማ ዱማ ሚሽ ኦላናሳ።

33 ሂሳሶካ አልኦ ሹቶ ማሲ ገጊሳናሳ፤ ቃሴካ ሚሊ ማሳናሲኔ ዱማ ዱማ ኦሶ ሂላን ኦላናሳ።

\* 35:22 ጸንጋላታ ገዛይሲ ማጫሳሰ ቆጴን አሊዛ ቢራፔ ኦሴቲዳ አሌቆ።

34 ሄሳ ቦላካ ቃሴ ኢዛሲኔ ዳኔ ቆሞፌ ኣሂሳሜኬ ና ኤላቤስ፡ ሃራ ኣስ ታማርሲዛ ኤራቴላ ኢሚዴስ።

35 ኢስቲ ኡባ ቆሞ ኦሶ ኦላና ማላ፡ ሂላን ኦሊዛይታ፡ ኦሶ ቆፋ ኬሲዛይታ፡ ሳሎ ሚሳቲዛ ቃጪናን፡ ኦቻ ቴራ ሚሳቲዛ ቃጪናን፡ ጴቃ ዘኦ ቃጪናኒኔ ላይኖ ቃጪናን ኣሌቂሲ ዳዲዛይታ ጊዳና ማላ፡ ጎዳይ ኢስታ ኤራቴላን ኩንሊዴስ። ኢስቲ ወሪካ ኡባ ቆሞ ኦሶ ኤሪዛ ኤራንቻ ጊዲዳ።

### 36

1 «ሄሳ ጊሻስ ባስሊኤሌይ፡ ኤላቤይኔ ጸሳ ዱንካኔ ኦላና ማላ ጎዳይ ኤራቴላ ኢሚዳ ኣሳይ ወሪ ጎዳይ ኣዛዚዳ ማላ ኢስቲ ኦላና» ጊዴስ።

#### ኣሳይ ዳር ኢሞታ ኢሚዴስ

2 ሄሳፌ ጉዬ ሙሴይ ባስሊኤሌ፡ ኤላቤኔ ጎዳይ ዳማ ኤራቴላ ኢሚዳይታ ኦሶ ኦላናስ ያና ኮይዛይታ ኡባ ጴይጊዲ ሺሺዴስ።

3 ሺቂዳይቲ ኢስራኤሌ ኣሳይ ጸሳ ዱንካኔ ኦላናስ ኤሂዳ ኢሞታ ኡባ ሙሴፔ ኤኪዳ። ቃሴ ኣሳይ ባ ዶሳን ጮ ኢሚዛ ኢሞታ ማላዶ ማላዶ ጉጂ ጉጂዲ ኤሆ ኣጊቤና።

4 ሂስቲን ጸሳ ዱንካኔዛ ኦሊዛ ኤራቴላ ኩሚዳ ኣሳይ ወሪ ባ ኦሊዛይሳ ኣጊ ሙሴኮ ቢዲ።

5 «ኣሳይ ጎዳይ ኣዛዚዳ ኦሶስ ኮሺዛይሳፌ ቦላራ ዳር ኤሆን ዴስ» ጊዳ።

6 ሂስቲን ሙሴይ ባ ዱንካኔን ዱንካኔን ዲዛ ኣሳስ፡ «ናሞኣንሶ ኦናካ ጊዲን ጸሳ ዱንካኔ ኦሶስ ኢሚዛ ኢሞታ ኤሆን» ጊ ዮቲን ኣሳይ ኤሂዛይሳ ኣጋጊዴስ።

7 ጋሶይካ ኢስቲ ኤሂዳ ኢሞታይ ኦሶ ኡባ ኦላናስ ጊዲ ፓላሃና።

#### ጸሳ ዱንካኔ ኦሶ

(ኬሳ 26:1-37)

8 ኦሶዛ ኦሊዛይታ ጊዶፌ ሂላ ዳርዛይቲ ወሪ ሊቆ ላይኖፔኔ ሳሎ ሚሳቲዛ፡ ኦቻ ቴራ ሚሳቲዛኔ ጴቃ ዘኦ ቃጪናፔ ዳዴቲዳ ታሙ ማጋላሻታፔ ጸሳ ዱንካኔዛ ጊግሲዳ። ሄ ማጋላሻታ ቦላ ቦላራ ኢሲ ሂላንቻይ ከሩቤታ ሚስሌ ሲኪዴስ።

9 ማጋላሻቲ ወሪ ኢሲ ገና ጊዲዲ ኣዱሳቴላይ ናሞኡ ታማኔ ኦስፑን ዋቋ፤ ኣሆቴላይ ኦይዲ ዋቋ።

10 ኢቻሹ ማጋላሻታ ኢሲፌ ጋሊ ሲኪዳ፤ ቃሴ ሃንኮ ኣቲዳ ኢቻሹ ማጋላሻታካ ኢዛሶካ ኦሊዳ።

11 ኢሲፌ ጋሊ ሲኪዳ ማጋላሻታቴ ኢሲ ማጋላሻሰ ወርሴላ ጋጸን ሳሎ ሚሳቲዛ ጫርቃፌ ሲጼ ሜዲዳ። ቃሴ ኢሲፌ ጋጌ ሲኬቲዳ ሃንኮ ማጋላሻታንካ ሄሳሶካ ኦሊዳ።

12 ኢሰቲ ኢሲፌ ጋጌዳ ኢሲ ማጋላሻ ሶላ ኢቻሹ ታሙ ሲጼታ፣ ቃሴ ኢሲፌ ጋጌዳ ሃንኮ ማጋላሻታ ሶላካ ኢቻሹ ታሙ ሲጼታ ሜዲዳ። ሄ ሲጼቲ ወሪካ ኢሶይ ኢሳራ ገናን ዴቲሰ።

13 ሄሳፌ ጉዬ ዋርቃፌ ኢቻሹ ታሙ ቃጴታ ሜዲዳ ዱንካኔዚ ኢሲኖ ገዳና ማላ፣ ሄ ማጋላሻታ ጋጸ ጋጸ ሄ ቃጴታን ጋሊ ኦይሴሊዳ።

14 ጸሳ ዱንካኔዚ ሶላራ ካሚዛ ዱንካኔዛሰ ታማኔ ኢሲ ማጋላሻታ ዴይሻ አንታሻፔ ዳዲዳ።

15 ታማኔ ኢሲ ማጋላሻቲካ ኢሲ ገና፤ ኢሲ ኢሲ ማጋላሻሰ አዱሳቴሊ ሄቩ ታሙ ዋዳ፣ አሆቴሊ ኦይዱ ዋዳ።

16 ኢቻሹ ማጋላሻታ ኢሲ ባጋራ፣ ኡሱፑን ማጋላሻታ ቃሴ ሃንኮ ባጋራ ጋሊዳ ሲኪዳ።

17 ሄሳፌ ጉዬ ጋሊ ሲኪዳ ማጋላሻታቴ ኢሲ ማጋላሻ ጋጸን ኢቻሹ ታሙ ሲጼታ ሜዲዳ። ቃሴካ ጋሊ ሲኪዳ ሃንኮ ማጋላሻታቴ ወርሴላ ማጋላሻዛ ጋጸን ኢቻሹ ታሙ ሲጼታ ሜዲዳ።

18 ናምኡ ባጋራ ዲዛ ማጋላሻታ ጋሊ ኢሲ ካማ ኦላናሰ ጸርቁማላፔ ኢቻሹ ታሙ ቃጴታ ሜዲዳ።

19 ሄሳፌ ጉዬ ዱንካኔዚ ካማናሰ ዞኦ ቃላሚን ዩጊ ኬሲዳ ዳርሾ ኢቲ ገግሲዳ፤ ቃሴ ኢዛ ሶላራ ካማናሰ ቃጩቲዳ ጋልባ ገግሲዳ።

20 ጸሳ ዱንካኔ ቶሌ ሚላታ ሉሌ ገዲዳ ኦዶሮ ሚላፌ ኬሲዳ።

21 ኢሲ ኢሲ ቶሌ ሚላሰ አዱሳቴላይ ታሙ ዋዳ፤ አሆቴላይ ኢሲ ዋዳኔ ባጋ።

22 ኢሲ ኢሲ ቶሌ ኢሳ ኢሳራ ጋሊ ኦይሴሊዛ ናምኡ ቶሌ ሜዲዳ። ጸሳ ዱንካኔዚ ቶሌ ሚላታ ወርሲካ ሄሳሶ ኦሊዳ።

23 ጸሳ ዱንካኔዛሰ ቶሆሶ ባጋራ ናምኡ ታሙ ቶሌ ሚላታ ሜዲዳ።

24 ኢሲ ኢሲ ቶሌ ሚላሰ ናምኡ ቶሆ፣ ሙሌራ ኦይዱ ታሙ ቶሆ ቢራፔ ገግሲዳ።

25 ጸሳ ዱንካኔዛሰ ሁኤሶ ባጋራ ናምኡ ታሙ ቶሌ ሚላታ ሜዲዳ።

26 ኢሲ ኢሲ ቶሌ ሚላሰ ናምኡ ቶሆ፣ ሙሌራ ኦይዱ ታሙ ቶሆ ቢራፔ ገግሲዳ።

27 ጸሳ ዱንካኔዛስ ጉዬ ጋጸን ዱጌ ባጋራ ኡሱፑን ቶሌ ሚላታ ሜዲዳ።

28 ጸሳ ዱንካኔዛ ጉዬ ጋጸን ዱዛ ዘዜታስ ናምኡ ቶሌ ሚላታ ገግሲዳ።

29 ሃ ናምኡ ዘዜታን ዱዛ ቶሌቲ ጸጸፔ ጸራ ጋካናሼ ናምኡ ጊዲ ቢዲ ጸራን ኢሲ ሳጋዮን ጌሊ ኦይኬቲዳ። ኢስቲ ናምኦይካ ሄሳሶ ኦሴቲዳ።

30 ሄሳ ገሻሰ ኢሲ ኢሲ ቶሌ ሚላስ ጋርሳራ ናምኡ ናምኡ ቶሆቲ ዴቲስ፤ ሙሌራ ኦስፑን ጸጋጋቲኔ ቢራፔ ኦሴቲዳ ታማኔ ኡሱፑን ቶሆቲ ዴቲስ።

31 ቃሴ ኢስቲ ኦዶሮ ሚላፌ ታማኔ ኢቻሹ ካሬ ጎርዲዛ ሚላ ኬሲዳ፤ ኢስታፌ ጸሳ ዱንካኔዛስ ኢሲ ባጋ ሚሊን ዱዛ ቶሌ ሚላታስ ኢቻሹ ጎርዲዛ ሚላታ።

32 ቃሴ ሃንኮ ባጋ ሚሊን ዱዛ ቶሌ ሚላታስ ኢቻሹ ጎርዲዛ ሚላታ ገግሲዳ። ሄሳሶካ ጸሳ ዱንካኔዛስ ጉዬ ባጋራ ኦርሼይ ወሊዛ ባጋራ ወርሴላ ጋጸን ዱዛ ቶሌ ሚላታስ ኢቻሹ ጎርዲዛ ሚላታ ሜዲዳ።

33 ጊዶራ ጎርዲዛ ሚላቲ ጸጋጋታስ ጊዶ ጊናራ፣ ሃ ጋጸፔ ሄ ጋጸ ጋካናስ ካንሴ ኬዛና ማላ ኦሴዳ።

34 ቶሌ ሚላ ዋርቃን ቲይዲ ጎርዲዛ ሚላቲ ኦዲዛ ሳጋዮታ ዋርቃፌ ሜዲዳ፤ ቃሴ ጎርዲዛ ሚላታ ዋርቃን ቲይዳ።

35 ሳሎ ሚሳቲዛ ቃጪናፔ፣ ኦቻ ቲራ ሚሳቲዛ ቃጪናፔ፣ ጸቃ ዘኦ ቃጪናፔኔ ሊቆ ላይኖፔ ኢሲ ማጋላሻ ኦሴዳ። ሄ ማጋላሻዛ ቦላ ኢሲ ሂላይ ኪሩቤታ ሚሰሌ ሲኪዴስ።

36 ማጋላሻስ ኦይዱ ቱሳታ ኦዶሮ ሚላፌ ገግሲዲ ዋርቃን ቲይዳ። ሂስቲዲ ዋርቃፌ ካቆታ ኢስታስ ገግሲዳ። ቃሴ ቱሳታ ኤሲዛ ኦይዱ ቶሆታ ቢራፔ ሜዲዳ።

37 ጸሳ ዱንካኔ ጌሊዛ ፔንጌዛስ ሳሎ ሚሳቲዛ፣ ኦቻ ቲራ ሚሳቲዛኔ ጸቃ ዘኦ ቃጪናፔኔ ሊቆ ላይኖፔ ዳዴቲዳ፣ ጸልፔን ኦሌቄቲዳ ማጋላሻ ገግሲዳ።

38 ቃሴ ኢስታስ ኢቻሹ ካቆታራ ዱዛ ኢቻሹ ቱሳታ ኦሴዳ። ቱሳታ ጸራኔ ጨር ቃቺዛይታ ዋርቃን ቲይዳ። ቃሴ ቱሳቲ ኤቃና ማላ ኢቻሹ ቶሆ ጸርቂማላፔ ሜዲዳ።

## 37

ታቦታ ኦሶ  
(ኬሳ 25:10-22)

1 ባስሊኤሌይ ኦዶሮ ሚላፌ ታቦታ ገግሲዴስ። ታቦታስ ኣዱሳቴላይ ናምኡ ዋዳኔ ባጋ፤ ኣሆቴላይ ኢሲ ዋዳኔ ባጋ፤ ዶቃቴላይ ኢሲ ዋዳኔ ባጋ።

2 ታቦታ ገግሲዱ ሶ ባጋኔ ካሬ ባጋ ዋላካይ ባይንዳ ዋርቃን ሜሺዴስ፤ ኢዛ ዩዩ ኣቓናስ ዳንጮ ዋርቃራ ዩሺ ኣሊዴስ።

3 ቃሴ ኦይዱ ዋርቃ ሳጋዮታ ሴሪሲዱ ታቦታስ ኦይዱ ቶሆታን፤ ኢሲ ባጋራ ናምኡ ሳጋዮታ፤ ቃሴ ሃንኮ ባጋራ ናምኡ ሳጋዮታ ኣሊዴስ።

4 ሂስቲዱ ኦዶሮ ሚላፌ ቶሆ ሚላታ ኬሲዱ ኢስታካ ዋርቃን ሜሺዴስ።

5 ታቦታ ቶካናስ ታቦታ ሚሌን ዲዛ ሳጋዮታን ቶሆ ሚላታ ኣሊዴስ።

6 ዋላካይ ባይንዳ ዋርቃፌ ናምኡ ዋዳኔ ባጋ ኣዱቂዛ፤ ኢሲ ዋዳኔ ባጋ ኣከዛ ኣቶ ጌቴቲዛ ሶሆዛ ካማ ሜዲዴስ።

7 ካማታስ ዉርሴላ ናምኡ ባጋ ጋጸን ናምኡ ኪሩቤታ ቆጾቲዳ ዋርቃፌ ሜዲዴስ።

8 ኢሲ ኪሩቤዛ ኢሲ ባጋ ጋጸን፤ ናምኣንሶ ኪሩቤዛ ሃንኮ ባጋ ጋጸን፤ ናምኣታካ ካማዛራ ጋሊ ኦይሴሊ ሜዲዴስ።

9 ኪሩቤቲ ባ ቄፌ ዴንሊዱ ኣቶ ጌቴቲዛ ሶሆዛ ካማዛ ካማ ባ ቄፌን ካማ ዋሊዳ፤ ቃሴ ኢሶይ ኢሳራ ጴሌታና ማላ ኣሊዴስ።

### ጸራጴዛ

(ከሳ 25:23-30)

10 ቃሴ ኣዱሳቴላይ ናምኡ ዋዳ፤ ኣሆቴላይ ኢሲ ዋዳ፤ ዶቃቴላይ ኢሲ ዋዳኔ ባጋ ጊዲዳ ጸራጴዛ ኦዶሮ ሚላፌ ሜዲዴ፤

11 ዋላካይ ባይንዳ ዋርቃን ሜሺዴስ። ኢዛ ዩዩ ኣቓናስ ዋርቃ ኪፋፌ ዩሺ ኣሊዴስ።

12 ሂሳታካ ኣሆቴላይ ታዳኮ ጊዲዛ ኪፋፌ ኢዛ ቦላ ዩሺ ኣሊዴስ። ሂስቲዱ ኢዛ ዩዩ ኣቓናስ ዋርቃ ዳንጮ ዩሺ ኣሊዴስ።

13 ሂስቲዱ ታቦታ ቶካናስ ገገዛ ኦይዱ ዋርቃ ሳጋዮታ ሜዲዱ ኦይዱ ቶሆቲ ቶኬቲዳ ኦይዱ ዘኬታራ ኦይሴሊዴስ።

14 ጸራጴዛዛ ቶካናስ ቶሆ ሚላታ ኢስታ ጊዶራ ኣሊዛ ሳጋዮቲ ጸራጴዛዛ ጸንጸ ቦላ ሜዴቲዳ።

15 ጸራጴዛዛ ቶኪዛ ቶሆ ሚላ ኦዶሮ ሚላፌ ኬሲዱ ዋርቃን ሜሺዴስ።

16 ሂሳታካ ጸራጴዛ ቦላ ዋሊዛ ዲማ ዲማ ሚሻታ ዋላካይ ባይንዳ ዋርቃፌ ሜዲዴስ፤ ሄይቲካ ሳኔታኔ ጨልፋታ፤ ቃሴ ኡሻ ያርሾ ኢስታን ሴሪሲዛ ኬሬታኔ ጸኣታ።

## ጾምፔ ዋሶሶ

(ኬሳ 25:31-40)

17 ሄሳፌ ጉዬ ባስሊኤሌይ ጾምፔ ዋሊዛሶዛ ቆጾቲዳ ዋላካይ ባይንዳ ዋርቃፌ ሜዲዴስ፤ ጾምፔዚ ኢዛን ኤቂዛ ቶሆ፥ ቃሴ ጊዶ ቶማካ ኡባ ቆጾቲዳ ዋርቃፌ ሜዲዴስ። ኢዛ ኩሬታ፥ ኢዛ ዴሞታኔ ኢዛ ጨሻታ ኡባ ኢዛራ ኢሲፌ ኦይሴሊ ሜዲዴስ።

18 ሚሌራ ኡሱፑን ባላታ ሜዲዴስ፤ ሄሹ ሃጋታ ኢሲ ባጋራ፥ ቃሴ ሄሹ ሃጋታ ሃንኮ ባጋራ ኬሲዴስ።

19 ኡሱፑን ሃጋታሰካ ሁኤን ሁኤን ኢሲ ኢሲ ዴሞቲኔ ጨሻቲ ዲዛ፥ ኦቾሎኔ ጨሽ ሚሳቲዛ ዋንጫ ሜዲዴስ፤

20 ጾምፔ ዋሊዛሶዛሰ ጊዶ ቶማይ፥ ዴሞቲኔ ጨሻቲ ዲዛ ኦቾሎኔ ጨሽ ሚሳቲዛ ኦይዱ ዋንጫን ኣሌቄቲ ኡቲዴስ።

21 ናምኣይ ናምኣይ ኢሲፌ ዋላን ዲዛ ሄሹ ባላታኔ ጋርሳራ ኢሲ ኢሲ ዴሞይ ዴስ።

22 ዴሞቲኔ ሃጋቲ ዉሪ ጾምፔ ዋሊዛሶዛራ ኢሲፌ ኦይኬቲ ኢሲኖ ጊዲዲ ዋላካይ ባይንዳ ዋርቃፌ ቆጾቲ ሜዲቲዳ።

23 ኢዚ ቃሴ ጾምፔ ዋሊዛሶዛሰ ላፑን ጾምፔታ፥ ጾምፔ ቶይሲዛ ቃጾታኔ ቃጾታ ዋሊዛሶ ዋላካይ ባይንዳ ዋርቃፌ ሜዲዴስ።

24 ጾምፔዛ ዋሊዛሶዛኔ ኢዛን ኅኤቲዛ ሚሽ ኡባ ሚዳናሰ ሄሹ ታማኔ ኢቻሽ ኪሎ ጊዲዛ ዋላካይ ባይንዳ ዋርቃ ዉርሲዴስ።

## ኤጻኔ ጨዋሲዛሶ

(ኬሳ 30:1-5)

25 ሄሳላካ ቃሴ ኤጻኔ ጨዋሲዛሶዛ ኦዶሮ ሚላፌ ሜዲዴስ። ኢዛሰ ኦይዱ ጉላይ ዴስ፤ ኣዲሳቴላይ ኢሲ ዋዳ፤ ኣሆቴላይ ኢሲ ዋዳ፥ ድቃቴላይ ናምኡ ዋዳ። ኢዛ ካጩቲካ ኢዛራ ኢሲኖ ጊዲዲ ኦይኬቲ ሜዲቲዳይታ።\*

26 ኢዛሰ ቦላ ባጋዛ፥ ኦይዱ ሚሌታኔ ኢዛ ካጩታ ዋላካይ ባይንዳ ዋርቃን ሜሺዲ ኢዛ ዩሺ ኣላናሰ ጸንጻዛ ዋርቃፌ ኦሊዴስ።

27 ሄ ዋርቃ ጸንጻፌ ጋርሳራ ኤጻኔ ጨዋሲዛሶዛሰ ዋርቃፌ ናምኡ ሳጋዮታ ሜዲዴስ፤ ሂሰቲዲ ሄ ባጋራኔ ሄ ባጋራ ናምኡ ናምኡ ኦይሊዴስ። ሄይቲ ቶኪዛ ዋዳ ቶሆ ሚላታ ኣላናሰ ማዳናሳ።

28 ቶሆ ሚላታ ኦዶሮ ሚላፌ ኬሲዲ ኢሰታ ዋርቃን ሜሺዴስ።

\* 37:25 ጉላ ጊዛይሳ ኢሲ ኢሲ ባጋ ጋሞላ ቃላን ዞዜ ዋይኮ ዴንቂሼ ጌቲስ።

29 ቃሴ ዲማቲዳ ቲዬቲዛ ዛይቴኔ ሳዎ ቱኑ ጊዛ ሎኑ ኤጻኔ ሺቶ ማላ ጊግሲዴስ።

## 38

ጸጌቲዛ ያርሾ ያርሺዛሶዛ ኦሶ  
(ኬሳ 27:1-8)

1 ኦዶሮ ሚላፌ ጸጌቲዛ ያርሾ ያርሺዛሶ ኦሲዴስ። ሄ ያርሺዛሶዛ ጶቃቲላይ ሄዡ ዋቋ፤ እሆቲላይኔ አዲሳቲላይ እሲ ጊና፤ እቻሹ እቻሹ ዋቋ ጊዲዲ ኦይዱ ጉላይ ዲዛይሳ ኦሲዴስ።

2 ኦይዱ ጉላታ ወርሴላ ጸራን ጸራን እሲ እሲ ካጩ ሜዲዴስ። ሄ ካጩቲ ያርሺዛሶዛራ እሲፌ ኦይኬቲዲ ኦሴቲዳ። ሂሰቲዲ ያርሺዛሶዛ ጸርቂማላራ ሜሺዴስ።

3 ኢዛን ጎኤቲዛ ሚሻታ፤ ቢዲንሐ ኬሲዛ ሳኔታ፤ አካፋታ፤ ኬሬታ፤ እሾ ኮንጩታኔ ቦንቆ ታማ ኦይኪዛ ኮንኦ ኡባ ጸርቂማላፔ ሜዲዴስ።

4 ሂሰቲዲ ጸርቂማላፔ ዛይዛሬ ያርሺዛሶዛስ ጊግሲዲ ያርሺዛሶዛስ ዲጌ ጊዶ ጊናን ዲዛ ጸንጻዛስ ጋርሳ ባጋራ ዋሊዴስ።

5 ጸርቂማላፔ ሜዲዳ ዛይዛሬዛስ ኦይዱ ጉላን ቶሆ ሚላታ አላናስ ኦይዱ ቃንጎታ ሜዲዴስ።

6 ኦዶሮ ሚላፌ ያርሺዛሶዛ ቶሆ ሚላታ ኬሲዲ ጸርቂማላን ሜሺዴስ።

7 ያርሺዛሶዛ ቶኪዛ ዋዴ ማዳና ማላ ቶሆ ሚላታ ናሞኡ ሚሌራ ዲዛ ቃንጎታን ኦሲዴስ። ያርሺዛሶዛ ጊዶ ዶይኦ አጊዲ ሳንቃፌ ሜዲዴስ።

ሜቻ ኬሬ  
(ኬሳ 30:18)

8 ጸርቂማላፔ ሜቻ ኬሬኔ ኬሬዛ ዋሊዛሶ ሜዲዴስ፤ ሄ ጸርቂማላዚካ ጸሳ ዲንካኔዛ ፔንጌን ኦሲዛ ማጫሳቲ ኤሂዳ ጸርቂማላ ማሰቶቴፔ ኤኬቲዴስ።

ጸሳ ዲንካኔዛስ ካሬ ባጋ ወይጌ ኦሶ  
(ኬሳ 27:9-19)

9 ሂሳፌ ጉዬ ዲቡሻሶዛ ጊግሲዴስ። ዲንካኔዛስ ካሬ ባጋ ወይጌስ ቶሆሶ ባጋ አዲሳቲላ ጾቱ ዋቋ ኦሲዲ፤ ሊቆ ላይኖፔ ዳዴቲዳ ማጋላሻ ጊግሲዴስ።

10 ኢዛስ ጸርቂማላፔ ናምኡ ታሙ ቱሳታኔ ቱሳቲ ኢዛን ኤቂዛ ጸርቂማላ ቶሆ ኦሊዴስ፤ ኢስታ ሁኡን ቃሴ ቢራፔ ሜዴቲዳ ኢስታ ቦላ ካቂዛይታኔ ቱሳታ ሁኡን ቃቺዛይታ ኦሊዴስ።

11 ዱንካኔዛስ ካሬ ባጋ ወይጌዛስ ሁኡስ ባጋ ኣዱሳቴላይ ጾቱ ዋዳ፤ ቃሴ ናምኡ ታሙ ቱሳቲኔ ሄ ቱሳታስ ናምኡ ታሙ ጸርቂማላ ቶሆቲ ዴቲስ። ቃሴካ ቢራፔ ኦሴቲዳ ኢስታ ቦላ ካቂዛይቲኔ ቱሳታ ሁኡን ቃቺዛይቲ ዴቲስ።

12 ኣርሼይ ወሊዛሶ ባጋራ ዲዛ ዱቡሻ ኣሆቴሊ ኢቻሹ ታሙ ዋዳ ጊዲዲ ታሙ ቱሳቲኔ ቱሳታስ ታሙ ቶሆቲ ዲዛ ማጋላሻታ ጊግሲዴስ፤ ሄ ቱሳታ ሁኡን ቢራፔ ሜዴቲዳ ኢስታ ቦላ ካቆታኔ ቱሳታስ ሁኡን ቃቺዛይታ ኦሊዴስ።

13 ቃሴ ኣርሼይ ሞኪዛ ባጋራ ዲዛ ዱቡሻሶ ኣሆቴሊ ኢቻሽ ታሙ ዋዳ።

14 ዱንካኔዛስ ካሬ ባጋ ወይጌዛ ጌሊዛሶፔ ኢሲ ባጋራ ታማኔ ኢቻሽ ዋዳ ኣዱቂዛ ማጋላሻቲ፤ ኢስታስ ሄሹ ቱሳቲኔ ቱሳታስ ሄሹ ቶሆቲ ዴቲስ።

15 ሄሳሶካ ዱንካኔዛስ ካሬ ባጋ ወይጌዛ ጌሊዛሶፔ ሃንኮ ባጋራ ታማኔ ኢቻሹ ዋዳ ኣዱቂዛ ማጋላሻቲ፤ ኢስታስ ሄሹ ቱሳቲኔ ቱሳታስ ሄሹ ቶሆቲ ዴቲስ።

16 ዱንካኔዛስ ካሬ ባጋ ወይጌዛ ዩሾን ዲዛ ማጋላሻቲ ወሪ ሊቆ ላይኖፔ ዴዴቲዳ።

17 ሄ ቱሳታስ ቶሆይ ጸርቂማላፔ፤ ካቆቲኔ ቱሳታስ ሁኡን ቃቺዛይቲ ቢራፔ ኦሴቲዳ፤ ኢስታ ሁኡይ ቢራን ሜሼቲዴስ። ሄሳ ጊሻስ ዱቡሻሶዛ ዩሾን ዲዛ ቱሳታ ኡባ ሁኡን ቢራፔ ኦሴቲዳ ቃቺዛ ሚሻቲ ዴቲስ።

18 ዱንካኔዛስ ካሬ ባጋ ወይጌዛ ጌሊዛሶን ካቂዛ ማጋላሻይ ሳሎ ሚሳቲዛ፤ ኦቻ ቴራ ሚሳቲዛኔ ጾቃ ዞኦ ቃጪናፔኔ ሊቆ ላይኖፔ ዴዴቲዲ ጸልፔን ኣሌቂሲ ጊግሲዳዛ። ኢዛስ ኣዱሳቴላይ ናምኡ ታሙ ዋዳ፤ ቃቃቴላይ ዱንካኔዛስ ካሬ ባጋ ወይጌዛ ማጋላሻታ ማላ ኢቻሹ ዋዳ።

19 ኢዛስካ ጸርቂማላፔ ኦሴቲዳ ኦይዱ ቱሳቲኔ ቱሳታስ ኦይዱ ቶሆቲ ዴቲስ። ኢስታ ካቆቲኔ ቱሳታስ ሁኡን ቃቺዛ ሚሻቲ ቢራፔ ኦሴቲዳ፤ ኢስታ ጸራቲካ ቢራን ሜሼቲዳ።

20 ጸሳ ዱንካኔዛ ዲሽኬቲኔ ኢዛ ዩሾን ዲዛ ዱንካኔዛስ ካሬ ባጋ ወይጌዛ ዲሽኬቲ ወሪ ጸርቂማላፔ ኦሴቲዳይታ።

ጸሳ ዱንካኔን ጎኤቲዛ ሚሻታ

21 ጸሳ ዱንካኔዛስ ጎኤቲዳ ሚሻታ ለዌ ቆሞቲ ማዘጋገን ጸፊዳ። ሄ ሚሻታ ቄሴ ኣሮኔ ና ኢታማሬ ዳናቱላ ጋርሳን ዲዛ ለዌቲ ማዘጋገን ጸፋና ማላ ሙሴይ ኣዛዚዳስ።

22 ቢኒያሜ ዜሬላ ጊዲዳ ኡሬስ ናዛ ና፥ ኡሬ ና፥ ባሰሊኤሌይ ጎዳይ ሙሴ ኣዛዚዳይሳ ኡባ ኦሲዳስ።

23 ዳኔ ዜሬላ ጊዲዳ ኣሂሳሜኬ ና ኤላቤይ ኢዛራ ዴስ፤ ኢዚ ኩሼ ሂላንቻኔ ኦሶስ ኮይሮ ቆፋ ኬሲዛዴኮ፤ ቃሴ ሳሎ ሚሳቲዛ፥ ኦቻ ቲራ ሚሳቲዛኔ ጴቃ ዘኦ ቃጪናኒኔ ሊቆ ላይኖን ዳዲዲ ጸልፔን ኣለቂሲዛ ኣሳ።

24 ጸሳ ዱንካኔዛ ኦሶስ ጎዳስ ያኔ ሃ ቃሴሊ ሺሺዛ ያርሾስ ኣሜቲዳ ዋርቃይ ጸሳ ዱንካኔን ኤሬቲዳ ሜዛኔን ዋሒን 1,000 ኪሎ ጊዲዳስ።

25 ታይቦን ዲዛ ማባራ ኣሳፔ ቤቲዳ ቢራይ ጸሳ ዱንካኔን ኤሬቲዳ ሜዛኔን ዋሒን 3,430 ኪሎ ጊዲዳስ።

26 ኣሳ ታይቢዛ ዋዴ ታይቤቲዳ ኣቱማሳይ ወሪ ኢሳዴይ ሁኡን ሁኡን ኣሚዳይሲ ጸሳ ዱንካኔን ኤሬቲዳ ሜዛኔን ዋሒን ኡሱፑን ጊራሜ ማላ ጊዲዳስ። ታይቤቲዳ ኣሳይ ናሞኡ ታሙ ላይላ ኩሚዳይኔ ናሞኡ ታማሬ ቦላራ ዲዛይ ሙሉራ 603,550።

27 ጸሳ ዱንካኔዛ ማጋላሻታ ኤሲዳ ጴቱ ቶሆቲ 3,400 ኪሎ ጊዲዛ ቢራን ኦሴቲዳ። ሄሲካ ኢሲ ኢሲ ቶሆስ 34 ኪሎ ቲጌቲዛ ቢራ።

28 ኣቲዳ ሄቹ ታሙ ኪሎ ቢራ ቱሳታ ቦላ ካቆሶ ሜቆናስ፥ ቱሳታስ ሁኡ ቦላ ሜሻናሲኔ ኢስታ ሁኡን ቃቺዛ ሚሻታ ሜቆናስ ጎኤቲዳ።

29 ሄሳሶካ ኣሳይ ጎዳስ ያኔ ሃ ቃሴሊ ሺሻናስ ኤሂዳ ጸርቂማላ ያርሾይ 2,425 ኪሎ ጊዲዳስ።

30 ሄ ጸርቂማላፔ ጸሳ ዱንካኔዛ ጌሊዛሶን ኤቂዛ ቱሳታስ ቶሆይ፥ ጸርቂማላፔ ኦሴቲዳ ያርሺዛሶ ጌቲቲዛ ያርሺዛሶዚ፥ ኢዛ ጊዶን ዋሒዳ ጸርቂማላ ዛይዛሬይኔ ኢዛ ጊዶን ጎኤቲዛ ዲማ ዲማ ሚሻይ ወሪ ሜቆቲዳስ።

31 ሄሳሶካ ቃሴ ዱንካኔዛስ ካሬ ባጋ ወይጌ ዩሾን ዲዛ ዲርሳ ጊዶ ጌሊዛሶ ፔንጌን ኤቂዳ ቶሆይ፥ ቃሴ ጸሳ ዱንካኔዛኔ ኢዛ ዩሾን ዲዛ ዱንካኔዛስ ካሬ ባጋ ወይጌ ዲርሳይ ቶሌቲዳ ጳሽኬቲ ወሪ ሄ ጸርቂማላፔ ሜቆቲዳ።

### ቄሴታ ማይኦ (ከሳ 28:1-14)

<sup>1</sup> ቄሴቲ ጸሳ ዱንካኔን ኦሊዛ ዋዴ ማይኦና ማይኦ፡ ሳሎ ሚሳቲዛ፡ ኦቻ ቲራ ሚሳቲዛኔ ጾቃ ዘኦ ቃጪናፔ ዳዲዳ፡ ኣሮኔ ቄሴቲሳ ማይኦካ ጎዳይ ሙሴ ኣዛዚዳ ማላ ኦሊዳ፡፡

<sup>2</sup> ቃሴ ኢስቲ ኤፋዴ ዋርቃፌ፡ ሳሎ ሚሳቲዛ፡ ኦቻ ቲራ ሚሳቲዛኔ ጾቃ ዘኦ ቃጪናፔኔ ሊቆ ላይኖፔ ዳዲዳ፡፡

<sup>3</sup> ኢስቲ ዋርቃ ቆጶ ሌኢሲዲ፡ ኢዛፔ ቃራሪ ቃራሪዲ ቃጪና ኬሲዳ፡፡ ሂስቲዲ ሳሎ ሚሳቲዛ፡ ኦቻ ቲራ ሚሳቲዛኔ ጾቃ ዘኦ ቃጪናኔ ሊቆ ላይኖ ጋሊዲ ኩሼ ሂላንቻቲ ዳዲዳ፡፡

<sup>4</sup> ናምኡ ባጋይ ጋጊዲ ኢሲኖ ጊዳና ማላ ናምኡ ሃሼ ቦላ ጋሊዲ ኦይሊዛ ጫርቃ ገግሲዳ፡፡

<sup>5</sup> ጎዳይ ሙሴ ኣዛዚዳ ማላ ሂላይ ኣለቂሲዲ ዳዲዳ ዳንጮይካ ኤፋዴራ ኢሲፌ ጊዲዲ፡ ዋርቃፌ ሳሎ ሚሳቲዛ፡ ኦቻ ቲራ ሚሳቲዛኔ ጾቃ ዘኦ ቃጪናፔኔ ሊቆ ላይኖፔ ዳዴቲዴስ፡፡

<sup>6</sup> ኢስቲ ማርጊዴ ጌቲቲዛ ናምኡ ሹቻታ ገግሲዲ ዋርቃፌ ሜዲዳ ሹቹ ኦይኪዛይሳ ቦላ ማራራ ዋሊዳ፡፡ ማታፋ ቦላ ሱንሸ ዋጪ ጸፊዛ ማላ ሄ ሹቻታ ቦላ ኢስራኤሌ ናይታ ሱንሸ ዋጪዲ ጸፊዳ፡፡

<sup>7</sup> ጎዳይ ሙሴ ኣዛዚዳ ማላ ታማኔ ናምኡ ኢስራኤሌ ቆሞታ ሃሳኢሲዛዝ ጊዳና ማላ፡ ሃ ታማኔ ናምኡ ሹቻታ ኤፋዴዛራ ኦይሊዲ ሃሼ ካቆዛ ቦላ ዋሊዳ፡፡

### ቲራ ቦላ ዲዛ ኪሴ (ከሳ 28:15-30)

<sup>8</sup> ኢስቲ ቲራን ዋሊዛ ኪሴ ኩሼ ሂላን ኦሊዳ፡፡ ሄ ቲራን ዋሊዛ ኪሴዛ ኤፋዴ ዋርቃፌ ዳዲዳ ማላ፡ ሳሎ ሚሳቲዛ፡ ኦቻ ቲራ ሚሳቲዛኔ ጾቃ ዘኦ ቃጪናፔኔ ሊቆ ላይኖፔ ዳዲዳ፡፡

<sup>9</sup> ኢዛስ ኦይዲ ጸራይ ዴስ፤ ቋቃቲሳይኔ ኣሆቲሳይ ኢሲ ኢሲ ታቆኩ፡፡

<sup>10</sup> ሄሳፌ ጉዬ ኢዛ ቦላ ኦይዲ ማራን ኣልኦ ሹቻታ ዋሊዳ፤ ኮይሮ ማራን ዋሊዳ ሹቻይ ሳርዲዮኔ፡ ቶጳዚዮኔኔ ጸልቂዛ ኢንቁ፤

<sup>11</sup> ናምኣንሶ ማራን ባሉሬ፡ ሲምፔሬ ኣልማዜ ጌቲቲዛ ኣልኦ ሹቻታ፤

<sup>12</sup> ሂሻንሶ ማራን ያኪንቲ፡ ኬልቂዶኔኔ ኣሜቲሰጸዲሴ፤

<sup>13</sup> ኦይዲንሶ ማራን ቢሪሌ፡ ማርጊዴኔ ያስጸዴ፡፡ ሄይታ ኡባ ዋርቃፌ ኦሴቲዳ ሹቹ ኦይኪዛይሳ ቦላ ዋሊዳ፡፡

14 ኢስራኤል ናይታ ሱንላ ቆዳ ማላ፡ ሹቻታ ቆዳይካ ታማኔ ናምእ፤ ኢሳይ ኢሳይ ማታማ ማላ ወጮቲዲ ታማኔ ናምኡ ቆሞታ ሱንላ ሄ ሹቻታ ቦላ ጸፌቲዳስ።

15 ቲራን ዲዛ ኪሴዛስ ወደሮ ማላ ዶቄቲዳ ሳንሳላታ ዋላካይ ባይንዳ ወርቃፌ ሜዲዳ።

16 ናምኡ ወርቃፌ ሜዲዳ ሹቹ ኦይኪዛይታኔ ናምኡ ወርቃ ሚጊዶታ ሜዲዲ ቲራን ዋሊዛ ኪሴዛስ ቆሞ ጋጸ ጸራታ ጋሊ ኦይሊዳ።

17 ሄ ናምኡ ወርቃ ሳንሳላታታ ቲራን ዋሊዛ ኪሴዛስ ጸራን ዲዛ ሚጊዶታ ጋሊ ኦይሴሊዳ።

18 ሄ ሳንሳላታታስ ሃንኮ ባጋ ጸራ ቃሴ ኤፋዴዛስ ሲንላ ባጋራ፡ ሃሼ ካቆ ቦላ ዲዛ ሹቹ ኦይኪዛይታራ ጋሊ ቃቺዳ።

19 ቃሴካ ናምኡ ወርቃ ሚዲጋታ ሜዲዲ ኤፋዴፔ ካሊ ዲዛ ቲራ ኪሴዛስ ሶ ባጋራ ዲዛ ናምኡ ጸራታን ኣሊዳ።\*

20 ሄሳሶካ ወርቃፌ ሃራ ናምኡ ሚጊዶታ ሜዲዲ፡ ኤፋዴዛስ ሲንላ ባጋራ፡ ሃሼ ካቆዛፔ ጋርሳ ባጋራ ኤፋዴ ጸሳን ቃቺዛይሳፌ ቆሞራ፡ ሲኮይ ጋገዛሶ ኣቻን ኢስታ ኦይሊዳ።

21 ጎዳይ ሙሴ ኣዛዚዳ ማላ ቲራ ኪሴን ዲዛ ሚጊዶታ ኤፋዴዛን ዲዛ ሚጊዶታራ ጋሊዲ፡ ሳሎ ሚሳቲዛ ሱቁላን ቃቺዳ ጊሻስ ቲራ ኪሴዚ ጸሳፌ ቦላራ ዲዛ ጊሻስ ቃሾይ ዶልኤና።

**ቄሴቲ ማይዛ ሃራ ማይኦታ**

(ኬሳ 28:31-43)

22 ኤፋዴዛፔ ቦላራ ማይኢዛ ቃሚሳ ኢስቲ ሙሌራ ሳሎ ሚሳቲዛ ጨርቃፌ ገገሲዳ፤ ሄሲካ ሽማኔ ኦሶኮ።

23 ሄ ቃሚሳዛስ ቆጶ ኣሊዛሶ ሜዲዳ፤ ቆጶሶይ ዳኬቶንታ ማላ፡ ሶ ባጋ ቃላምኢዲ ዩሺ ኣሊ ሲኪዳ።

24 ኢስታ ቃሚሳዛስ ዲጌ ባጋ ማጫራ ዩሾን ሳሎ ሚሳቲዛ፡ ኦቻ ቲራ ሚሳቲዛኔ ጸቃ ዘኦ ቃጨናፔኔ ሊቆ ላይናፔ ኦሮማኔ ጌቲቲዛ ሚሳ ኣይፌ ቲራ ሚሰሌታ ሜዲዳ።

25 ቃሴካ ወርቃፌ ዳላታ ሜዲዲ ቃሚሳታስ ዲጌ ባጋ ጸራ ዩሺ ኣሊዲ ኦሮማኔ ሚሰሌታ ጊዶን ኣሊ ኣሊ ዋላኪዳ።

26 ጎዳይ ሙሴስ ኣዛዚዳ ማላ ኢስቲ ጸሳ ዲንካኔ ኦሶ ኦሊሼ ማይኣና ማላ ቃሚሳዛስ ዲጌ ባጋ ማጫራ ዩሺ ኣሊዲ ዳላኔ ኦሮማኔ ቲራ ሚሰሌ ዋላኪ ኣሊዳ።

\* 39:19 ሚዲጋ ጊዛይሳ ኢሲ ኢሲ ባጋ ጋሞላ ቃላን ሚጊዶ ወይኮ ጨዳ ጌቲቲሰ።

27 ጎዳይ ሙሴ አዛዚዳ ማላ ኢስቲ አሮኔሴ ኢዛ ናይታሰ ሽማግሌ ዳዲዳ ሊቆ ላይኖፔ ቆሌታ ገግሲዳ።

28 ቃሴ ሁኤን ጸጸዛ ሻሼታ፥ ቆቤታኔ ጋርሳራ ማይኢዛ ማይኦታ ሊቆ ላይኖፔ ዳዲዳ ገግሲዳ።

29 ሄሳዳካ ቃሴ ኢስቲ ሳሎ ሚሳቲዛ፥ ኦቻ ቴራ ሚሳቲዛኔ ጸቃ ዘኦ ቃጪናፔኔ ሊቆ ላይኖፔ ዳዲዳ ኩሼ ሂላን አሌቂሲዳ ዳንጮ ገግሲዳ።

30 ኢስቲ አኪሊሌ ሚሰሌ ዋላካይ ባይንዳ ዋርቃፌ ሜዲዳ ማታሚ ቦላ ዋጪዛ ማላ ኢዛ ቦላ፥ «ጎዳሰ ጌሽ ጊዲዳ ዲማቲዳሰ» ገዛይሳ ዋጪ ጸፊዳ።

31 ሄሳፌ ጉዬ ሁኤ ጎሳ ቦላ ካቃና ማላ፥ ጎዳይ ሙሴ አዛዚዳ ማላ ሳሎ ሚሳቲዛ ባቄል ኢዛን አሊዳ ቃቺዳ።

#### ሙሴይ ኦሶዛ ኡባ ጸሞሲዳሰ (ኬሳ 35:10-19)

32 ጸሳ ዱንካኔዛ ኦሶይ ዉሪ ሙሌራ ፖሊቲዳሰ። ኢሰራኤል አሳይ ኡባ ጎዳይ ሙሴ አዛዚዳ ማላ ኦሊዳሰ።

33 ሄሳፌ ጉዬ ኢስቲ ጸሳ ዱንካኔዛ ሙሌራ ኤኪዳ ሙሴኮ ኤሂዳ፤ ሄሲካ ዱንካኔዛኔ ኢዛ ሚሻዛ ኡባ፥ ቃጴታ፥ ቶሌ ሚላታ፥ ፔንጌ ጎርዲዛ ሚላታ፥ ቱሳታኔ ኢስቲ ኤቂዛ ቶሆታ።

34 ቦላራ ካማናሰ ቆርሾዛ ኢቲ ዘኦ ቃላሜን ዩጊ ኬሲዳይሳ፥ ቃጪቲዳ ጋልባ፥ ጌንሊዛ ማጋላሻ።

35 ጫቆ ቃላ ታቦታ፥ ኢዛ ቶኪዛ ቶሆ ሚላታ፥ አቶ ጌቴቲዛ ካማ።

36 ጸራጴዛኔ ኢዛ ሚሼ ኡባ ጎዳ ሲንላን ዋሊዛ ጌሻ ኡኬላ፥

37 ዋላካይ ባይንዳ ዋርቃፌ ኦሴቲዳ ጸሞፔ ዋሊዛሶዛኔ ኢዛን ማራን ዲዛ ጸሞፔታ፥ ኢስታ ሚሻታ ኡባኔ ጸሞፔ ዛይቲ።

38 ዋርቃፌ ኦሴቲዳ ኤጸኔ ጩዋሲዛሶዛ፥ ቲዬቲዛ ዛይቲ፥ ሳዊዛ ኤጸኔ፥ ጸሳ ዱንካኔ ፔንጌ ማጋላሻ።

39 ጸርቂማላፔ ኦሊዳ ያርሺዛሶዛ፥ ጸርቂማላ ዛይዛሬዛ፥ ኢዛ ቶኪዛ ቶሆ ሚላ፥ ኢዛ ሚሻታ ኡባ፥ ሜቻ ኬሬኔ ኬሬዛ ኢዛ ቦላ ዋሊዛ ሚሻታ።

40 ዱንካኔዛሰ ካሬ ባጋ ዉይጌ ጎዳ ጌንሊዛ ማጋላሻታ፥ ኢዛ ቱሳታ፥ ኢስቲ ኤቂዛ ቶሆታ፥ ዱንካኔዛሰ ካሬ ባጋ ዉይጌ ጌሊዛ ፔንጌታ ማጋላሻታ፥ ዱንካኔዛሰ ካሬ ባጋ ዉይጌ ዋዶርታኔ ዲሽኬታ፥ ጸሳ ዱንካኔዛሰ ኮሺዛ ሚሻታ ኡባ፤

41 ቄሴቲ ጌሻ ሶን ኦሊዲ ማይአናስ ዳዴቲዳ ማይኦታ፥  
አሮኔይኔ ኢዛ ናይቲ ቄሴቲላን ኦሊሼ ማይኢዛ ማይኦታ።

42 ኢሰራኤል አሳይ ኦሶዛ ኡባ ጎዳይ ሙሴ አዛዚዳ ማላ  
ኦሊዳሰ።

43 ሙሴይ ኦሶዛ ጸሞሲ ጸሊዲ ኢሰታ ጎዳይ አዛዚዳ ማላ  
ኦሊዳይሳ በዪዳሰ። ሄሳ ጊሻስ ሙሴይ ኢሰታ አንጂዳሰ።

## 40

### ጸሳ ዱንካኔ ቶሎ

1 ሄሳፌ ጉዬ ጎዳይ ሙሴ፥

2 «ኮይሮ አገናን ኮይሮ ጋላስ፥ ኔኒ ጸሳ ዱንካኔ ቶላ።

3 ጫቆ ቃላ ታቦታ ኢዛ ጊዶን ዋላዳ ታቦታዛ ማጋላሻን ጌንላ።

4 ጸራጽዛ ጌልላዳ ኢዛ ቦላ ዋላናስ ኮሺዛ ሚሻታ ኡባ ኢዛ  
ቦላ ዋላ። ሂሰታዳ ጸሞፔታ ኢዛ ቦላ ዋሊዛ ሚሻዛ ሶ ጌልላዳ  
ኢዛ ቦላ ጸሞፔታ ዋላ።

5 ዋርቃፌ ኦሴቲዳ ኤጳኔ ጩዋሲዛሶዛ ጫቆ ቃላ ታቦታ ሲንላን  
ዋላዳ፥ ጸሳ ዱንካኔዛ ጊዶ ጌሊዛ ፔንጌ ማጋላሻዛ ካቃ።

6 «ጹጌቲዛ ያርሾ ያርሺዛሶዛ ጸሳ ዱንካኔዚ ጌሊዛ ፔንጌ  
ሲንላን ዋላ።

7 ኢዛን ሚጩቲዛ ኬሬዛ ጸሳ ዱንካኔዛፔኔ ያርሺዛሶዛፔ  
ጊዶን ዋላዳ ሃሌ ኢዛን ቲጋ።

8 ጸሳ ዱንካኔዛፔ ካሬራ ዩሻ አላዳ ዱንካኔዛሰ ካሬ ባጋ ዉይጌ  
ጊሳዳ ዱቡሻ ጌሊዛሶን ማጋላሻ ካቃ።

9 «ቲዬቲዛ ዛይቲዛ ኤካዳ ጸሳ ዱንካኔዛኔ ኢዛ ጊዶን ዲዛይሳ  
ኡባ ቲያ፤ ኢዛኔ ኢዛ ጊዶን ጎኤቲዛ ሚሻታ ኡባ ዱማሳ፤ ሂሰቲኮ  
ኢዚ ጌሽ ጊዳና።

10 ሄሳፌ ጉዬ ጹጌቲዛ ያርሾ ያርሺዛሶኔ ኢዛሰ ጎኤቲዛ ሚሻ  
ኡባ ቲያ፤ ያርሺዛሶዛ ዱማሳ፤ ሂሰቲኮ ኢዚ ኡባፌ ኣጂዳ ጌሽ  
ጊዳና።

11 ሜቻ ኬሬዛኔ ኬሬዛ ኢዛ ቦላ ዋሊዛ ሚሻታ ቲያዳ ኢሰታ  
ዱማሳ።

12 «ኔኒ አሮኔኔ ኢዛ ናይታ ጸሳ ዱንካኔዚ ጌሊዛ ፔንጌ ኤሃዳ  
ሃላን ማጫ።

13 ሄሳፌ ጉዬ ቄሴቲላ ማይኦዛ አሮኔ ማይዛዳ ኢዚ ታሰ  
ቄሴቲላን ኦላና ማላ ኢዛ ቲያዳ ዱማሳ።

14 ኢዛ አቱማ ናይታካ ኤሃዳ ቆሌ ማይዛ።

15 ኢስቲ ታስ ቄሴቴላን ኦላና ማላ፡ ኢስታ አዋ ቲይዳ ማላ፡ ኢስታካ ቲያ፡ ኢስታ ቲዬቴላንካ ኢስታኔ ኢስታ ዬሌታይ ዉሪ ቄሴ ጊዲዲ ኦላና ማላ ታ ኦላና» ጊዴሰ።

16 ሙሴይ ኡባካ ጎዳይ ባና አዛዚዳ ማላ አሏዴሰ።

17 ሄሳ ጊሻስ ጊብጾፔ ኢስቲ ኬዚዳ ናምኣንሉ ላይላን፡ ኮይሮ አገናን ኮይሮ ጋላሳን ጸሳ ዲንካኔይ ቶሌቲዴሰ።

18 ሙሴይ ጸሳ ዲንካኔዛ ኤሲዛ ዋዴ ዲንካኔዛ ቶሆ ኢስታ ሶሆን ሶሆን ዋሏዴሰ፤ ቶሌ ሚላታኔ ቱሳ አሏዴሰ፤ ጎርዲዛ ሚላታካ ጌልሏዴሰ።

19 ሄሳፌ ጉዬ ሙሴይ ጎዳይ አዛዚዳ ማላ ዲንካኔዛ ቶሊዲ ኢዛ ቦላራ ካማ ካሚዴሰ።

20 ሂስቲዲ ታሙ አዛዙቲ ጸፊቲዳ ማሴቲዳ ሹቻታ ኤፊዲ ታቦታዛ ጊደን ዋሏዴሰ፤ ቶኪዛ ቶሆ ሚላታ ታቦታን አሏዴሰ፤ ማርቴላ ካማካ ታቦታ ቦላ ዋሏዴሰ።

21 ሄሳፌ ጉዬ ታቦታዛ ጸሳ ዲንካኔዛ ጊደ ጌልሏዴሰ፤ ጌንሊዛ ማጋላሻ ካቂዲ፡ ጎዳይ አዛዚዳ ማላ ጫቆ ቃላ ታቦታዛ ካሚዴሰ።

22 ጎዳይ ሙሴ አዛዚዳ ማላ፡ ሙሴይ ጸራጳዛዛ ጸሳ ዲንካኔዛን ጌልሏዲ፡ ማጋላሻፔ ካሬራ ሁኤሶራ ዋሏዲ፡

23 ኢዛ ቦላ ጎዳ ሲንላን ዋሏዛ ጌሻ ኡኬላ ጊግሲዴሰ።

24 ጎዳይ ሙሴ አዛዚዳ ማላ፡ ጸምፔ ዋሏዛሶዛ ጸሳ ዲንካኔ ጊደ ጌልሏዲ፡ ጸራጳዛሰ ሲንላ ባጋራ፡ ጸሳ ዲንካኔዛሰ ቶሆሶራ ዋሏዴሰ፤

25 ቃሴ ጸምፔታ ጎዳ ሲንላን ኦይሏዴሰ።

26 ጎዳይ አዛዚዳ ማላ፡ ዋርቃፌ ኦሴቲዳ ኤጻኔ ጨዋሲዛሶዛ ጸሳ ዲንካኔዛ ጊደ ጌልሏዲ ማጋላሻዛሰ ሲንላ ባጋራ ዋሏዲ፡

27 ኢዛ ቦላ ሳዊዛ ኤጻኔ ጨዋሲዴሰ።

28 ሄሳፌ ጉዬ ጸሳ ዲንካኔዛ ፔንጌን ማጋላሻ ካቂዴሰ።

29 ጽጌቲዛ ያርሾ ያርሺዛሶዛ ጸሳ ዲንካኔ ጌሊዛሶ ፔንጌ አቻን ዋሏዴሰ፤ ኢዛ ቦላ ጽጌቲዛ ያርሾኔ ካላ ያርሾ ጎዳይ አዛዚዳ ማላ ያርሺዴሰ።

30 ሜቻ ኬሬዛ ጸሳ ዲንካኔዛፔኔ ያርሺዛሶዛፔ ጊደን ዋሏዴሰ። ሂስቲዲ ሜጩታናሰ ሃሌ ኢዛን ቲጊዴሰ።

31 ሙሴይ፡ አርኔይኔ ኢዛ ናይቲ ባ ኩሼኔ ባ ቶሆ ኢዛን ሜጩቲዳ።

<sup>32</sup> ጎዳይ ሙሴ አዛዚዳ ማለ፥ ኢስቲ ጾሳ ዱንካኔን ጌሊዛ ዎዴ ዎይኮ ያርሺዛሶ ሸቂዛ ዎዴ አይዴካ ሜጩቴቴስ።

<sup>33</sup> ጾሳ ዱንካኔን ያርሺዛሶ ዩሺ አሊዲ ዱቡሻ ገግሲዴስ፤ ሄ ዱቡሻ ፔንጌን ማጋላሻ ካቂዴስ። ሄሳሶ ሂስቲዲ ሙሴይ ኦሶዛ ፖሊዴስ።

ጾሳ ዱንካኔዛን ጎዳ ሶንቾ ኩሞ

(ታይ 9:15-23)

<sup>34</sup> ሄሳፌ ጉዬ ሻራይ ጾሳ ዱንካኔዛ ካሚዴስ፤ ጎዳ ሶንቾይካ ኢዛ ኩሚዴስ።

<sup>35</sup> ሻራይ ጾሳ ዱንካኔዛ ሶላ ኡቲዳ ገሻሲኔ ጎዳ ሶንቾይ ኢዛ ጊዶን ኩሚዳ ገሻሰ ሙሴይ ኢዛ ጊዶ ጌላናሰ ዳንዳይቤና።

<sup>36</sup> ኢሰራኤሌ አሳይ ባ ኦጌ ኡባን፥ ሄ ሻራይ ጾሳ ዱንካኔዛፔ ዴንዲዛ ዎዴ አይዴካ ኢዛ ካሊዲ ቤቴስ።

<sup>37</sup> ጊዶ አቲን ሄ ሻራይ ዴንዶንታ ኢጲኮ ኢዚ ዴንዳና ጋላሳይ ጋካናሰ ኢስቲካ ቃጾቴና።

<sup>38</sup> ኢስታ ኦጌ ኡባን ጎዳ ሻራይ ኢሰራኤሌ አሳይ ዉሪ ቤኢሺን፥ ጋላሰ ጋላሰ ጾሳ ዱንካኔ ካሚሲኔ ቃማ ቃማ ቃሴ ታማይ ሄ ሻራ ጊዶን ኤጼስ።

## ጌሻ ማጸፋ

### **Gamo: ጌሻ ማጸፋ Bible of Ethiopia, Ethiopic script**

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b